

Jnu'un Yandios ni chaa

Lucas

Síki jnu'un ka'an tutu ja'a

1 Nde tijní chaa ni ka nanduku ndaa nasa ni kuu na ni kii Cristo Jesús jiin taka jniñu ni sa'aya, ja ni ka jini yo.² Sia'an nava ni ka xna'an yivi ni ka jini jniñu ni sa'a Jesús undi nuu, yivi ni ka jika jiin ya ti ni ka chindee ya jiin jnu'un ni xndaku ya.³ Ti suni ru'u Lucas, ni nanduku ndaa ri taka nasa ni kuu undi nuu, na ni kii Jesús. Ti ndo'o ini ri ja iyo va'a ja na chaa ri tutu ja'a nuu ra, amigo Teófilo, na kachi ri taka jniñu ni sa'a Jesús, undi na ni keja'a ya ti undi ni xndi'i ya.⁴ Ti sia'an na kuni ndaa ra ja iyo ndaa taka jnu'un ni kutu'va ra siki Jesús. Yukan kuu ja chaa ri tutu ja'a.

Kachi iin ángel Yandios ja kaku Juan, chaa kii skuanducha

⁵ Na ni kuu Herodes rey ñuu Judea, ni iyo iin sutu Israel ni nani Zacarías, ti chaa un yi'i da jiin grupo sutu ni nani Abías. Ti ñasi'i da ni nani ña Elisabet, ni kuu ña jna'an iin sutu jana'an ni nani Aarón.⁶ Ti ndinduu da ni ka

jandatu va'a da nuu Yandios, ti suni ni ka siuku ndaa da taka ley ni ta'u maa Jito'yo Yandios. Ti ni iin yivi tu ni ka ka'an ndeva'a i síki da.⁷ Ko tu ni ka iyo se'e da, chi Elisabet tu ni iyo se'e ña. Ti ndinduu da ja ni ka ja'nú xaan da naa da.

⁸ Ti iin kívi ni kendo Zacarías nuu jniñu da ja junukuachi da, ja kuu da sutu nuu Yandios.⁹ Sia'an nava ni iyo jnu'un ja kuu sutu un naa da, ni kuu suerte maa Zacarías ja ni kívi da ve'e ii, ini veñú'un ka'nu Jito'yo Yandios ja ka'ma da suxia kutu.¹⁰ Ko ni ja'ma da suxia kutu un, ti ichi jata ve'e ii un ka'iin yivi kua'a ka jikanta'u i.¹¹ Ti ni kenda iin ángel Jito'yo Yandios nuu Zacarías ja kandichi xiin nuu altar nuu kayu suxia kutu un.¹² Ti nu ni jini Zacarías nuu ángel un ni yu'u da, ti tu ni kujnuni ini da nasa sa'a da.¹³ Ko ni kachi ángel jiin da:

—Zacarías, koto ma yu'u ra, chi ni jiniso'o Yandios jnu'un ni jikanta'u ra nuu ya, ti koo iin se'e ñasi'i ra Elisabet vijna. Skaku ña iin suchi yii lulu, ti skonani ra i Juan.¹⁴ Ti kusii xaan ini ra jiin suchi lulu un, ti suni kua'a xaan yivi kusii ini jiin

yí kivi na kaku i, ¹⁵ti kua'a Yandios iin jniñu ña'nú nuu i. Tu ko'o i vino ni ndixi, ti kunchaa Espíritu Santo jiin i, vasu ni ñu'un ga i chii nana i. ¹⁶Ti sa'a i ja kua'a yivi nación Israel na nakani ini i ti kuandatu i nuu Jito'yo Yandios. ¹⁷Ti Juan un kuu ja koxnuu ki'in satu'va yivi ja kuu maa Jito'yo, ya kiji un, ti kuñava'a da jnu'un nde Espíritu nava ni ñava'a profeta Elías. Ti sa'a da ja taka tata na ndunda'u ini da nuu se'e da, ti yivi ni'lín ini ja kanda kua'an kanda vaji un kutu'va i kuandatu i. Ti sia'an satu'va da yivi naa i ja na kotu'va i kivi na chaa maa Jito'yo —ni kachi ángel Yandios un.

¹⁸Yukan ti ni jikajnu'un Zacarías ángel un:

—¿Nasa kuni ndaa na nu jandaa ndixia kuu nusa? Chi ja ni ja'nú xaan na, ti suni ñasi'i na —ni kachi da.

¹⁹Ko ni kachi ángel un:

—Ru'u kuu Gabriél, junukuachi ri nuu Yandios, ti ni taji ya ru'u vaji ri ja na kasjnu'un ri iin jnu'un va'a ja'a nuu ra. ²⁰Ko vijnna, vanuxia tu ni kandixia ra jnu'un ni ka'an ri, ti kendo ñi'in ra, ti tukaa ga kuu ka'an ra undi na jaa kivi kundaa jnu'un ja'a, ja kaku suchi lulu un. Ti jnu'un ja'a kundaa nava ni kachi ri —ni kachi ángel un.

²¹Ti ni ka ndajnu'un Zacarías jiin ángel un, ti ka'iin yivi ichi fuera ka ndatu i maa da, ti ka jani ini i ja ndoo jna'an da ja ni kuna'an kukuee da ini ve'e ii un. ²²Ko nu ni kenda Zacarías, ti tukaa kuu ka'an da jiin yivi un naa i. Yukan ti ni ka chaku ini yivi un ja iyo iin ja ni

naxna'an Yandios nuu da ini ve'e ii un. Ti seña ni ga ni sa'a da chi ni kendo ñi'in da.

²³Nu ni jinu kivi ni junukuachi Zacarías ini veñu'un un, ti kuano'on da ve'e da. ²⁴Yukan na ti ni jaku'un se'e ñasi'i da Elisabet, ti tukaa ni kee ña ve'e ña nuu u'un yoo, chi ndo'o ini ña: ²⁵“Sia'an ni sa'a maa Jito'yo jiin ri, ti vijnna tukaa ga kukanuu ri nuu taka yivi ja skexiko i ru'u”, sia'an ndo'o ini ña.

Ni kasjnu'un iin ángel Yandios ja kaku Jesús

²⁶Nu ja ni kuu iñu yoo ja ñu'un se'e Elisabet, ti ni taji Yandios ángel Gabriél nuu ndañuu Galilea ja nani Nazaret. ²⁷Ni jan ka'an da jiin iin ña'an suchi ñu'un nani María. Ti ja ni kundaa ja nanda'a ña'an un jiin iin chaa nani José, iin chaa kuu jna'an chaa ni kuu rey ni nani David. ²⁸Ni jaa ángel un nuu kancha ña, ti ni kachi da:

—Too ni ndii. Ndatu ni kuu ra nuu Yandios, ti kancha Jito'yo jiin ra, ti ndatu xaan ga ni kuu ra nuu Yandios ja kuu taka ga ñasi'i —ni kachi ángel un.

²⁹Ko nu ni jini María nuu ángel un, ti ni sana inijnuni ña, ti ni kuñaa inijnuni ña ja sia'an ka'an ángel un. Ti ndo'o ini ña naa jnu'un kuu ja ka'an ángel un. ³⁰Ti ni kachi tuku ángel un:

—Koto yu'u ra María, chi ni kunda'u ini Yandios ro'o ja ni ja'a ya iin jniñu ña'nú nuu ra. ³¹Vijnna ti jaku'un se'e ra. Ti kuu i iin suchi yii, ti skonani ra i Jesús.

³²Nduña'nu i, ti kuu i maa Se'e Yandios kancha andivi. Ti sa'a

Jito'yo Yandios ja na kuu i rey nanu ni kuu David, chaa ni kuu jna'an i jana'an. ³³Ti ta'u i jniñu nuu nación Israel ja kuu saa ni ti jankiví ga ndi'i jniñu ta'u i un —ni kachi ángel un.

³⁴Yukan na ti ni jikajnu'un María nuu ángel un sia'an:

—¿Nasa kundaa jnu'un ni ka'an ni un, ti changa ga koo yii na? —ni kachi ña.

³⁵Yukan ti ni kachi ángel un jiin ña:

—Maa Espíritu Santo sa'a ja na jaku'un suchi lulu un, chi iin jniñu ña'nú kuu ja sa'a Yandios jiin ra. Ti suchi lulu ii ja kaku un, kuu i Se'e maa Yandios. ³⁶Suni na kachi ri nuu ra ja Elisabet, ñaa kuu jna'an ra un, koo iin se'e ña, vasu ja ni nchii ña. Ja yukan kuu ja ña'an ka ka'an ja tu iyo se'e un, vijna ti ja iyo iñu yoo ja nchaa ku'u ña. ³⁷Chi Yandios, taka ni ja kuu sa'a ya, ti tu iyo ni iin ja tu kuu sa'a ya —kachi ángel un.

³⁸Yukan na ti ni kachi María:

—Sia'an na koo nusa, chi maa ya kuu ja yinda'a saña, ti na kuu nava ni kachi ni —kachi ña.

Yukan na ti kua'an ni ángel un.

Ni jan ka'an María jiin Elisabet

³⁹Yukan ti uu uni ni kivi ti ni kee María, ti kua'an ña iin ñuu kande yuku ñuu Judea. ⁴⁰Ni jaa ña ve'e Zacarías, ti ni kanxia'u ña jiin Elisabet. ⁴¹Ti nu ni jiniso'o Elisabet ja kanxia'u María jiin ña, ti yukan ni kanda suchi lulu un chii ña, ti ni chaa Espíritu Santo nuu ña. ⁴²Yukan na ti jaa xaan ni ka'an ña:

—Jandaa ndixia kuu ja ni chindee chituu Yandios ro'o. Ti ndatu xaan

ga ni kuu ra ja kuu taka ga ñasi'lí. Ti suni na chindee xaan ga maa ya suchi ñu'un chii ra.

⁴³Ti xaan ndatu ri ja ni chaa nana Jito'yo ri kii nde'e ña ru'u, ti ansu iin ña'an kuña'nú kuu ri. ⁴⁴Ti naa ini ri na ni jiniso'o ri jnu'un ni ka'an ra, ti ni kanda suchi lulu ja'a chii ri ja ni kusii ini i. ⁴⁵Na chindee chituu ya ro'o ja ni kandixia ra jnu'un ni ka'an ya jiin ra. Ti jaa kivi ni kundaa nava ni kachi maa Jito'yo nuu ra —ni kachi Elisabet.

⁴⁶Yukan na ti ni kachi María:

Jiin ni ini ri kana jaa ri maa Jito'yo ja kuña'nú xaan ya.

⁴⁷Ti kusii ini ri jiin Yandios ja ni nama ya ru'u.

⁴⁸Chi maa Yandios ja ni kunda'u ini ya ru'u, iin ña'an junukuachi nuu ya.

Ti undi vijna ka'an taka yivi naa i ja ndatu xaan ni kuu ri nuu Yandios, ti sia'an ndaku ni'in yivi ru'u ja kuu taka ni kivi.

⁴⁹Ti ka'nú jniñu ni sa'a ya jiin ri, chi kuña'nú maa Yandios, ti Yandios ii Yandios ndoo kuu ya.

⁵⁰Ti ja kuu saa ni kunda'u ini ya nuu taka yivi ka jandatu nuu ya.

⁵¹Ti ni sa'a ya jniñu ña'nú jiin jnu'un maa ya, ti ni kundee ya jiin yivi ka ndo'o vixi ini.

⁵²Ti chaa ka kuña'nú ni kenchaa ya jniñu nuu da, ti ni nakua'a ya nuu yivi nda'u ja na nduña'nú i.

⁵³Ti yivi ka ji'i soko ni ja'a ya ja na kaji va'a i.

Ti yivi riko ni sia ya maa i kuankoyo sia'an ni jiin nda'a iyu i.

- 54** Ni chindee ni chituu ya yo'o,
yivi nación Israel, ja ka
junukuachi yo nuu ya.
Chi ñukuu ini ya yo'o ja kunda'u
ini ya yo'o naa yo.
- 55** Chi sia'an ni chisojnu'un ya nuu
taka tata yo, nuu Abraham
jiin taka jna'an da ja kikoyo
inga kuiya.

Ni kachi Marfa.

56 Ti ni kendo ña uni yoo jiin
Elisabet, ti sa ni nandeokuñi ña
ve'e ña.

Ni kaku Juan chaa skuanducha

57 Nu ni jaa kivi ja kaku se'e
Elisabet, ti ni iyo iin suchi yii lulu
nuu ña. **58** Ti taka yivi kanchuku
yajni un jiin taka jna'an ña, ni
ka jini yivi un ja ni kunda'u ini
Yandios maa ña, ti ni ka kenda i ni
ka jajnu'un i maa ña.

59 Nu una kivi, ti ni ka chakoyo
yivi un ni ka ndututu i ja ni ka sa'a
i iin seña nuu yiki kuñu suchi yiki
un (ti yukan kuu iin seña nuu yiki
kuñu taka suchi yii nación Israel, ja
jna'an ja ka kuu i yivi Yandios). Ti
ka kuni skonani da suchi un sivi
maa tata i Zacarías. **60** Ko ni kachi
nana i:

—Tuu, chi Juan konani i —ni
kachi ña.

61 Ti ni ka kachi yivi un jiin ña:
—¿Ti ndoo nusa? Ti tu iyo ni iin
jna'an ra ja ni nani sia'an —ni ka
kachi i.

62 Yukan na ti ni ka jikajnu'un da
maa tata i jiin seña ja nasa kuni da
ja na konani i. **63** Ti ni jikan da iin
tabla lulu, ti ni chaa da nuu: “Juan
konani yi”, kachi da. Ti tendi'i yivi
un ni ka naa ini i nu ni ka jiniso'o

i jnu'un un. **64** Ti hora un ni kuu
ndoka'an Zacarías, ti ni keja'a
kanajaa da Yandios. **65** Ti taka yivi
kanchuku yajni un, so ni ka naa
ini i jiin jnu'un un, ti jnu'un un
ni jichanuu ni yuku ñuu Judea ja
sia'an ni kuu. **66** Ti taka yivi ka
jiniso'o jnu'un un, ti ni ka keja'a ka
ndo'o ini, ti ka jikajnu'un jna'an:

—¿Nau ja kuu suchi lulu un nu na
kua'nú i nusa? —ni ka kachi i.

Sia'an ni ka ka'an yivi un, chi
jandaa ndixia kuu ja ndito Yandios
suchi lulu un.

Jnu'un vii ni ka'an Zacarías

67 Yukan ti ni chaa Espíritu Santo
siki Zacarías, ti ni ka'an da jnu'un ni
ja'a maa Yandios nuu da, ti ni kachi da:

68 Xaan ga va'a ini maa Jito'yo
Yandios ja ndito ya yivi
nación Israel,
chi ni kinde'e ya nuu yo ja ka
kuu yo yivi ñuu ya, ti ni nama
ya yo'o.

69 Ti ni taji ya iin ja kuñu'nu ja ki
nama yo'o.

Ti ya un kuu jna'an rey
David na jana'an, chaa ni
junukuachi nuu ya.

70 Chi sia'an ni chisojnu'un ya nava ni
ka kachi profeta undi jana'an.

71 Ti nama ya yo'o nuu yivi ka jito
u'u yo'o, jiin nuu taka yivi ka
kiti ini jito yo'o.

72 Ti kunda'u ini ya nuu ñanijna'an
yo na jana'an, ti tu ni naa ini
ya jnu'un kanuu ni ka'an ya.

73 Ja ni chisojnu'un kaji nuu tata
yo Abraham na jana'an,

74 ja kin nama ya yo'o nuu yivi jito
u'u yo'o, ti nava tu yu'u yo ja
kuanukuachi yo nuu ya.

- 75** Kani ndaa kuiti ini yo ja
kunukuachi yo nuu ya ni kivi
na kuchaku yo.
- 76** Ti se'e yiil lulu ri ja'a, nu na
kua'nu i, ti kuu i iin profeta.
Ka'an jnu'un Yandios kancha
andivi, chi koxnuu i ki'in i
nuu Jito'yo.
Ti satu'va i yivi naa i sa na kii
ya.
- 77** Ti ka'an i iin jnu'un nuu yivi
ñuu ya ja nama ya maa i, ti
koo jnu'un ka'nú ini ya nuu
kuachi i.
- 78** Sia'an na koo, chi va'a ini
Yandios yo, ti kunda'u ini ya
yo'o.
Yukan kuu Yandios, ja kancha
andivi, na xna'an ya nuu yo
iin ichi va'a ja kuu taka kivi
kuxian yo.
- 79** Sa'a ya ja na kujnuni ini yivi,
ti nakuni ga i jnu'un ya, ja
kua'an i ichi ñuñaa nuu ñuji'i.
Ti kunda'a ya yo'o nuu iin ichi
va'a nuu koo ndee koo sií ini
yo, ja na kukuee kunchaa yo.
Ni kachi Zacarías.
- 80** Ni ja'nu suchi lulu un, ti ni
yixia ini jnuni i jiin jnu'un ya. Ti
yukan ni kunchaa i nuu ñu'un te'e
un undi ni jaa kivi ni ka natu'va
yivi Israel nuu i.

Ni kaku Jesús
(Mt. 1.18-25)

2 Na kuiya un ni ta'u rey
Augusto jniñu nuu taká nación
ja yinda'a ñuu Roma, ti ni jachanuu
da jnu'un nuu ni tu'u nación nuu
yinda'a da un, ja na ndoko iin
censo nuu ndututu ndi'i vii kuiti
sivi yivi naa i. **2** Ti Cirenio ni kuu

gobernador nuu ñuu Siria na ni ka
nastutu da sivi yivi naa i. Yukan ni
kuu iin censo undi nuu kuiti. **3** Ti
tendi'i yivi ni ka nandeokuñi i nani
ñuu i, ja na chiso i sivi i un.

4 Ni kee José ñuu Nazaret, iin
ndañuu Galilea, ti kuano'on da ichi
ñuu Judea undi ñuu Belén nuu ni
kaku rey David na jana'an, chi José
ni kuu da jna'an David. **5** Ni jan chiso
da sivi da jiin María, chi ja ni nanda'a
da jiin ña, ti ja nchaa ku'u ña. **6** Ti ni
kuu ja, ja ka'lín da ñuu Belén, ti ni jaa
kivi ja kaku se'e María. **7** Yukan ni iyo
iin suchi núú nuu ña, ti ni kuu i suchi
yiil. Yukan ni nasuku ña i sa'ma vita,
ti ni skatuu ña i ini iin nundoo nuu ka
yaji kití un, chi tukaa ga nuña mesón
nuu kendo.

Ni kenda iin ángel Yandios
nuu chaa ka ndito rii

8 Ti yajni ñuu Belén ka'iin uu chaa
ka ndito rii undi yuku un jakuaa kivi
un. **9** Ti sana ini da naa da, ti ni kenda
iin ángel maa Jito'yo Yandios, ti
nduva maa Jito'yo ni janducha ni nuu
ka'iin da un, ti ni ka yu'u da. **10** Ko ni
kachi ángel un jiin da naa da:

—Koto yu'u ra naa ra, chi ve kachi
ri iin jnu'un va'a nuu ra naa ra, ti
jiin jnu'un un na kusii xaan ini
yivi naa i. **11** Ti ja'a kuu iin jnu'un
va'a, chi undi ñuu David ni kaku
ya kii nama ro'o vijnna naa ra, ti
Cristo maa Jito'yo kuu ya. **12** Ti jiin
seña ja'a kuni ndaa ra ja sia'an iyo,
nanil'in ra suchi lulu un suku i jiin
sa'ma vita, ti katuu i ini iin nundoo
nuu ka yaji kití —ni kachi ángel.

13 Sanaa ni ti ni kenda kua'a xaan
ga ángel nuu andivi, ka kanajaa i
Yandios, ti ka ka'an i:

14—¡Na nakanajaa yo maa Yandios ja kancha ya nuu sukun! Ti vijna na ndusii ini taka yivi ñuyivi, chi ni ndunda'u ini ya nuu i naa i —ni ka kachi ángel un.

15 Yukan na ti nu kuan nukoyo ángel un ichi andivi, ti ni keja'a ka ndajnu'un chaa ka ndito riñ un:

—Na cho'o naa yo undi ñuu Belén, na cho'o nde'e nau ja kuu ja ni kasjnu'un maa Jito'yo nuu yo —kachi da naa da.

16 Ti ni ka kekoyo da kua'an da, ni ka nani'in da nuu kancha María jiin José jiin suchi lulu un ja katuu i ini nundoo kití un. **17** Nu ni ka jini da nuu suchi lulu un, ni ka jani da jnu'un nava ni kachi ángel un nuu da siki suchi lulu un. **18** Ti taka yivi ni ka jiniso'o jnu'un ni ka ka'an chaa ka ndito riñ un, so ni ka naa ini i. **19** Ko María ni chu'un ini ña taka jnu'un un, ti ndo'o xaan ini ña siki jnu'un un. **20** Ti ni ka nandeokuñi chaa ka ndito riñ un kuankoyo da, ka nakanajaa da Yandios ti ka ka'an da:

—¡Xaan ga ka'nú jniñ sa'a maa Yandios, ja ni kundaa taka ja ni ka jiniso'o yo, jiin ja ni ka jini yo! —ni ka kachi da.

Ni ka yinda'a da Jesús nuu Yandios ini veñu'un Israel

21 Nu una kivi ja ni kaku suchi lulu un, ni ka ndututu da, ti ni ka sa'a da iin seña yiki kuñu i, ti ni ka skonani da i Jesús, nava ni kachi ángel un nuu María, na ti jaku'un ga se'e ña. **22** Nu ni jinu kivi ja kin siuku ña jnu'un ja na ndundoo ña nuu Yandios nava jnu'un ka'an ley, ja ni ja'a Yandios nuu Moisés. Ti ni

ka ja'an María jiin José jiin suchi lulu un undi ñuu Jerusalén ja na kotonchaa Jito'yo Yandios maa i. **23** Sia'an ni ka sa'a da, vanuxia sia'an ni ta'u Jito'yo Yandios jniñ nuu ley Moisés ja taka suchi yií kaku, ti nu ka kuu i suchi nútú, na nakua'a da i nuu maa Jito'yo Yandios. **24** Ni ka ja'an soko da ja kuu nuu Yandios nava jnu'un ka'an maa ley Jito'yo Yandios, ja na soko da uu ndivi xi uu sata, kachi tutu.

25 Ti kuiya un ni iyo iin chaa ni nani Simeón ñuu Jerusalén, ti ni kuu da iin chaa yiñu'un, ja ni nchañu'un da Yandios. Ti ñukuu ini da ja kii maa Jito'yo ja kii nama ya nación Israel. Ti maa Simeón, jika Espíritu Santo jiin da. **26** Ja yukan kuu ja ni jini jnuni da ja tu kuu yachi da undi nu tu kuni da nuu Cristo, ja taji maa Jito'yo Yandios ja na sa'a ya jniñ ña'nu. **27** Maa Espíritu Santo ni yinda'a chaa un kua'an da nuu veñu'un ka'nú Israel un. Ti nu ni jakoyo María jiin José jiin suchi lulu un ja nani i Jesús, ti ni ka yinda'a da i nuu veñu'un ka'nú un ja na siuku da jiin i nava jnu'un ka'an ley Moisés. **28** Ti ni ki'in Simeón suchi lulu un, ni nunchaa da i nuu nda'a da, ti ni kanajaa da Yandios, ti ni kachi da:

29 Jito'yo, vijna na ti sia ni saña, na kuñ na va'a na, chi ja ni siuku ni jnu'un ni chisojnu'un ni nuu saña ja kuu na muzu ni.

30 Ti ni jini na jiin nuu na nuu ya, kii nama ya siki yivi naa i,

31 ja ni taji ni nuu taka yivi ñuyivi.

32 Maa ya kuu nanu iin nduva ja kivi ini yivi taka nación ja na jnuu ini i.

Ti sa'a ya ja na nduña'nu yivi
maa nación Israel.
Kachi Simeón.

³³José jiin nana Jesús, so ni ka naa ini da ja sia'an ni ka'an Simeón siki suchi lulu un. ³⁴Yukan na ti ni jikanta'u Simeón nuu Yandios ja kuu maa da naa da jiin suchi lulu un, ti ni kachi da jiin María, nana Jesús:

—Ja ni nakaji Yandios suchi lulu ja'a vaji i nava na kandixia kua'a yivi nación Israel, ti nanita'u i. Ti sava ga yivi tu kandixia, jna'nu ndatu i. Ti maa ya kuu ja ka'an jnu'un Yandios, ko kua'a yivi tu kuanta'u jnu'un ka'an ya. ³⁵Ti maa ya sa'a ja na ndundijin taka ja ka ndo'o ini aňu taka yivi naa i. Ti ja kuu maa ra jatu yeni'ni ini aňu ra, ja na'nu xaan ra i, ja nanu ja'ncha yuchi ini ra —ni kachi Simeón.

³⁶Ti yukan kande iin ña'an junukuachi yux'e'veñu'un ka'nu un, ja suni ka'an ña jnu'un Yandios. Nani ña Ana. Yii ña ni nani Fanuel, ti kuu ña jna'an Aser, chaa ni ka xnukoo ñuu Israel na jana'an. Ti ja ni ja'nu xaan ña. Ni suchi xaan ña ni nanda'a ña, ti ni kuncha ña uxia kuiya jiin yii ña, ³⁷ti ni kendo nda'u ña ja undi vijna kuu ña ña'l'an maa un nuu kuun xiko kuun kuiya. Ti tu kuxio ña nuu yux'e'veñu'un ka'nu un ja junukuachi ña nuu Jito'yo kuu nduu kuu ñuu, kendo ndicha ini ña, ti jikanta'u ña nuu Yandios. ³⁸Ti maa hora ka'iin María jiin José un ni kenda ña ni tu'va ña nuu da naa da, ti ni nakuanta'u ña nuu Yandios. Ti ni keja'a ña ni ka'an ña siki Jesús lulu nuu taka yivi ka'iin ini veñu'un un, ja ka ñukuu ini i ja kii maa ya kii nama ya siki Jerusalén.

Ni ka nandeokuñi da ñuu Nazaret

³⁹Nu ni ndi'i ni ka siuku da taka jniñu ta'u ley maa Jito'yo Yandios, ti ni ka nandeokuñi da kuan nukoyo da ñuu da Nazaret ja kuu iin ndaňuu Galilea. ⁴⁰Ti kuan kua'nú ndendajnu ga Jesús, ti kuan kuu ndichi xaan inijnuni i, chi maa Yandios ni chindee chituu ya maa i.

Ni kendo Jesús ini
veñu'un ka'nu Israel

⁴¹Na kuiya yukan chi taka kuiya ka ja'an tata i jiin nana i undi Jerusalén, ja kuu viko pascua nación Israel. ⁴²Ti nu ja iyo uxi uu kuiya Jesús, ti kuankoyo taka da ñuu Jerusalén, chi sia'an ni ka ja'an da taka kuiya ja kuu viko un. ⁴³Ti nu ni ya'a viko un, ni ka nandeokuñi da kuan nukoyo da. Ti Jesús ni kendo i undi Jerusalén, ko tu ni ka jini José jiin María ja ni kendo i. ⁴⁴Ti ka ndo'o ini da ja kua'an Jesús ma'ñu yivi kua'a un, ti sia'an ni ka jika da nchakanchaa iin kivi. Ti sa ni ka nanduku da i ma'ñu taka jna'an da jiin ma'ñu yivi kuankoyo un, ⁴⁵ko tu ni ka nani'in da i. Yukan na ti ni ka nandeokuñi da undi ñuu Jerusalén, ja ka nanduku da i yukan. ⁴⁶Nu uni kivi sa ni ka nani'in da i ini veñu'un ka'nu Israel un, nukoo i ma'ñu chaa ka xna'an ley un, ñuso'o i jnu'un ka ka'an da, ti xndichi i chaa un jiin jnu'un ka ka'an da un. ⁴⁷Ti taka ja ka ñuso'o jnu'un ka'an i, so ni ka naa ini ja ndichi xaan ka'an i, ti va'a xaan naxndeokani i jnu'un un nuu da naa da. ⁴⁸Ti nu ni jini tata i jiin nana i nuu i ja yukan kancha i,

ti so ni ka naa ini da ni ka nde'e da nuu i ja nukoo i yukan. Ti ni kachi nana i jiin i:

—Nda'u se'e ri. ¿Ndoo ni sa'a ra sia'an jiin ri? Ru'u jiin tata ra ka ndi'i xaan ini ri ka nanduku ri ro'o —ni kachi ña.

49 Yukan na ti ni kachi Jesús:

—¿Ndoo ka nanduku ni saña naa ni? ¿Xi tu ka jini ni ja kanuu ga ja na kunchaa na ini ve'e ii Tata na Yandios nu? —kachi i.

50 Ko maa da, tu ni ka chaku ini da ndoo kuu ja ni kendo i yukan.

51 Yukan na ti kuano'on i jiin da naa da ichi ñuu Nazaret, ti maa i ni siin i jandatu i nuu da naa da. Ti María ni chu'un ini ña taka jnu'un un, ti ndo'o xaan ini ña siki jnu'un un.

52 Yukan ti kuan kua'nú ndendajnu ga Jesús, ti kuan kundichi ga xini i. Ti ni ni'lín i ja yiñú'un nuu Yandios jiin nuu yívi naa i, chi maa Yandios ni chindee chituu ya i. Ti sia'an kuan kua'nú ga Jesús.

Ka'an Juan, chaa skuanducha undi nuu ñu'un te'e un

(Mt. 3.1-12; Mr. 1.1-8; Jn. 1.19-28)

3 Nu xia'un kuiya ja ni kenchaa ta'u rey Tiberio jniñu nuu taka nación yínda'a ñuu Roma, ti Poncio Pilato ni kuu gobernador ñuu Judea, Herodes ni kuu gobernador ñuu Galilea, ti ñani da Felipe ni kuu gobernador ñuu Iturea jiin ñuu Traconite, ti Lisanias ni kuu gobernador ñuu Abilinia. **2** Ti sutu ka kuña'nu Israel ni ka kuu Anás jiin Caifás na kuiya un. Ti ni ka'an Yandios jiin Juan, se'e yiíl Zacarías.

Ni ka'an ya jiin da nuu kande da undi nuu ñu'un te'e un. **3** Ti Juan ni jikonuu da taka ñuu ka'iin yajni yucha Jordán, ti ni kachi da nuu yívi ja na nakani ini i, ti na kuanducha i nava na kuanka'nu ini Yandios nuu kuachi i. **4** Ti yukan ni kundaa nava ni chaa Isaías nuu tutu ja kachi sia'an:

Kin ka'an iin chaa,
kin ka'an undi nuu ñu'un te'e
un, ti kachi da:
Kotu'va naa ra, chi ja yajni chaa
Jito'yo.

Ti kuni ja na kaka ndaa ra naa
ra.

5 Na kotu'va yívi naa i, ti taka
xa'va na ndundaa,
ti taka yuku jiin loma na ndu
iin nuu, ti taka ichi yakua na
ndundoo,
ti taka ichi kue'e na nduu iin
nuu. Ti sia'an kuni yo ja na
ndundaa añu yívi nuu ya.

6 Ti taka yívi ñuyívi nakuni i
nasa kii nama Yandios maa i.
Sia'an ni ka'an Juan nava ni chiso
Isaías nuu tutu na jana'an.

7 Ti nu ni ka keja'a ka jakoyo yívi
kua'a nuu Juan ja na skuanducha
da i, ti ni kachi da nuu i:

—Ro'o, ka kuu ra nanu koo. ¿Xi
ka jani ini ra ja nama ra maa ra
nuu iin nundo'o kuan kuyajni nuu
ra naa ra nu? **8** Na kachi ri ja kava
yiñú'un naa ra nava na kuni ndaa
yo ja, ja ni ka nakani ini ra. Ti nava
sia'an na nduu ra nanu iin yujnu
vixi ja ja'a nde'e va'a, chi ka sa'a ra
jniñu va'a. Ti sia'an ka stuu ra maa
ra ja, ja ni ka nakani ndixia ini ra,
ti ni ka xndoo ra kuachi ra. Ti tu
kondo'o vixi ini ra naa ra ja ka'an

ra: "Maa yo naa yo chi ka kuu yo jna'an Abraham na jana'an." Tu ka'an ra sia'an, chi na kachi ri nuu ra ja suni undi yuu ja'a, ti kuu sa'a Yandios ja na kuu i jna'an Abraham.

⁹Ti yivi ja tu ka kuni nakani ini nuu kuachi un, ja iyo tu'va Yandios ja kua'a ya iin nundo'o ja kondo'o i. Ti yukan kuu nanu iin chaa ja iyo tu'va da ja kin sandoo da nuu huerta da, ti ka'ncha da yujnu ja tukaa ja'a nde'e va'a un, ti ki'in nuu ñu'un ja na kayu —ni kachi Juan.

¹⁰Ti ni ka kachi yivi un:

—¿Ti ndoo sa'a na vijna naa na nusa? —ni ka kachi i.

¹¹Ti ni kachi Juan:

—Nu ro'o ka ñava'a uu sa'ma, ti kua'a iin nuu yivi ja tundo ka ñava'a, ti nau ro'o ka iyo ja kaji, ti kua'a nuu yivi ja tundo ka ñava'a —ni kachi Juan.

¹²Suni ni ka ja'an sava chaa ka kinya'u puestu un nuu Juan, ja na skuanducha da chaa, ti ni ka kachi da:

—Maestro, ¿Ti ndoo sa'a saña naa na, nusa? —ni ka kachi da.

¹³Ti ni kachi Juan:

—Kinya'u ndaa naa ra nava ka'an ley, ti koto skaa ya'u ga ra ja kinya'u ra nuu puesto —ni kachi Juan.

¹⁴Ti suni sia'an ni ka jikajnu'un uu soldado un maa da, ti ni ka kachi:

—¿Ti saña, ndoo sa'a na nusa? —ni ka kachi da.

Ti ni kachi tuku Juan:

—Koto ma kuisonchaa ra ni iin ndajniñu yivi naa i ja siu'u ra i, xi ja na chakuachi ra i nu tundo ka sa'a i. So nini kuu ja na kuanta'u ra xu'un ya'u ra ni —ni kachi Juan.

¹⁵Ti yivi kua'a un ka ndo'o ini i ja xi Juan kuu Cristo ja ka ndatu i ja kii un, ¹⁶ko maa Juan ni kachi da nuu yivi kua'a un:

—Jandaa kuu ja ru'u skuanducha ri ro'o naa ra jiin nduchaa, ko vaji iin ja kuña'nu ga ja kuu ru'u, ti maa chaa yukan skuanducha da ro'o naa ra, ti kua'a da Espíritu Santo ja na kunchaa ya jiin ra. Ti sia'an nanu sandoo iin ñu'un nuu kayu, suni sia'an sandoo Espíritu Santo undi ini aña ra naa ra. Ti tu kuu kandu ri nuu da, chi kuña'nu ga da ja kuu ru'u. ¹⁷Ti chaa un xndichi da yivi nanu iin chaa ja ja yijni tu'va da pala da ja xndeche da triu da, ti kenso da paja ki'in ti sava'a da triu da ini ve'e, ti ka'ma da paja un. Ko chaa un, chi kua'a da nundo'o nuu yivi jiin iin ñu'un ja tu nda'va kuiti —ni kachi Juan.

¹⁸Ti jnu'un ja'a jiin tijni ga jnu'un ni xndaku Juan, ti ni ka'an da jnu'un Yandios nuu yivi naa i.

¹⁹Suni ni kachi Juan nuu Herodes ja tu iyo va'a iin jniñu sa'a da. Chi Herodes kuu da gobernador, ti ni jaka da Herodías, ñasi'i ñani da Felipe, ja na kunchaa ña jiin da. Ti suni ni ka'an da ja tijni ga jniñu kue'e sa'a da. ²⁰Ko Herodes, tu ni jandatu da jnu'un ni ka'an Juan, chi su'va vi'i ga ni sa'a ndeva'a da ja ni chunde da Juan vekaa.

Ja ni janducha Jesús

(Mt. 3.13-17; Mr. 1.9-11)

²¹Na ti kiví ga Juan vekaa, ni kunde da ni skuanducha da yivi, ti suni ni skuanducha da Jesús. Ti hora ni skuanducha da Jesús ni jikanta'u ya nuu Yandios, ti ni nuña

ni andiví nuu kancha Yandios,²² ti ni kuun Espíritu Santo, ti ni jinu xini ya, ti kaa nanu iin sata. Yukan ti ichi andiví ni ka'an Yandios jiin Jesús:

—Ro'o kuu Se'e ri ja kunda'u xaan ini ri, ti kusii xaan ini ri jiin ra —kachi.

**Nava ni kii taka jna'an Cristo Jesús
undi jana'an**

(Mt. 1.1-17)

²³Na ni keja'a Jesús undi nuu kuiti jiin jniñu ni tatu Yandios nuu ya, ja iin ya yajni oko uxi kuiya. Ti ka jani ini yívi ja ni kuu ya se'e yíi José. Ti jna'an José ni kuu se'e yíi Elí,²⁴ ti Elí ni kuu se'e Matat, ti Matat ni kuu se'e Leví, ti Leví ni kuu se'e Melqui, ti Melqui ni kuu se'e Jana, ti Jana ni kuu se'e José,²⁵ ti José ni kuu se'e Matatías, ti Matatías ni kuu se'e Amós, ti Amós ni kuu se'e Nahum, ti Nahum ni kuu se'e Esli, ti Esli ni kuu se'e Nagai,²⁶ ti Nagai ni kuu se'e Maat, ti Maat ni kuu se'e Matatías, ti Matatías ni kuu se'e Semei, ti Semei ni kuu se'e José, ti José ni kuu se'e Judá,²⁷ ti Judá ni kuu se'e Joana, ti Joana ni kuu se'e Resa, ti Resa ni kuu se'e Zorobabel, ti Zorobabel ni kuu se'e Salatiel, ti Salatiel ni kuu se'e Neri,²⁸ ti Neri ni kuu se'e Melqui, ti Melqui ni kuu se'e Adi, ti Adi ni kuu se'e Cosam, ti Cosam ni kuu se'e Elmodam, ti Elmodam ni kuu se'e Er,²⁹ ti Er ni kuu se'e Josué, ti Josué ni kuu se'e Eliezer, ti Eliezer ni kuu se'e Joram, ti Joram ni kuu se'e Matat,³⁰ ti Matat ni kuu se'e Leví, ti Leví ni kuu se'e Simeón, ti Simeón ni kuu se'e Judá,

ti Judá ni kuu se'e José, ti José ni kuu se'e Jonán, ti Jonán ni kuu se'e Eliaquim,³¹ ti Eliaquim ni kuu se'e Melea, ti Melea ni kuu se'e Mainán, ti Mainán ni kuu se'e Matata, ti Matata ni kuu se'e Natán,³² ti Natán ni kuu se'e David, ti David ni kuu se'e Isai, ti Isai ni kuu se'e Obed, ti Obed ni kuu se'e Booz, ti Booz ni kuu se'e Salmón, ti Salmón ni kuu se'e Naasón,³³ ti Naasón ni kuu se'e Aminadab, ti Aminadab ni kuu se'e Aram, ti Aram ni kuu se'e Esrom, ti Esrom ni kuu se'e Fares, ti Fares ni kuu se'e Judá,³⁴ ti Judá ni kuu se'e Jacob, ti Jacob ni kuu se'e Isaac, ti Isaac ni kuu se'e Abraham, ti Abraham ni kuu se'e Taré, ti Taré ni kuu se'e Nacor,³⁵ ti Nacor ni kuu se'e Serug, ti Serug ni kuu se'e Ragau, ti Ragau ni kuu se'e Peleg, ti Peleg ni kuu se'e Heber, ti Heber ni kuu se'e Sala,³⁶ ti Sala ni kuu se'e Cainán, ti Cainán ni kuu se'e Arfaxad, ti Arfaxad ni kuu se'e Sem, ti Sem ni kuu se'e Noé, ti Noé ni kuu se'e Lamec,³⁷ ti Lamec ni kuu se'e Matusalén, ti Matusalén ni kuu se'e Enoc, ti Enoc ni kuu se'e Jared, ti Jared ni kuu se'e Majalaleel, ti Majalaleel ni kuu se'e Cainán,³⁸ ti Cainán ni kuu se'e Enós, ti Enós ni kuu se'e Set, ti Set ni kuu se'e Adán, ti Adán ni kuu se'e Yandios, chi maa ya ni sa'a ya maa da.

Kuni kue'e ja'u'u un Jesús

(Mt. 4.1-11; Mr. 1.12-13)

4 Nu ni ni'in Jesús Espíritu Santo ja ni kukutu ini ya jiin, na ni kee ya ini yucha Jordán, ti maa Espíritu Santo ni yında'a ya undi nuu ñu'un te'e un.² Yukan ni

kuncha ya uu xiko kivi, ti ja'u'u un kuni ke'e ya. Ti ni kivi un, tu ni yee kuiti ya staa. Ti nu ni ya'a kivi un, ti ni chaa soko ini ya.³ Yukan na ti ni kachi ja'u'u un jiin ya:

—Nu ndixia ra ja Se'e Yandios kuu ra, ti sa'a ja taka yuu ja'a na nduu staa kaji yo —kachi ja'u'u un.

⁴Ti ni kachi Jesús:

—Su'va yoso nuu tutu Yandios ja ansu jiin nini staa kuchaku yivi naa i —ni kachi ya.

⁵ Yukan na ti ni yinda'a ja'u'u un maa ya undi xini yuku sukun un. Ti yukan iin jinu kuiti ni ni xna'an nuu ya taka ñuu ka'iin nuu nii ka'nú ñuyivi,⁶ ti ni kachi ja'u'u jiin ya:

—Kua'a ri iin jniñu nuu ra ti ta'u ra jniñu nuu taka ñuu un, chi vee xaan kanda, chi maa ri kuu ja xiin un. Ti kuu kua'a ri nuu ra, nuu nau ja kuu ini maa ri.⁷ Nusa ti jakunjiti ra nuu ri, ti chiñu'un ra ru'u, ti maa ri na kua'a ndi'i taka un nuu ra —ni kachi.

⁸Ko ni kachi Jesús:

—Kuxio nuu ri ro'o ja'u'u, chi su'va kachi nuu tutu Yandios: “Chiñu'un nuu maa Jito'o ra Yandios, ti nuu maa iin ni ya kunukuachi ra”, kachi tutu —ni kachi Jesús.

⁹ Yukan na ti ni yinda'a tuku ja'u'u un ya undi ñuu Jerusalén, ti ni skaa ya xini veñu'un ka'nú un, ti ni kachi:

—Nu ndixia ra ja kuu ra Se'e Yandios, ti skanakava maa ra undi nuu ñu'un,¹⁰ chi sia'an yoso nuu tutu Yandios:

Ta'u Yandios jniñu nuu ángel ya ja na koto ya ro'o.

¹¹ Ti na kinda'a ya ro'o nava tu stuji ra si'lin ra nuu ni iin yuu —ni kachi ja'u'u un.

¹²Ti ni kachi Jesús:
—Tuu, chi su'va yoso nuu tutu Yandios: “Koto ma xna'an ga ra nuu maa jito'o ra Yandios” —kachi ya.

¹³ Ja yukan ti tukaa ga ni kojnuni ini ja'u'u un nasa sa'a jiin Jesús, ti ni kuxio kua'an jaku kivi.

Ni keja'a Jesús jiin jniñu ya nuu ñuu Galilea

¹⁴ Yukan ti ni nandeokuñi Jesús ichi ñuu Galilea, chi sia'an ni yinda'a Espíritu Santo maa ya. Ti ni ndañuu ja yi'i jiin Galilea, yukan ni jichanuu jnu'un ya.¹⁵ Ti xna'an ya jnu'un Yandios ini veñu'un Israel taka nuu ka ndututu, ti tendi'i yivi nuu un ni ka jajnu'un i ya.

Kuano'on ya ñuu Nazaret

(Mt. 13.53-58; Mr. 6.1-6)

¹⁶ Yukan ti ni nandeokuñi ya ñuu Nazaret nuu ni ja'nú ya. Ti iin kivi ndetatu ni kivi ya ini veñu'un un nava jini sa'a ya. Ti ni ndokuiñi ya ja na ka'u ya tutu Yandios.¹⁷ Ti ni ka ja'a da tutu ni chaa profeta Isaías nuu ya. Ni jiña ya tutu un, ti ni nani'in ya nuu yoso sia'an, ti ni ka'u ya:

¹⁸ Maa Espíritu Jito'yó Yandios kancha jiin ri. Yukan ni ja'a ya jniñu nuu ri ja xndaku ri nuu yivi nda'u, ja ka'an ri ja kunda'u ndixia ini ya nuu i naa i.

Ni taji ya ru'u ja na kua'a ri jnu'un ndee ini nuu yivi ka kukui'ya ini,

ja na ka'an ri iin jnu'un va'a nuu
yivi ka yindi'yu nuu kuachi,
nava na keta'u i.

Sa'a ri ja na kujnuni ini yivi tu
ka jnuu ini.

Suni ja na nama ri yivi ni ka
skexiko yivi maa i.

19 Ti suni ja na kachi ri ja, ja ni jaa
kuiya nu ni ndunda'u ini

Jito'yo Yandios nuu yivi naa i.

Kachi tutu ja ni ka'u ya.

20 Ni nakasi Jesùs tutu un, ti ni
nakua'a ya nuu chaa junukuachi
ini veñu'un un, ti ni nukoo ya.
Ko vanuxia tendi'i yivi ka'l'in ini
veñu'un un ka nde'e nuu ya, **21** ti ni
jakunchaa ya ni ka'an ya:

—Vijna na ti ni kundaa nava yoso
nuu tutu Yandios ja ni ka jiniso'o ra
—ni kachi ya.

22 Tendi'i yivi un ni ka jajnu'un i
Jesùs, ti so ka naa ini i ja vii xaan
ka'an ya jiin i, ti ka jikajnu'un
jna'an i:

—¿Ti ansu se'e José kuu chaa ja'a
nu? —ni ka kachi i.

23 Ti ni kachi Jesùs jiin yivi un:

—Ja jini va'a ri nava ka ndo'o
ini ra, ti suni ka ka'an ra jnu'un
ja'a jiin ri: “Nu ndixia ni ja kuu
ni médico, sa'a ni tajna ti sa na
kandixia na naa na maa ni.” Ti
suni kachi ra jiin ri: “Jnu'un ni
ka jiniso'o na, ja ni sa'a ni ñuu
Capernaum, sa'a ni suni ñuu maa ni
ja'a” —ni kachi ya jiin i.

24 Yukan na ti ni siin Jesùs ka'an
ya, ti ni kachi ya:

—Jandaa na kachi ri nuu ra naa
ra ja ni iin profeta ka'an jnu'un
Yandios, tu ka janta'u yivi ñuu da
maa da. **25** Chi jandaa kuu ja ni ka
iyo kua'a ña'an ni ka kendo nda'u

nación Israel undi jana'an na ni kii
profeta Elías, na ni kii jnama xaan
ini niñi nación un, ja uni kuiya sava
tukaa ga ni kuun sau. **26** Ko Elías tu
ni ja'an da nuu kanchuku ña'an ni
ka kendo nda'u ñuu Israel, chi ni
ja'an da nuu kancha iin vajnu'un
ni ña'an ni kendo maa iin ñaa nuu
ñuu Sarepta, yajni ñuu Sidón, iin
ñuu ja tu ni yi'i jiin Israel. **27** Suni
ñuu Israel ni ka iyo kua'a yivi ni
ka ku'u jiin ndi'i te'yu na ni kii
profeta Eliseo, ko tu ni ka nduva'a
ni iin yivi ka ku'u un, chi maa iin
ni Naamán ni nduva'a, ja ni kuu da
chaa ñuu Siria, iin ñuu ja tu ni yi'i
jiin ñuu Israel —ni kachi Jesùs.

28 Nu ni ka jiniso'o yivi jnu'un ni
ka'an ya, ti tendi'i yivi ka'l'in ini
veñu'un un, ni ka kití xaan ini nuu
ya. **29** Ti ni ka ndonda yivi un siki
ya ja ni ka keni'in da Jesùs undi
fuera yu'u ñuu un. Ti kuankoyo da
jiin ya undi yu'u yuku un ja ka kuni
skanakava da yaa kava un. **30** Ko
Jesùs ni naya'a ya ma'ñu da naa da,
ti kua'an ya.

Iin chaa ni jna'an tachi xaan

(Mr. 1.21-28)

31 Yukan na ti kua'an Jesùs ñuu
Capernaum, iin ndañuu Galilea.
Yukan ni ja'a kunchaa ya ni xna'an
ya nuu yivi un iin kivi ndetatu. **32** Ti
so ka naa ini yivi un ka ñuso'o i
jnu'un ka'an ya, chi ka'an ya jnu'un
ndaa kuiti nanu ka'an iin chaa
ndiso jniñu nuu Yandios.

33 Ti ini veñu'un un kande iin
chaa jna'an tachi xaan, ja ni
kanajin ko'o, ti ni kachi da:

34 —Kuxio ni nuu na naa na, ni'in
Jesùs, chaa ñuu Nazaret. ¿Ndoo kivi

nduu ni jiin na, xi vaji ni ja xnaa ni saña nu? Ja nakuni na ni'l'in, ti jini na ja maa ni kuu se'e ii Yandios — ni kachi da.

35Ti Jesús ni nduxaan ya nuu tachi xaan un, ti ni kachi ya:
—Kası yu'u ti xndoo chaa ja'a —ni kachi ya.

Yukan na ti tachi xaan un ni sa'a ja na kuikokava chaa un nuu yivi un, ti ni kee kua'an. Ti tundo ni sa'a jiin chaa un. **36**Ti so ni ka sa'u ini yivi un ja so ka naa ini i ka nde'e i, ti ka jikajnu'un jna'an i:

—¿Naa jnu'un kuu ja'a ja sia'an ni kuu? Kuña'nu chaa ja'a ja ta'u da jniñu nuu tachi xaan un, ti ka jandatu nuu da, ti ka kekoyo kua'an —kachi i naa i.

37Ti jnu'un Jesús ni jichanuu takaa nuu ñuu Galilea yukan.

Ni sa'a Jesús tajna nana chiso Simón Pedro

(Mt. 8.14-15; Mr. 1.29-31)

38Yukan na ti ni kee Jesús ini veñu'un un ti kua'an ya ichi ve'e Simón. Ni kivi ya ve'e da. Ti ini ve'e Simón kancha nana chiso da ku'u ña jiin kue'e kiji xaan. Ti ni kakanda'u da jiin Jesús ja na sa'a ya tajna ña. **39**Ni jankudandijin Jesús, ti ni kachi ya ja na kee kiji un, ti ni kenchaa ni kiji un kua'an. Ti ni ndoko ni ña, ti ni keja'a satu'va ña ja ni yaji ya jiin da naa da.

Kua'a yivi ka ku'u ni sa'a ya tajna

(Mt. 8.16-17; Mr. 1.32-34)

40Nu kuan kee ndikandii, ti taka yivi ka ñava'a yivi ku'u, ja ka jna'an i tijni nuu kue'e, ni ka yinda'a i yivi un nuu Jesús, ti Jesús ni chaa ya

nda'a ya siki iin iin yivi un, ti ni ka nduva'a i. **41**Ti ma'ñu tendi'i yivi ku'u un, ka iyo yivi ka jna'an tachi xaan, ko ni keni'in ya kuankoyo. Ti nu ni ka kekoyo kua'an, ka kanajiin ti ka ka'an:

—Ro'o kuu Se'e Yandios —kachi.

Ko Jesús ni nduxaan ya jiin tachi xaan un ja tukaa ni ja'a ya jnu'un ja ka'an, chi ja ka jini ja maa ya kuu Cristo, ja ni taji Yandios ja ndiso ya jniñu ña'nu.

Ni xna'an Jesús jnu'un Yandios ñuu Galilea

(Mr. 1.35-39)

42Nu ni kundijin inga kivi, ti ni kee maa iin ni Jesús kua'an ya iin yu'u ñuu un nu tukaa yivi. Ko ni ka nanduku yivi un ya naa i, ti ni ka naniñin i nuu kande ya. Tu ka kuni i ja ki'in tukuu ya, **43**ko ni kachi ya jiin yi:

—Kanuu kuu ja ki'in ri uu ga ñuu un suni, ja na ka'an ri ti na xndaku va'a ri nasa kuu kivi yivi nda'a Yandios ja na ta'u ya jniñu nuu i, chi siki yukan ni taji Yandios ru'u vaji ri —ni kachi Jesús.

44Ti sia'an ni jikonuu Jesús ni ka'an ya jnu'un Yandios nuu takaa veñu'un Israel ka iyo ñuu Galilea un.

Ja ni ka ni'in kua'a da cháká

(Mt. 4.18-22; Mr. 1.16-20)

5Ti iin kivi kande Jesús yu'u lago Genesaret. Ti ni ka kututu yivi kua'a xaan nuu ya ja undi ka jaxin jna'an i, ja ka kuni kunso'o i jnu'un Yandios. **2**Ti ni jini ya ja ka'iin uu barco yajni yuu lago un, chi chaa ka jniñi cháká un, ni ka

kee da ka nakacha da ñunu da. ³Ti ni kívi Jesúś ini iin barco ja xiin Simón, ti ni ka'an ya jiin Simón ja na skaka da iin tí'lí barco un na ki'in nuu nducha un. Yukan na ti ni nukoo ya nuu barco un, ti undi nuu barco un ni xndaku ya nuu yívi naa i. ⁴Nu ni ndí'i ni xndaku ya nuu yívi un, ti ni kachi ya jiin Simón:

—Kua'an jiin barco ja'a undi nuu kunú ga nducha un, ti skuita ka'nu ra ñunu ra naa ra chii nducha un, ti ni'in kua'a ra cháká —ni kachi ya.

⁵Ti ni kachi Simón:

—Maestro, ni niñu ni ka sajniñu na, ko ni iin cháká tu ni ka ni'in na. Ko ja kachi maa ni kuu, ti na skuita ka'nu na ñunu na nusa —kachi da.

⁶Ko nu ni ka sa'a da nava ni kachi Jesúś, ti ni ka ni'in da kua'a xaan cháká ja ni keja'te te'nde ñunu da un. ⁷Ti ni ka sa'a da seña nuu uu ga chaa ka'iin nuu ingle barco da, ja na kin chindée da maa da. Ni ka chindée jna'an da ti ni ka skutu da cháká nuu ndinduu barco un, ja kuni keka'nu ni ga chii nducha un. ⁸Nu ni jini Simón Pedro ja sia'an ni kuu, ni jakunjiti da nuu Jesúś, ti ni kachi da:

—Va'a ga kuxio ni nuu na Jito'yo, chi kuu na iin chaa nchakuachi —ni kachi da.

⁹Chi Simón jiin uu ga chaa ka'iin jiin da un, so ni ka sa'u ini da ja ni ka ni'in kua'a da cháká ni sa'a ya. ¹⁰Suni Jacobo jiin Juan, se'e yii Zebedeo, ja suni ka'iin da jiin Simón yukan. Suni so ni ka sa'u ini da. Ko ni kachi Jesúś jiin Simón:

—Koto ma xndí'i ini ra, chi undi vijna ti tukaa ga jnií ra cháká, chi ru'u na xna'an ri nuu ra nasa

nastutu ra yívi, ti xna'an ra yívi un maa jnu'un Yandios ja na kandixia i ru'u —ni kachi Jesúś.

¹¹Yukan na ti nu ni ka tava da barco un nuu ñu'un ichi, ti ni ka xndoo ndí'i kuiti da ndajniñu un, ti kuankoyo da jiin Jesúś.

**Ni sa'a Jesúś tajna iin chaa jna'an
kue'e ndí'yí te'yú**

(Mt. 8.1-4; Mr. 1.40-45)

¹²Ti ni kuu ja kande Jesúś iin ñuu un, ti ni jaa iin chaa ku'u kue'e ndí'yí te'yú. Ti nu ni jini da nuu Jesúś, ti ni jankunjiti da nuu ya, ti ni sino da nuu da undi nuu ñu'un, ti ni kanda'u da jiin Jesúś:

—Jito'yo, nu kuni ni, ti kuu sandoo ni saña jiin kue'e jna'an na ja'a—ni kachi da.

¹³Yukan ti Jesúś ni kue'e ya maa da jiin nda'a ya, ti ni kachi ya:

—Kuni ri, na ndundoo ra vijna —ni kachi ya.

Ti nu ni ka'an ya sia'an, ni nduva'a ni chaa ku'u un.

¹⁴Yukan ti ni xndaku ni'in ya nuu da ja tu kani kuiti da jnu'un nuu ni iin yívi. Ko ni kachi ya:

—Kua'an ti ki'in ra nuu sutu kuña'nu un, na nde'e da ro'o ja, ja ni nduva'a ra. Ti kunda'a ja soko ra nuu Yandios siki ja, ja ni ndundoo ra nava ta'u ley Moisés jniñu. Ti na soko sutu un nuu Yandios, nava na kuni yívi ja, ja ni kenchaa ndí'yí un ro'o —ni kachi ya.

¹⁵Ti jnu'un Jesúś, vi'i ga ni jichanuu kua'an ja siki iin jniñu ña'nu ni sa'a ya yukan. Ti ja yukan kuu ja kua'a xaan ga yívi ka kututu ja ka kuni kunso'o i jnu'un ka'an ya, jiin ja na sa'a ya tajna maa i, nuu taká kue'e ka

ndo'o i. ¹⁶Ko tijni jinu kee siin maa ya kua'an ya nuu tukaa yivi, ti yukan jikanta'u ya nuu Yandios.

Ni sa'a Jesús tajna iin chaa tikuku

(Mt. 9.1-8; Mr. 2.1-12)

¹⁷Ti iin kivi kande Jesús xna'an ya nuu yivi naa i, ti ichi chukan kanchuku sava chaa fariseo jiin chaa ka xna'an ley Moisés ja vekoyo da taka ñuu Galilea, jiin ñuu Judea, jiin ñuu Jerusalén. Ti ka nde'e da jniñu sa'a Jesús, ja jiin jniñu ña'nú maa Yandios sa'a ya tajna yivi ku'u naa i. ¹⁸Yukan ti ni ka jakoyo jaku chaa ka yinda'a iin chaa tikuku nuu iin yúú, ti ka kuni skivi da chaa un ini ve'e, ti skatu da chaa nuu Jesús. ¹⁹Ko tu ni kuu kivi da naa da, chi kua'a xaan yivi ka'iin un. Yukan na ti ni ka kaa da xini ve'e, ti ni ka xndonda da teja un, ti ni ka sino da chaa ku'u un jiin yúú da ma'ñu yivi kua'a un nuu kancha Jesús. ²⁰Nu ni jini Jesús ja ni ini da ka kandixia da ja kuu sa'a ya tajna chaa ku'u un, ti ni kachi ya jiin chaa ku'u un:

—Nda'u se'e ri, ja ni janka'nu ini ri nuu kuachi ra —ni kachi ya.

²¹Yukan na ti chaa ka xna'an ley un jiin chaa fariseo un ni keja'a ka ndo'o ini da:

—¿Nau kuu chaa ja'a ja ndo'o ini da ja kuu da Yandios, ti sia'an ka'an ka'an ndeva'a da siki Yandios jiin jnu'un un nusa? Ti tu ni iin ja kuanka'nu ini nuu kuachi yo, chi vajnu'un ni maa Yandios —ni ka ndo'o ini da.

²²Ko Jesús ja ni jini ya ndoo ka ndo'o ini da, ti ni kachi ya:

—¿Ndoo ka ndo'o ini ra sia'an?

²³⁻²⁴Chi na kachi ri ja kuu ri maa

Se'e Yivi Ñuyivi, ti ndiso jniñi ri ja kuan ka'nu ini ri nuu kuachi yivi naa i. Vijna ti na stuu ri iin jniñu sa'a ri ja'a —kachi Jesús.

Yukan na ti ni kachi ya jiin chaa tikuku un:

—Ndoko, nastuu yúú ra, ti kuano'on ve'e ra —ni kachi ya.

²⁵Ti hora ni, ni ndoko chaa tikuku un ma'ñu yivi kua'a un, ni naki'in da yúú nu ni katuu da nuu un, ti kuano'on da ve'e da. Ti ni nakanajaa da Yandios ja ni nduva'a da ni sa'a Jesús. ²⁶Ti tendi'i yivi un so ni ka naa ini i ja sia'an ni sa'a ya. Ti ni ka kanajaa i Yandios, ti ni ka ka'an i:

—Vijna ndixia ti ni ka jini yo iin jniñu ña'nú xaan —kachi naa.

Ni kana Jesús xini Leví

(Mt. 9.9-13; Mr. 2.13-17)

²⁷Yukan na ti ni kee Jesús ti kua'an ya, ti ni jini ya nuu iin chaa kinya'u puesto ja nani Leví, nukoo da nuu kinya'u puestu un, ti ni kachi ya jiin da:

—Ña'an na cho'o, ti kundikun ra ru'u —ni kachi ya.

²⁸Ti ni ndokuiñi Leví, ni xndoo ndikuiti da ja ñava'a da un, ti kua'an da jiin Jesús.

²⁹Yukan na ti ni NASA'a da iin viko ka'nu ve'e da ja kusiiñ ini da jiin Jesús, ti yukan ni ka'iin kua'a chaa ka kinya'u nuu puestu jiin uu ga yivi ni kunchuku jiin da naa da nuu mesa un. ³⁰Ko chaa fariseo jiin chaa ka xna'an ley Moisés, ni ka keja'a ka ka'an nchaa da siki ndaja'a Jesús, ti ni ka kachi da:

—¿Ndoo ka yee ra ka ji'i ra jiin chaa ka kinya'u nuu puestu un, jiin

taka chaa tu ka siuku ley Israel? — ni ka kachi da.

31 Ti ni kachi Jesús:

—Yíví iyo va'a ndendajnu, tu ka nandi'i i médico, chi yíví ku'u kuu ja ka nandi'i tajna un. **32** Ja yukan kuu ja ru'u tu vaji ri ja ka'an ri jnu'un Yandios nuu yíví ka ndo'o ini ja iyo ndoo jiin kuachi. Chi su'va ni nchaa ri ja ka'an ri jnu'un Yandios nuu yíví ka nakuni nuu kuachi i nava nakani ini i nuu Yandios — kachi Jesús.

**Ka jikajnu'un da nuu Jesús siki
jnu'un ja koo ndicha ini**

(Mt. 9.14-17; Mr. 2.18-22)

33 Yukan na ti ni ka jikajnu'un da nuu Jesús:

—¿Ndoo chaa ka skua'a jiin Juan jiin chaa ka skua'a jiin chaa fariseo, nini ka iyo ndicha ini da, ti tijni jinu ka jikanta'u da, ti ndaja'a ni nini ka yee da, ti ka jí'i da? —ni ka kachi da.

34 Ti ni kachi ya jiin da:

—Xi kuu koo ndicha ini yíví ka'iin iin viko nanda'a nu ni kancha novio un jiin yi nu? **35** Ko jaa iin kivi ja kuxio novio nuu i. Yukan na ti sa na koo ndicha ini i. Suni nu kancha ri, tu kuu koo ndicha ini chaa ka skua'a jiin ri. Ko jaa iin kivi nu na kujiyo ri, yukan na sa na koo ndicha ini da naa da —kachi ya.

36 Ti ni kachi ya ja'a nuu da:

—Ni iin yíví tu ka'ncha i iin pedasu sa'ma jaa ti nachaa i nuu iin sa'ma tu'u. Chi nu sia'an na sa'a i, ti stivi i sa'ma jaa un, chi tu kejna'an ja jaa jiin ja tu'u. **37** Ni tu kuu chu'un yo vino jaa chii iin ñii tu'u. Chi nu sia'an na kuu ti xnaa

yo ndinduu. Chi vino jaa un ndata ñii tu'u un. **38** Ja yukan kuu ja na chu'un yo vino jaa chii ñii jaa, chi sia'an ti ni iin tu xnaa yo. **39** Ti ni iin ja ja ni jí'i vino ava ti ko'o tuku vino jaa, chi vanuxia ka ka'an yíví ja nini va'a ga vino ni kuu ava — kachi ya.

**Jniñu ni ka sa'a ndaja'a Jesús iin kivi
ndetatu**

(Mt. 12.1-8; Mr. 2.23-28)

6 Hin kivi ndetatu ni ya'a Jesús iin ndaja'a ya nuu kaa triu. Ti ndaja'a ya kuankoyo da ka kenchaa da yoko triu un, ka kiin da ini nda'a da ti ka yee da. **2** Yukan ti sava chaa fariseo ni ka jikajnu'un da ya:

—¿Ndoo ka sa'a ra jniñu ja tu kusa'a yo iin kivi ndetatu? —ni ka kachi da.

3 Ti ni kachi Jesús jiin da:

—Xi tu ni ka ka'u kuiti ra tutu nasa ni sa'a David na iin jinu ja ni jí'i da soko jiin taka chaa ni kanchuku jiin da nu? **4** Ja ni kivi da ini ve'e ii Yandios, ti ni ki'in da staa stila ii ja ni soko sutu nuu Yandios, ti ni yee da. Ti suni ni ja'a da nuu yíví kanchuku jiin da, ja tu ka'an nuu ley ja tu kuu kaji inga yíví, chi maa ni maa sutu kuu ja yaji staa stila un —ni kachi ya.

5 Suni ni kachi ya jiin da:

—Ti ru'u, maa Se'e Yíví Ñuyíví, kuña'nu ga ri ti ta'u ri jniñu nuu kivi ndetatu ja'a—kachi ya.

Ni nduva'a iin chaa ni ichi nda'a

(Mt. 12.9-14; Mr. 3.1-6)

6 Ti inga kivi ndetatu, ni kivi Jesús ini veñu'un Israel, ti ni xna'an ya nuu yíví naa i. Ti yukan kande

iiin chaa ni ichi nda'a kua'a da. ⁷Ti chaa ka xna'an ley jiin chaa fariseo, ka jito yu'u da Jesús ja nu sa'a ya tajna chaa un nuu kívi ndetatu un, ti sia'an ni'l'in da ichi ja kankuachi da ja'a ya. ⁸Ko maa ya chi ja jini ya ndoo ka ndo'o ini da naa da, ti ni kachi ya jiin chaa ni ichi nda'a un:
—Ndokuiñi ti kundichi ra ma'ñu ja'a—ni kachi ya.

Ni ndokuiñi chaa un ti ni jakuiñi da ma'ñu un. ⁹Yukan na ti ni kachi Jesús jiin taka yivi un:

—Na kajnu'un ri iiin jnu'un nuu ra naa ra: “¿Nau iiin ja iyo va'a ja sa'a yo vijna kívi ndetatu nu? ¿Xi kuu sa'a yo ja va'a, xi va'a ga sa'a ndeva'a yo? ¿Kuu nama yo iiin chaa ku'u un, xi kua'a ini yo na kuū da nu”? —ni kachi ya.

¹⁰Ti ni nde'e va'a Jesús nuu tendi'i yivi un, ti ni kachi ya jiin chaa ku'u un:

—Skaa nda'a ra —ni kachi ya.

Ti chaa un ni skaa da nda'a da, ti hora ni, ni nduva'a nda'a da. ¹¹Ko sava yivi ka'iin un, ni ka kuiti xaan ini ja sia'an ni kuu, ti ni ka keja'a ka ndajnu'un nasa sa'a da ndonda da siki Jesús.

Ni nakaji Jesús ndi uxi uu chaa kuu ndaja'a ya

(Mt. 10.1-4; Mr. 3.13-19)

¹²Ni kuu jaku kívi kua'an Jesús undi yuku un ja kakanta'u ya, ti yukan ni kendo ya ni niñu ni jikanta'u ya nuu Yandios. ¹³Nu ni kundijin inga kívi ti ni kana ya chaa ka skua'a jiin ya, ti ni nakaji ya ndi uxi uu da, ja ni skonani ya da apóstol, chi kundiso jniñu da ja na ka'an da jnu'un ya. ¹⁴Ti chaa un

ka kuu Simón ja ni skonani ya da Pedro, jiin ñani da Andrés; Jacobo jiin Juan; Felipe jiin Bartolomé; ¹⁵Mateo jiin Tomás; Jacobo, se'e yii Alfeo; Simón, chaa ni yi'i jiin partido cananista; ¹⁶Judas, se'e yii Jacobo; jiin inga Judas, iiin chaa ñuu Cariote ja kuee ga ti ni nakua'a da Jesús nuu yivi jito u'u da.

Xna'an ya jnu'un Yandios nuu yivi kua'a

(Mt. 4.23-25)

¹⁷Yukan na ti ni nūñu Jesús xini yuku un jiin ndaja'a ya, ti ni jakuiñi ya iiin ndu'va. Ti kua'a xaan yivi ndañuu Judea, yivi ñuu Jerusalén jiin yivi vekoyo ichi yu'u mar Tiro jiin Sidón, ni ka kututu un ja ve kunso'o jnu'un xna'an Jesús, jiin suni ja na nduva'a i jiin kue'e ka ndo'o i. ¹⁸Ti yivi ka ndo'o tachi xaan suni ni ka nduva'a i. ¹⁹Ti tendi'i yivi un ka kuni kue'e i sa'ma Jesús, chi jiin jniñu ndiso ya un sa'a ya tajna tendi'i yivi.

Yivi kundatū jiin yivi koo ndo'o

²⁰Yukan na ti ni nde'e va'a Jesús nuu ndaja'a ya ti ni kachi ya:

—Na kachi ri ja kandichi Yandios jiin ro'o yivi nda'u, chi jandaa kuu ja kívi ra ñuu nuu ta'u ya jniñu.

²¹Kandichi Yandios jiin ro'o ja ka ji'i soko vijna naa ra, chi jaa kívi ja kee ndendajnu ra naa ra. Kandichi Yandios jiin ro'o ja vijna ka iyo ra jnukui'ya ini, chi inga kívi ti kusii ini ra, ti kuaku ra naa ra. ²²Kandichi Yandios jiin ra naa ra, chi koto u'u yivi ro'o ti keni'in i ro'o ichi fuera, ka'an ndeva'a i nuu ra, ti skexiko i ro'o naa ra nanu ja ka kuu ra yivi

ndeva'a ja siki ru'u, maa Se'e Yivi Ñuyivi. ²³Ko kivi un ti ndusii ini ra, chi kusii xaan ini ra, chi ka'nu xaan koo ta'u ra nuu andivi, chi suni sia'an ni ka sa'a ndeva'a jna'an da jiin chaa ni ka kuu profeta, ni ka ka'an jnu'un Yandios na jana'an. ²⁴Ko na nda'u ga taka ro'o chaa riku, chi vijna ni ga ka iyo sii ini ra. ²⁵Na nda'u ro'o naa ra ja ka iyo ndendajnu ra vijna, ko jaa kivi ja kuu ra soko. Na nda'u ra naa ra, vijna chi ka jaku ra, ko jaa kivi ja ndukui'ya ini ra ti nde'e ra. ²⁶Na nda'u ra naa ra, chi kuajnu'un yivi ro'o, chi sia'an ni ka jajnu'un i chaa ni ka xndoña'an ja ka kuu da profeta, chaa ni ka ka'an jnu'un Yandios vasu tu ni kuu da, chi mani chaa ni ka xndoña'an ni ka kuu da —ni kachi ya.

Jnu'un kanuu ga ja na siuku yo

(Mt. 5.38-48; 7.12)

²⁷Siin Jesús xndaku ya, ti ni kachi ya:

—Ko ro'o naa ra kunso'o jnu'un na ka'an ri. Kunda'u ini ti ka'an va'a ra jiin yivi jito u'u ro'o. Sa'a ja va'a ja kuu yivi ka sa'a ndeva'a nuu ka kuiti ini i nuu ra. ²⁸Ka'an va'a jiin yivi jikanta'u ja'a ra ja na jna'an ra iiñ nundo'o. Kakanta'u nuu Yandios ja kuu yivi ka chakuachi siki ra.

²⁹Koto kinjna'an ra jiin yivi kani ro'o, chi su'va nu ni kani iiñ nuu ra, ti kua'a inga nuu ra na kani tuku i. Nu iiñ yivi kuni kuisonchaa i sa'ma ra, sia na ki'in yivi un jiin, ti suni koto kinyii ra camisa ra, kua'a na ki'in yivi un jiin. ³⁰Kua'a nuu nuu yivi jikanuu nuu ra, ti nu iiñ yivi jisonchaa i ja ñava'a ra, kua'a ra

ki'in, ti koto ma nandakan ga ra.

³¹Nu kuni ra ja na ka'an yiñu'un yivi jiin ra, ti kava yiñu'un tu maa ra nava na ka'an yiñu'un yivi jiin ra.

³²Chi nu nini yivi mani ra jiin ka'an va'a ra, ¿Nau ta'u ra iyo nusa?

Chi undi chaa ka sa'a ndeva'a ka sa'a sia'an. ³³Ti nu nini nuu yivi chindee ro'o ni yukan chindee ra, ¿nau ta'u ra iyo nusa? Chi undi chaa ka sa'a ndeva'a ka sa'a sia'an.

³⁴Ti nu kua'a ra nini nuu yivi jini ra ja kuu chunaa i nuu ra, ¿nau ta'u ra iyo nusa? Chi undi chaa ka sa'a ndeva'a, suni ka ja'a nuu nuu jna'an da, chi jini da ja chunaa i nuu da.

³⁵Ko maa ra naa ra, ka'an va'a jiin yivi ka jito u'u ro'o, ti chindee yivi un. Kua'a nuu nuu da, ti tu kuñkuuu ini ra ja kakan ra ya'u nuu da. Chi nu sia'an sa'a ra, ti iyo kua'a ta'u ra nuu Yandios, chi sia'an ja'a ra jandaa ja ka yi'i ra jiin Yandios, ya kancha andivi. Chi maa ya va'a ini ya jiin taka ni yivi, vasu iiñ yivi ja tu jini nakuanta'u nuu ya jiin yivi ndeva'a xaan. ³⁶Ja yukan kuu ja na kava nda'u ini ra naa ra, sia'an nanu ñunda'u ini Tata ra Yandios —ni kachi Jesús.

Koto kuu ichi ini yo nuu yivi

(Mt. 7.1-5)

³⁷Siin Jesús xndaku ya, ti ni kachi ya:

—Koto kuu ichi ini ra nuu yivi ja ka'an ndoo ra. Chi nu sia'an na sa'a ra, ti kankuachi Yandios siki ra, ja suni sia'an kaa tu maa ra. Koto kankuachi ra ja'a yivi. Chi nu sia'an ka'an ra ti kankuachi Yandios siki ra. Koto ma kachi ra ja ni jna'nun datu ñanijna'an ra. Chi nu sia'an

na ka'an ra, ti kachi Yandios ja ni jna'nu ndatu maa ra. Kuanka'nú ini nuu ñanijna'an ra nava na kuanka'nú ini Yandios nuu ra. ³⁸Ti ansu nínja ja na kuanka'nú ini ra nuu ñanijna'an ra, chi suni kua'a sava'ni ga ja nandi'i da, ti maa Yandios na nakua'a ya vi'i ga nuu ra. Ti chikua'a va'a ya nuu ra nanu ni chikua'a maa ra nuu ñanijna'an ra undi na chitu ndíi bolsa ra. Sia'an sa'a ra, chi nu jiin ku'va un chikua'a ra nava nandi'i ñanijna'an ra, ti suni sia'an na nachikua'a Yandios nava nandi'i tu ro'o —ni kachi Jesús.

³⁹Suni ni xna'an Jesús ínga jnu'un nuu yívi un, ti ni kachi ya:

—Na kajnu'un ri nuu ra naa ra. ¿Xi kuu koxnuu iin chaa kuaa nuu ínga chaa kuaa ja nduku da ichi ki'in da nu? ¿Xi ansu ndínduu da nukoyo iin yau nu? ⁴⁰Yukan kuu ja kuu maa ra naa ra, nu ka kuu ra maestro ja xna'an jnu'un Yandios nuu ínga yívi. Tu iyo ni iin ndaja'a ja ndu iin nuu jiin maestro da, chi xnakan na kutu'va da taka ja xna'an maestro un. Yukán na ti sa ndu iin nuu da jiin maestro da.

⁴¹iSuni na kajnu'un ri nuu ra! ¿Xi vatuni ja ka'an ndoo ra ja kuu ichi ini ra nde'e ra ñanijna'an ra, nu iyo iin kuachi i, vasu jakuu ga kaa tu maa ra jiin kuachi ra xino? ⁴²¿Xi vatuni ja ka'an ndoo ra siki ñanijna'an ra, ja ka'an vixi ra siki da xino? Nde'e naa kaa jniñu sa'a ra, ti xaan yuji ra jiin kuachi un. Ko na kachi ri ja yívi ñaa xini kuu ra, ja tu jini ra ja xnakan nde'e va'a ra nasa kancha ra jiin kuachi ra, ti sa kuu kotonchaa ra kuachi lulu sa'a ñanijna'an ra —kachi Jesús.

Jiin nde'e un ti nakuni yo naa yujnu kuu

(Mt. 7.16-20; 12.33-35)

⁴³Siin Jesús xndaku ya nuu yívi un, ti ni kachi ya:

—Sa'a yo nanu. Ja ka jini ra ja tu iyo ni iin yujnu va'a ja kua'a nde'e kue'e, ni tu iyo ni iin yujnu kue'e ja kua'a nde'e va'a. ⁴⁴Chi nakuni yo nau nuu taka yujnu kuu nu jini yo naa nde'e kua'a. Suni tu kuni'in yo tichi vixi xini nu'iñu xaan, xi kuni'in yo nde'e tika'ya xini iin nu'iñu. ⁴⁵Sia'an kuu chaa va'a, chi ndo'o ini da mani jniñu va'a. Ti chaa ndeva'a un, mani jniñu kue'e ndo'o ini da. Ti yu'u da, chi ka'an nava ndo'o ini da —kachi ya.

Xndaku Jesús siki uu ve'e

(Mt. 7.24-27)

⁴⁶Yukan ti ni kachi Jesús nuu yívi kua'a ni ka ndututu un:

—Nde kua'a ra kachi jiin ri naa ra: “Ni'in kuu jito'o na, ti saña kuu se'e ni.” Vasu ka ka'an ra sia'an, ko tu ka jandatu ra jnu'un ri. ⁴⁷Ko vijná na xna'an ri nasa kuu yívi vekoyo nuu ri, ja chunso'o jnu'un ka'an ri, ti jandatu i jnu'un ri. ⁴⁸Yívi un kuu i nanu iin chaa ni sa'a iin ve'e. Kunuu teyíi ni skee da yuu ndiso nama ve'e un. Yukán ni kii iin sau xaan, ti ni ndaa nducha ja kuni xnaa ve'e un, ko tu ni kanda ve'e un, chi kutu xaan ni kee ja'a ve'e un. ⁴⁹Ti yívi ka chunso'o jnu'un ka'an ri, ti tu ka jandatu i, yívi un kuu i nanu iin chaa ni sa'a ve'e da, ko tu ni skee kunu da yuu ja kundiso nama ve'e un. Ti ñuu ni ja'a iin sau xaan ti ni ndaa nducha,

ti ni nduva ve'e un kua'an, ti ni naa ii —ni kachi Jesús.

Sa'a Jesú斯 tajna iin muzu capitán romano
(Mt. 8.5-13)

7 Nu ni ndi'i ni ka'an Jesús
nuu yivi un, ti kua'an ya ichi
ñuu Capernaum. **2** Ti yukan kande
iin chaa kuu capitán, ja kuu chaa
yinda'a iin ciento soldado, ja ka
yi'i i jiin ejército ñuu Roma. Ñava'a
da iin muzu junukuachi nuu da, ti
kunda'u xaan ini da chaa un. Ni
ki'in kue'e maa da ja kuni kuu da.
3 Ti nu ni jiniso'o da jnu'un Jesús,
ti ni taji da uu chaa ka kuña'nu
Israel, ja na ki'in kanda'u da jiin
Jesús, ja na kin sa'a ya tajna chaa
junukuachi nuu da un. **4** Ni ka tu'va
da nuu Jesús, ti ni ka kanda'u xaan
tonto da sia'an:

—Kuni capitán un ja na chindee
ni da, ti va'a ga ja na sa'a ni, **5** chi
mani da jiin yivi ñuu na. Ti maa da
ni ta'u jniñu ja ni kuu veñu'un na
naa na —ni ka kachi da.

6 Yukan na ti kua'an Jesús jiin da
naa da. Ko nu kuan kuyajni ya ve'e
capitán un, ti chaa un ni taji da uu
amigo da ja na kachi da nuu Jesús
sia'an:

—Jito'yo, kuña'nu ga ni ja kuu
saña, ti tu iin nuu na jiin ni. Ja
yukan kuu ja tu kuni na ja kivi ni
ve'e na. **7** Ja yukan kuu ja tu ni kuni
na ja jaa maa na ja nanduku na
ni'in. Chi so kuni na ja na ta'u ni
jniñu ti na nduva'a muzu na. **8** Chi
saña suni iyo iin chaa kuña'nu ta'u
jniñu nuu na, ti suni maa na ñava'a
na soldado na. Ti kachi na jiin iin
da "kua'an", ti kil'in da. Ti kachi na

jiin inga "ña'an ja'a", ti kii da. Ti
ta'u na jniñu nuu muzu ja na sa'a i
jniñu un, ti sa'a i —ni kachi da.

9 Nu ni jiniso'o Jesús jnu'un un, so
ni naa ini ya. Ti ni ndeokoto ya nuu
yivi kua'a kuankoyo jiin ya un, ti ni
kachi ya:

—Jandaa na kachi ri nuu ra naa
ra ja ni tu'u ñuu Israel tu iyo ni
iin yivi kandixia da ru'u nanu ni
kandixia chaa ja'a —ni kachi Jesús.

10 Nu ni ka najakoyo chaa ni taji
da un ve'e, ti ni ka jini da ja, ja ni
nduva'a chaa ku'u un.

**Ni naxndoto Jesús se'e yii iin
ña'an ni kendo maa iin**

11 Nu ni ya'a un, ti kua'an Jesús
iin ñuu nani Naín. Suni kuankoyo
ndaja'a ya jiin kua'a xaan ga yivi.

12 Ti nu kuan kuyajni ya ñuu un,
ti ni jini ya kuankoyo yivi kuan
chunduji i in ndiyi, ti maa iin ni
ndiyi yukan ni kuu se'e yii iin ña'an
ni kendo maa iin. **13** Nu ni jini Jesús
nuu ña'an un, ti ni kunda'u ini ya
maa ña, ti ni kachi ya jiin ña:

—Koto nde'e ra —ni kachi ya.

14 Yukan ti ni tu'va Jesús, ti ni
ke'e ya jajnu ndiyi un, ti ni ka
jankuñi chaa ka ndiso jajnu un, ti
ni kachi ya jiin ndiyi un:

—Chaa lulu, na kachi ri jiin ra:
iNdokoo! —ni kachi ya.

15 Yukan ti ni ndoko chaa lulu ja
ja ni ji'i un, ti ni keja'a da ka'an
da, ti ni nakua'a Jesús maa da nuu
nana da. **16** Nu ni ka jini yivi un, ti
ni ka yu'u xaan i, ti ni ka keja'a ka
nakanaajaa i Yandios sia'an:

—Ni kenda iin profeta kuña'nu
nuu kanchuku yo naa yo vijna —ni
ka kachi i.

Suni ni ka kachi i sia'an:
—Ni chaa Yandios ja vee chinddee
ya ñuu ya —kachi i naa i.

¹⁷ Yukan ti ni jichanuu jnu'un
jniñu ni sa'a Jesús ni ñuu Judea jiin
taka ga ñuu ka'l'in yajni un.

**Chaa ni taji Juan, chaa ni
skuanducha**
(Mt. 11.2-19)

¹⁸ Yukan ti chaa ni ka kuu ndaja'a Juan, ni ka jani da jnu'un nuu da siki taka jniñu sa'a Jesús. ¹⁹ Ti ni taji da uu ndaja'a da un ja na kinkoyo da nuu kande Jesús, ja na kajnu'un da ya nu maa ya kuu Cristo ja kii un, xi kundatu da ñinga, ni kachi da. ²⁰ Ni jakoyo chaa un nuu kande Jesús, ti ni ka jikajnu'un da ya:

—Juan, chaa skuanducha un,
ni taji da saña naa na nava na
kajnu'un na ja nu maa ni kuu Cristo
ja ni chisojnu'un Yandios ja kii un.
¿Xi kundatu yo ñinga? —ni ka kachi da.

²¹ Ti hora ni jakoyo chaa un,
ni kuu ja sa'a Jesús jniñu ña'nu
kenchaa ya taka nuu kue'e ka
jna'an yivi un, ti keni'in ya tachi
xaan, jiin ja ka ndundiñin nduchi
tijni yivi kuaa un. ²² Ti ni kachi
Jesús jiin chaa ni taji Juan:

—Kuankoyo naa ra ti kani jnu'un
nuu Juan naa ra siki taka ja ni ka
jini ra jiin taka jnu'un ni ka jiniso'o
ra ja'a naa ra. Kachi nuu da ja yivi
kuaa un ka ndundiñin nduchi i, jiin
yivi tikuku un ja ka jika i, jiin suni
ka ndundoo chaa ka jna'an kue'e
ndi'yí te'yu un, jiin yivi so'o un ka
ndundiñin so'o i jiin ja ka nandoto
ndiyi un naa i, jiin ja kuu nuu yivi

nda'u ka'an ri jnu'un Yandios ja
nasa nanita'u i. ²³ Ti kachi jiin da ja
kandichi Yandios jiin yivi, ti tu yu'u
i kundikun i ru'u vasu na kondo'o
koo nene i ja siki ru'u —kachi ya.

²⁴ Nu ni ka ya'a chaa ni taji Juan
un kuankoyo da, ti ni keja'a Jesús
ka'an ya jiin yivi un siki naa chaa
kuu Juan, ti ni jikajnu'un ya:

—Na ni ka jande'e ra undi nuu
ñu'un te'e un, ¿Ndoo ka ndo'o ini
ra ja sa'a chaa un? Ti tu ni ka jini
ra iin chaa nanu iin yoko icha ja
kanda sa'a tachi un, ti chaa un tu
ni sama nuu nuu da jnu'un ka'an da,
chi iin ni jnu'un ni ka'an da. ²⁵ Ti
nu ni ka jande'e ra yukan, ¿xi ni ka
jini ra ja ñu'un da sa'ma va'a nu? Va
tuu, chi na kachi ri ja yivi ka ñu'un
sa'ma fino kanchuku da ini ve'e
chaa ka kuu rey. ²⁶ ¿Ti ndoo ni ka
jande'e ra nusa? ¿Xi ka jani ini ra ja
maa da kuu profeta ja ka'an jnu'un
Yandios nu? Ti jandaa ndixia kuu ja
chaa un, kuu da iin profeta ja ka'an
da jnu'un Yandios. ²⁷ Juan ni kuu
chaa ka'an nuu tutu Yandios nuu
kachi sia'an:

Na taji ri tajnu ri ja na koxnuu
da jaa da.

Ti na satu'va da yivi naa i sa
ki'in ra.

Ni kachi Yandios, kachi tutu.

²⁸ Jandaa na kachi ri ja tukaa ga
ni iin yivi nanu Juan ja kuña'nu ga
ja kuu Juan chaa skuanducha un.
Ko yivi ja, ja ni ka janta'u jnu'un
siki nasa ta'u Yandios jniñu, vasu tu
ka ndiso ni iin jniñu nanu Juan, ko
kuni ga yivi un jniñu ña'nu ga ja sa'a
ya ansu maa da —ni kachi Jesús.

²⁹ Chaa ka kinya'u puesto jiin
kua'a ga yivi un, ni ka kuu yivi ni

skuanducha Juan. Ja yukan kuu ja ni ka janta'u i jnu'un ni ka'an Jesús, ti ni ka ja'a i jandaa ja mani jnu'un Yandios ni kuu ja ni ka'an Jesús, chi vanuxia ni ka janducha i nuu Juan ja siki ja ni ka nakani ini i nuu kuachi i. ³⁰Ko chaa fariseo un jiin taka chaa ka xna'an ley, tu ni ka janta'u da jnu'un Yandios ni ka'an Jesús, chi vanuxia tu ni ka janta'u da jnu'un ni ka'an Juan ni tu ni ka janducha da naa da. Ni ka skexiko da nava kuni sa'a Yandios jiin da.

³¹Ti Jesús ni ka'an tuku ya, ti ni kachi ya:

—Ja'a na kachi ri jiin nau ja skejna'an ri yivi kanchuku kivi vijna. ³²Chi yivi ka iyo vijna ka kuu i nanu suchi kuachi nu ni ka nukoo i nuu ya'u ti ka yisiki i, ti ka kana xini jna'an i: “Ka tivi yo xkili, ko tu ni ka jitaja'a i. Ti kuaka xaan ni ka jita yo iin yaa, ko tu ni ka nde'e i”, ni ka kachi i. ³³Suni sia'an kivi vijna, chi ni kii Juan, chaa ni skuanducha un, ni kuncha da. Tu ni ji'i da ndixi, ti iyo nasa xndondicha da ini da. Ti ro'o ni ka ka'an ra ja ni yi'i da jiin iin tachi xaan. ³⁴Yukan na ti ni chaa tu ru'u, maa Se'e Yivi Nuyivi ja tu iyo nasa xndondicha ri ini ri, ti ji'i ri. Ko ka chakuachi ra ru'u ja yaji xaan ri, ti ji'i xaan ri vino, ti kejna'an ri jiin chaa ka kinya'u nuu puesto jiin taka ga yivi ka sa'a kuachi. ³⁵Nusa ti tu ni ka kandixia ra jniñu ni sa'a Juan, ni tu ka kandixia ra jniñu ni sa'a ru'u. Ko tundo sa'a, chi yivi tu'va ka jini i ja iyo va'a sava'nii ga jniñu ni tatu Yandios nuu ri jiin Juan —ni kachi ya.

Ni ja'an Jesús ve'e iin chaa fariseo nani Simón

³⁶Yukan ti iin chaa fariseo ni kana Jesús ja kusama da jiin ya. Ni jaa ya ve'e da, ti ni nukoo ya nuu mesa. ³⁷Ti ñuu yukan iyo iin ña'an siii ini. Ni ni'in ña jnu'un ja kua'an Jesús ve'e Simón kuan kusama ya, ti yukan ni jaa ña jiin iin tindo'o lulu alabastro ja ñu'un chitu aceite perfume. ³⁸Ni nukoo ña nuu ja'a Jesús, nde'e ña, ti ni xndají ña ja'a ya jiin nducha nuu ña, ti ni nasichi ña jiin ixi xini ña. Yukan ti ni teyu'u ña ja'a ya, ti ni skuchi ña jiin aceite perfume un. ³⁹Nu ni jini chaa fariseo, chaa ni kana Jesús yukan, ti ni keja'a ndo'o ini da: “Nu sia'an ti ndixia chaa ja'a ja kuu da iin profeta, ti va kuni da naa ña'an kuu ña, chi kuu ña iin ña'an siii ini”, ni ndo'o ini da. ⁴⁰Yukan ti ni kachi Jesús jiin chaa fariseo un:

—Simón, iyo iin jnu'un kuni ka'an ri jiin ra —kachi ya.

Ti ni kachi chaa fariseo un:

—Kachi ni maestro —ni kachi da.

⁴¹Yukan ti ni kachi Jesús:

—Na kani ri iin jnu'un. Ni ka iyo uu chaa ka tau xu'un nuu iin chaa ja'a nuu xu'un. Hin da tau u'un ciento xu'un plata, ti inga da tau sava ciento. ⁴²Ko ndinduu chaa un tu ka ni'in da ja chunaa da un. Yukan na ti chaa ni ja'a nuu un ni janka'nu ini da nuu ndinduu chaa un. Sia'an ni kuu jnu'un. Vijná ti kachi nuu ri, ¿Nau iin iin chaa un kunda'u ga ini chaa ni ja'a nuu xu'un un nusa? —ni kachi ya.

⁴³Ti ni kachi Simón:

- Ja ndo'o ini na va chaa ni tau kua'a ga nuu da un —ni kachi da.
 Ti ni kachi Jesús:
 —Jandaa kuu un —ni kachi ya.
- 44** Yukan ti ni nde'e Jesús nuu ña'an un, ti ni kachi ya jiin Simón:
 —Nde'e nuu ña'an ja'a. Ni kivi ri ve're ra ko tu ni siuku ra jnu'un ra. Tu ni ja'a ra nducha ndundoo ja'a ri. Ko ña'an ja'a ni xndaji ña ja'a ri jiin nducha nuu ña, ti ni nasichi ña jiin ixi xini ña. **45** Tu ni teyu'u ra ru'u ja kanxia'u ra jiin ri, ko ña'an ja'a, undi ni kivi ri ni keja'a ña teyu'u ña ja'a ri. **46** Tu ni chu'un ra aceite perfume xini ri, ko ña'an ja'a, chi ni skuchi ña ja'a ri jiin aceite perfume. **47** Ja'a ti na kachi ri nuu ra ja nde'e mani xaan ña ru'u ja na kuanka'nu ini ri nuu taka kuachi ni sa'a ña. Ko iin yivi ja tu stuu i maa i ja mani i jiin ri va tu nakani ini i ja iyo kua'a kuachi siki i, ni tu nduku i jnu'un ka'nú ini nuu ri ja na kenchaa kuachi i —ni kachi Jesús jiin Simón.
- 48** Yukan ti ni kachi ya jiin ña'an un:
 —Ja ni janka'nu ini ri nuu kuachi ra —ni kachi ya.
- 49** Yukan na ti yivi ni ka jakoyo kanchuku jiin ya yukan, ni ka keja'a ka ndajnu'un naa:
 —¿Naa chaa kuu chaa ja'a ja janka'nu ini da nuu kuachi un? —kachi naa.
- 50** Ko maa Jesús ni kachi ya jiin ña'an un:
 —Ja ni keta'u ra, chi ni kandixia ra ru'u. Na kukuee ki'in ra vijna —ni kachi Jesús.
- 8** **Ña'an ni ka chindee Jesús**
 Yukan, ti ni keja'a Jesús jikonuu ya taka ñuu jiin taka

rancho, ti xndaku ya nasa kivi yivi nda'a Yandios ti ta'u ya jniñu nuu i. Ka jikonuu ndi uxi uu ndaja'a ya jiin ya. **2** Ti suni ka jikonuu tijni ñasi'i ni sa'a ya tajna ja ni kenchaa ya tachi xaan ni ka jna'an ña jiin tijni nuu ga kue'e ni ka jna'an ña naa ña. Ti yukan ni ka'iin María, ja suni nani ña Magdalena, ña'an ni keni'in ya uxia tachi xaan. **3** Suni kua'an Juana ñasi'i Chuza, chaa ni ta'u jniñu nuu muzu Herodes chaa ni kuña'nu un. Suni Susana jiin tijni ga ña'an ni ka chindee ya jiin ja ka ñava'a ña.

Jnu'un iin chaa saka triu

(Mt. 13.1-9; Mr. 4.1-9)

4 Kua'a xaan yivi uu ga ñuu ni ka jakoyo nuu kande Jesús, ti nu ni ka taka kua'a ga yivi un, ti ni keja'a Jesús xna'an ya nuu yivi un sia'an, ti ni kachi ya:

5 —In chaa jitu triu ni kenda da kuan saka da triu. Ti nuu kua'an da jacha da triu un, sava triu un ni ka nukoyo ini ichi, ni ka jañu ni'nu yivi, ti ni ka chakoyo saa un naa ti, ti ni ka nastutu ti. **6** Sava ga triu un ni ka jinu ma'ñu yuu, ti ni jinu triu un, ko nu ni na'ichi ñu'un, ti ni ka ichi. **7** Sava ga triu un ni ka jinu nuu yi'i yo'o nu'lñu. Ti nu ni kaña numa nu'lñu un, ti ni ka jasi i nuu triu un. **8** Ko sava ga triu un ni ka jinu i nuu yi'i ñu'un va'a, ti ni kaña triu un ti ni jañu, ti va'a xaan ni kuu. Ni ka nakua'a undi iin ciento triu nuu iin triu tata —ni kachi ya.

Yukan na ti jaa xaan ni ka'an Jesús sia'an:

—Nau ro'o na chunso'o, ti nakani ini nasa kuni ka'an jnu'un un —kachi ya.

**Na kachi Jesús nasa kuni ka'an
jnu'un ni ka'an ya un
(Mt. 13.10-17; Mr. 4.10-12)**

⁹Yukan na ti ni ka jikajnu'un taka chaa ja skua'a jiin Jesús nasa kuni ka'an jnu'un ni xndaku ya un, ¹⁰ti ni kachi ya:

—Ja kuu ro'o naa ra chi xna'an kaji Yandios nuu ra nasa ta'u ya jniñu, ko yivi tu kandixia, na xndaku ri nuu i jiin jnu'un un. Chi vasu ñuso'o i jnu'un ka'an ri, ti nde'e i jniñu sa'a ri, ko jini ri ja tu kuiti kuni i chaku ini nasa ta'u ya jniñu. Chi vasu ka ñuso'o i jnu'un ka'an ri, ti nde'e i jniñu sa'a ri, ko tu chaku ini i —ni kachi ya.

**Xndaku Jesús nasa kuni ka'an jnu'un
chaa saka triu un
(Mt. 13.18-23; Mr. 4.13-20)**

¹¹Siin Jesús xndaku ya, ti ni kachi ya:

—Sia'an kuni ka'an jnu'un un. Sa'a yo nanu ja triu un kuu jnu'un Yandios. ¹²Ti yivi un kuu triu ja ni jinu ichi un, chi chunso'o i jnu'un Yandios, ko nu ni chaa ja'u'un un, ti xnda'u da ja tu kandixia i, ti nava tu keta'u i. ¹³Ti triu ni jinu nuu yuu yukan kuu nanu yivi ni ka jiniso'o jnu'un ka'an ri, ni ka janta'u i, ti ka kusii ini i jiin. Ko vanuxia ja changa ga kuñii ini i jiin jnu'un un, ti nu ni ka keja'a ka jito u'u yivi i ja siki jnu'un un, ti ka nakani ini i, ti tukaa ga ka kandixia i. ¹⁴Ti triu ni ka jinu nuu yi'i yo'o nu'iñu kuu nanu yivi ni ka chunso'o jnu'un un, ko ka ndi'i ga ini i ja kuu taka ga ja iyo nuu ñuyivi ja'a, ja na kuu riku i. Ti yukan kuu ja jasi ja tu ka siin

jiin jnu'un Yandios, chi tukaa kuni kuandatu i nuu jnu'un ya. ¹⁵Ko triu ni ka jinu nuu ñu'un va'a un kuu nanu yivi ka chunso'o nii ini i jnu'un Yandios, ti ka chaku ini i nasa kuu jnu'un un, ti ka siuku i jiin. Yivi un ka kuu nanu triu ni ka nakua'a undi iin ciento triu nuu iin triu tata —ni kachi Jesús.

**Jnu'un iin yiti
(Mr. 4.21-25)**

¹⁶Siin Jesús xndaku ya, ti ni kachi ya.

—Yivi yinda'a iin yiti, tu skuikun i ti kasí i nuu, ni tu kani yi chii jito. Chi su'va chuxndee i yiti un nuu sukun, ti nava na kundijin nuu yivi ka jakoyo un. ¹⁷Suni sia'an kuu jiin jniñu kua'a ri nuu ra naa ra, chi vijnal ñu'ní jaku ni yivi ka jini, ko jaa iin kivi nu kua'a yivi kuni ndijin. ¹⁸Yukan ti na chunso'o va'a i jnu'un ka'an ri, chi siki yivi ja kandixia jnu'un ri, ti vi'i ga ni'in jna'an i inijnunu i ja kunukuachi i nuu ya. Ko yivi ja tu kandixia, ti vi'i ga kendo i, ti tu chindee Yandios maa i. Chi su'va naa ini i jnu'un ri —ni kachi Jesús.

**Nana Jesús jiin ñani ya
(Mt. 12.46-50; Mr. 3.31-35)**

¹⁹Yukan ti ni jakoyo nana Jesús jiin ñani ya nuu kande ya, ti ka kuni ña ka'an ña jiin Jesús, ko tu kuu nasa kivikoyo ña nuu kande ya, chi kua'a xaan yivi ka'iin nuu ya.

²⁰Ni ja'an iin chaa ni jan kasjnu'un nuu ya, ti kachi da:

—Nana ni jiin ñani ni ka'iin da fuera, ti ka kuni ka'an da jiin ni —ni kachi da.

21 Ti ni kachi ya jiin chaa un:
—Yíví ka chunso'o jnu'un Yandios
ti ka jandatu i jnu'un un, yukan
kuu nanu nana ri jiin ñani ri —ni
kachi ya.

**Ni sa'a Jesús ja na jakuiñi tachi sau
xaan nuu lago un**
(Mt. 8.23-27; Mr. 4.35-41)

22 Iin kivi ni kivi Jesús jiin ndaja'a
ya ini iin barco, ti ni kachi ya:
—Na cho'o ñinga yu'u mini un —ni
kachi ya.

Yukan ti kuankoyo da. **23** Ko ni
kuankoyo da nuu nducha un, ti ni
kixi Jesús. Ichi kuankoyo da ti ni
ndonda iin tachi sau xaan tonto
nuu mini un ja kava nuu mani ga
nducha un nuu barco un, ti kuni
kee ka'nu ki'in. **24** Ti ni ka xndoto
ndaja'a un ya, ti ni ka kachi da:
—¡Maestro! ¡Maestro! Ka kuni
keka'nu yo chii nducha —ni ka
kachi da.

Yukan ti ni ndokuiñi ya ti ni ta'u
ya jniñu nuu tachi sau xaan un
jiin mini un, ti na'l'in kuiti ni kuu.
25 Yukan ti ni kachi ya jiin ndaja'a ya:
—¿Ndoo ka jna'an ra naa ra nusa?
¿Ka jani ini ra ja tu kuu chindée
Yandios ro'o naa ra nu? —ni kachi ya.

Ko maa da naa da, so ka naa ini
da ja ni ka yu'u da, ti ni ka keja'a
ka jikajnu'un jna'an da:

—¿Naa chaa kuu chaa ja'a ja undi
tachi sau xaan un jiin mini un ka
jandatu nuu da? —kachi da naa da.

**Chaa ni ka jna'an tachi xaan ñuu
Gadara**

(Mt. 8.28-34; Mr. 5.1-20)

26 Yukan sa ni ka jakoyo da nuu
ñu'un ñuu Gadara ja kande inga

yu'u mini Galilea. **27** Nu ni kee Jesús
ini barco un, ti ni tu'va iin chaa
ñuu un nuu ya. Ti ja ni kuu na'an
xaan ja jna'an chaa un tachi xaan
un. Tu ñu'un da sa'ma, ni tu nchaa
da ve'e, chi mani siki kava nuu ka
ñunduji ndiyi un nchaa da. **28** Nu
ni jini da nuu Jesús, ti ni nduva da
nuu ja'a ya, ti ni kanajiin da sia'an:
—¿Ndoo kivi nduu ni jiin na, nil'in
Jesús, Se'e Yandios kancha andivi?
iJikanta'u na nuu ni ja tu kua'a ni
nundo'o saña! —ni kachi da.

29 Sia'an ni kanajiin da, chi Jesús
ja ni ta'u ya jniñu nuu tachi xaan
ja na xndoo maa da. Tijni jinu jnií
tachi xaan un maa da, ti vasu ka
ju'ni yíví nda'a da jiin si'in da ja na
kunu'ni da, ko kundee da ja'ncha
da, ti kua'an tachi xaan un jiin da
undi yuku te'e un. **30** Ni jikajnu'un
Jesús maa da:

—¿Nasa nani ra? —ni kachi ya.
Ti ni kachi da:

—Nani na Legión —ni kachi da.
Sia'an ni ka'an da chi Legión kuni
ka'an ja ka iyo kua'a xaan soldado,
ti kua'a xaan tachi un jna'an da.

31 Ti tachi un ni ka kanda'u jiin
Jesús ja tu taji ya kinkoyo ini
xnduchi kumu un nuu koto nundo'o.

32 Ti yuku un ka'iin kua'a xaan
kini ka nduku ti ja kaji ti, ti ni ka
kanda'u tachi un jiin Jesús ja na
kua'a ya jnu'un ja na kinkoyo jiin ti,
ti Jesús ni ja'a ya jnu'un. **33** Yukan
ti ni ka xndoo tachi xaan un chaa
un, ti ni ka kekoyo kua'an, ti ni
ka jankuncha jna'an jiin kini un.
Yukan ti ndí'i ti ni ka ja'a ti corri,
ni ka nukoyo ti xa'va, ti ni ka kivi
ti nuu nducha mini un, ti ni ka
kanchaa ti nducha un, ti ni ka ji'i ti.

34Nu ni ka jini chaa ka ndito kini un ja sia'an ni ka jna'an kini da, ni ka yu'u xaan da. Ti ni ka ja'a da corri ni ka jan kasjnu'un da nuu yivi ñuu jiin taka yivi rancho.

35Yukan ti ni ka kee yivi ñuu un ni ka jande'e i ja ni kuu un. Nu ni ka jakoyo yivi un nuu kande Jesús, ti ni ka jini i chaa ni jna'an tachi xaan un nukoo da nuu ja'a Jesús, ja ni nduva'a da ti ja ñu'un da sa'ma da. Ti nu ni ka jini yivi un ni ka yu'u xaan i. **36**Ti uu ga yivi ni ka jini i jniñu ña'nú ni sa'a Jesús ni ka jani i jnu'un nasa ni nduva'a chaa ni jna'an tachi xaan un. **37**Ko ja siki jniñu ña'nú un ni ka yu'u xaan tendil'i yivi ñuu Gadara un, ti ni ka ka'an da jiin ya ja na kee ya na ki'in ya ñuu da un naa da. Yukan na ti ni ndivi Jesús barco ti kua'an ya. **38**Ko chaa ni jna'an tachi xaan un, na ti ki'in ga Jesús ni ka'an nda'u da jiin Jesús ja kuni da ki'in da jiin ya. Ko maa ya ni kachi jiin da ja na kendo da, ti ni kachi ya:

39—Kuano'on ve'e ra, ti kani ra jnu'un taka ja ni sa'a Yandios jiin ra —ni kachi ya.

Yukan na ti kua'an chaa un, ti ni jani da jnu'un ni ñuu nava ni sa'a Jesús jiin da.

Se'e si'i Jairo jiin ña'an ni kue'e sa'ma Jesús

(Mt. 9.18-26; Mr. 5.21-43)

40Nu ni naya'a tuku Jesús inga yu'u nducha un, ti ni ka kusii ini yivi ja ni nchaa tuku ya, chi ka ndatu i ya. **41**Ti yukan ni jaa iin chaa nani Jairo, chaa yinda'a iin veñu'un Israel un. Ni jakunjiti da nuu ja'a Jesús, ti ni kanda'u da jiin

ya ja na ki'in ya ve'e da, **42**chi kuni kuu se'e si'i da, ti ma iin xini i, ko ja iin i uxi uu kuiya.

Ti kua'an Jesús jiin da. Ko kuankoyo kua'a xaan yivi jiin ya ja undi ka jaxin jna'an yivi un naa i. **43**Ti ma'ñu yivi un kua'an iin ñasi'i jna'an kue'e niñi xaan tonto ja ni ndo'o ña jiin kue'e un uxi uu kuiya. **44**Ni tu'va ña ichi jata Jesús, ti ni ke'e ña siki sa'ma ya. Ti hora ni ni jakuiñi niñi un. **45**Yukan ti ni jikajnu'un Jesús yivi un:

—¿Nau ja ni kue'e ru'u? —ni kachi ya.

Ti tendi'i yivi un ka ka'an ja tuu. Ti Pedro jiin uu ga ndaja'a un ni ka kachi da jiin Jesús:

—Maestro, yivi kuankoyo ja'a ka jaxin jna'an i, ti ka chinda'a jna'an i, ti jikajnu'un ni ja nau ja ni chinda'a ni'in —ni ka kachi da.

46Yukan ti ni kachi Jesús:

—Iyo iin yivi ni ke'e ru'u, chi ni jini ri ja jiin jniñu ndiso ri ni sa'a ri tajna iin yivi —ni kachi ya.

47Nu ni jini ña'an un ja ni jini Jesús ja ni ke'e ña ya, ti undi ni'in ña ni tu'va ña, ti ni jakunjiti ña nuu ya. Ti nuu chitu un ni kachi ña ndoo ni kuu ja ni ke'e ña sa'ma ya, ti ni nduva'a ña nuu ni kue'e ña sa'ma ya.

48Yukan ti ni kachi Jesús jiin ña:

—Ndee sa'ní ra hija. Ja ni nduva'a ra chi ni kandixia ra ru'u ja kuu sa'a ri tajna maa ra. Ti na kukuee ki'in ra vijna —ni kachi ya.

49Ti ka'an Jesús sia'an, ti ni jaa iin chaa kande ve'e Jairo, ti ni kachi da jiin Jairo:

—Ja ni ji'i se'e si'i ni. Tukaa ndoo sa'a ni ja ki'in ni jiin maestro —kachi da.

50 Ti Jesús ni jiniso'o ya ja sia'an ni ka ka'an da jiin Jairo. Ko tu ni ki'in ya jnu'un, ti ni kachi ya jiin Jairo:

—Koto yu'u ra, so kuni ri ja na kandixia ra ti nava na nduva'a se'e si'i ra —ni kachi ya.

51 Nu ni jaa ya ve'e Jairo, ti tu ni ja'a ya jnu'un kivikoyo yivi jiin ya, chi nini Pedro, Jacobo jiin Juan, jiin tata suchi lulu un, jiin nana i ni ka kivi jiin ya. **52** Ti tendi'i da ka nde'e ja ka na'nu ini da suchi lulu un, ko ni kachi Jesús:

—Tu nde'e ra naa ra, chi tu ni ji'i suchi lulu ja'a, chi so kixi i —ni kachi ya.

53 Ti yivi ka'iin un so ni ka jaku i ja sia'an ni ka'an Jesús, chi ja ni ka jini da ja ni ji'i suchi lulu un. **54** Ti maa Jesús ni jni'i ya nda'a suchi lulu un, ti jaa xaan ni ka'an ya sia'an:

—¡Suchi lulu, ndoko! —ni kachi ya.

55 Ti hora ni, ni nandoto suchi lulu un, ti ni ndoko i. Ti ni ta'u Jesús jniñu nuu nana i ja na kua'a ña ja kají i. **56** So ni ka naa ini tata i. Ko maa Jesús ni ta'u ya jniñu ja tu kani da jnu'un ja sia'an jniñu ni sa'a ya.

Taji Jesús ndaja'a ya ja na ka'an da jnu'un Yandios

(Mt. 10.5-15; Mr. 6.7-13)

9 Ni nastutu Jesús ndi uxi uu ndaja'a ya, ti ni ja'a ya jniñu ña'nu nuu da naa da ja na kuu keni'in da taka nuu tachi xaan, ti suni na sa'a da tajna yivi ka jna'an taka nuu kue'e. **2** Ni taji ya da ja na xna'an da jnu'un Yandios siki ja

nasa kuu kivi i nda'a ya ja na ta'u ya jniñu nuu i. Ti ni ja'a ya jniñu ja na kencha da kue'e naa da. **3** Ti ni kachi ya jiin da naa da:

—Tundo kunda'a ra naa ra ja kuu ichi, ni iin yujnu xii, ni ñunu staa, ti ni xu'un. Ti suni iin ni su'nú kuu ja kunda'a ra naa ra, tu kunda'a ra uu. **4** Nu ni ka jakoyo ra iin ve'e, kendo un naa ra undi nu kuankoyo ra inga ñuu. **5** Ti taka yivi ja tu ka ja'a ve'e, ni tu ka chunso'o jnu'un Yandios ka ka'an ra, kekoyo ve'e un jiin ñuu i. Ti nu ni kekoyo ra, ti kisi tikacha ini ndijña ra naa ra, na kuu iin seña ja tu ni ka kandixia jnu'un ni ka ka'an ra nuu yivi yukán —ni kachi Jesús.

6 Ni kekoyo ndaja'a un, ti ni ka jikonuu da taka ñuu ka xna'an da jnu'un Yandios, ti ka sa'a da tajna yivi naa i.

Ni ji'i Juan, chaa ni skuanducha

(Mt. 14.1-12; Mr. 6.14-29)

7 Ti kuiya un kuu Herodes gobernador nuu ñuu un, ti ni ni'in da jnu'un taka jniñu sa'a Jesús, ko tu kojnuni ini da siki jniñu ña'nu sa'a Jesús, chi sava yivi un ka ka'an ja Juan kuu, chi ja ni nandoto da ma'ñu ndiyí. **8** Sava ga ka ka'an ja ni ndenda profeta Elías ja ni kii na jana'an, ti sava i ka ka'an ja inga profeta ni kii na jana'an ni nandoto ma'ñu ndiyí.

9 Ti ni kachi Herodes:

—Ko maa ri ni ta'u jniñu ja na ka'ncha da xini Juan, ti ¿naa chaa kuu ja ka'an yivi ja sa'a taka nuu jniñu ña'nu un nusa? —ni kachi da.

Ti ndiyo ini Herodes ja na kuni da nuu Jesús.

**Ni skaji Jesús vi'i ga u'un mil yivi
naa i**

(Mt. 14.13-21; Mr. 6.30-44; Jn. 6.1-14)

10 Yukan ti ni ka nandeokuñi ndi uxi uu ndaja'a Jesús, ja ka nani apóstol, undi ñuu nuu ja ni ka ja'an da ni taji ya da naa da. Ti vijnal ka nani da apóstol, chi ni ka kuu da chaa ni nakaji Jesús ja kuijin da jiin ya. Ti ni ka nakani da jnu'un nuu Jesús taka jniñu ni ka sa'a da. Yukan ti ni yinda'a Jesús maa da kuankoyo siin da iin ñu'un te'le ja kande yajni ñuu Betsaida. **11** Ko ni ka jini yivi taká nuu kua'an ya, ti ni ka chindikun i kuankoyo i. Ti Jesús ni janta'u ya maa i naa i. Ti ni xna'an ya jnu'un Yandios siki nasa kuu kivi i nda'a ya, ja na ta'lú ya jniñu nuu i naa i. Ti suni ni sa'a ya tajna yivi ka ku'u. **12** Ko vanuxia ja kuan kuñaa, ti ni ka tu'va ndi uxi uu ndaja'a un nuu Jesús, ti ni ka kachi da:

—Ka'an ni jiin yivi ja na ki'in ndetatu i naa i, ti na nduku i ja kaji i taka rancho jiin ñuu ka'iin yajni, chi tundo iyo nuu ka'iin yo ja'a —ni ka kachi da naa da.

13 Ti ni kachi Jesús jiin da naa da.

—Kua'a maa ra ja kaji i naa ra —ni kachi ya.

Ti ni ka kachi da naa da:

—Ko tukaa ga ndoo ka yinda'a na, chi u'un ni ga staa stila jiin uu cháká ni ga ka yinda'a na. Ti nanu kuan na ja kaji yivi kua'a ja'a naa i nusa? —ni ka kachi da.

14 Ti iyo yajni u'un mil chaa ni ka'iin un. Ti ni kachi Jesús jiin ndaja'a ya:

—Kachi jiin yivi ja na nukoo yukun i sava ciento naa i —ni kachi ya.

15 Sia'an ni kachi ndaja'a ya nuu yivi un, ti ni ka nukoo i nuu icha un. **16** Yukan na ti ni jnií Jesús ndi u'un staa stila un jiin uu cháká un ini nda'a ya. Ni ndakoto ya andivi, ti ni nakuanta'u ya nuu Yandios. Ni sakuachi ya, ti ni ja'a ya nuu ndaja'a ya ja na tejna'an da nuu yivi un naa i. **17** Tendi'i yivi un ni ka yee i nasa ni kundee maa i. Nu ni kuu ni ka yee i, ti ni ka nastutu da uxi uu chika jiin pedazu ni kendoso un.

Kachi ndaa Pedro ja Jesús kuu Cristo

(Mt. 16.13-19; Mr. 8.27-29)

18 Hin kivi kancha siin Jesús jikanta'u ya nuu Yandios, ti ka'iin yajni ndaja'a ya jiin ya. Yukan ti ni jikajnu'un ya da naa da sia'an:

—¿Nau ja ka ka'an yivi ja kuu ri?
—ni kachi ya.

19 Ti ni ka kachi da naa da:

—Sava yivi ka ka'an ja kuu ni Juan ja ni skuanducha un. Sava ga ka ka'an ja maa ni kuu profeta Elías, ja ni kii na jana'an. Ti sava ga ka ka'an ja kuu ni inga profeta jana'an, ja ni nandoto ma'ñu ndiyi —ni ka kachi da naa da.

20 Yukan ti ni jikajnu'un ya da naa da:

—Ti ro'o naa ra, ¿nau ja ka ndo'o ini ra ja kuu ri? —ni kachi ya.

Ti ni kachi Pedro:

—Maa ni kuu Cristo, Se'e Yandios, ja ni taji ya ja ndiso ni jniñu ña'nú —ni kachi da.

Hin kivi ni ka'an Jesús ja kuú ya

(Mt. 16.20-28; Mr. 8.30-9:1)

21 Yukan na ti ni kachi Jesús jiin ndaja'a ya ja koto ma kani kuiti da jnu'un nuu yivi ja maa ya kuu Cristo, ja ni taji Yandios ja ndiso ya jniñu ña'nú.

22Ti ni kachi Jesús jiin da naa da:
—Ru'u, ja kuu ri maa Se'e Yívi
Ñuyivi, kondo'o koo nene ri. Ti taka
chaa ka kuña'nu nación Israel, jiin
sutu ka kuña'nu, jiin taka chaa ka
xna'an ley Israel ini veñu'un un, tu
kuanta'u da ru'u. Chi su'va ka'ní da
ru'u. Ko nu uni kivi ti nandoto ri
ma'ñu ndiyi —ni kachi ya.

23Yukan na ti ni kachi ya jiin
tendi'i yívi ni ka ndututu un:

—Nu nau yívi kuni kundikun
ru'u, ja siuku i jnu'un ka'an ri, ti
na xndoo i taka ja ka ndo'o ini i
un, ti na tava ini i ja taka kivi na
kondo'o koo nene i vasu na kuu i
ja siki ru'u. **24**Chi yívi kandio ini
ja kunchuku va'a i nuu ñuyivi ja'a
ja tu kandixia i jnu'un ri, ti xnaa
i maa i. Ko yívi na koo ndo'o koo
nene i ja siki ru'u, ti su'va ni'in
ta'u i ja kunchuku i nuu andivi ja
kuu saa ni. **25**Chi tundo ni'in kuiti
iin yívi, vasu na kundee i ni'in i
taka ja iyo nuu ñuyivi ja'a, ti xnaa i
añu i nuu Yandios. **26**Ko nu iin yívi
kukanuu i ja siki ru'u, ja tu kuni
ka'an i nuu inga yívi ja kandixia
i ru'u, nusa ti ru'u, maa Se'e Yívi
Ñuyivi, suni na kachi ri ja tu ka yi'i
kuiti yívi un jiin ri. Sia'an kachi ri
kivi nchaa ri tuku jiin taka ángel
ndoo ja ka junukuachi nuu Yandios.
Chi ja kuu kivi un kundiso ri jniñu
ña'nu tatu Tata ri Yandios nuu ri
naa ri. Yukan ti tu nakuni kuiti ri
taka yívi ja tu ni kuni xna'an i ja
kandixia i ru'u. **27**Ti ja siki kivi un,
na kachi ri ja sava ro'o ja ka'iin ja'a
kuchaku ra, ti kuni ra nchaa tuku ri
jiin iin jniñu ña'nu xaan ga, ja iin ni
ga jniñu ka ta'u ri jiin Yandios nuu
tendi'i ja iyo —ni kachi ya.

Ni nasama Yandios nuu Jesús

(Mt. 17.1-8; Mr. 9.1-8)

28Sia'an ni ka'an Jesús, nu ni ya'a
yajni una kivi. Yukan ti ni ka ja'an
ya jiin Pedro, Jacobo jiin Juan xini
iin yuku, kuan kakanta'u ya. **29**Ni
jikanta'u ya nuu Yandios, ni nasama
nuu ya, ti sa'ma ya ni nduskuiyi
xaan nanu iin nduva ndikandii. **30**Ti
yukan ni ka jini da kajiin uu chaa ka
ndajnu'un jiin ya. Ti iin chaa un ni
kuu iin chaa ni kuña'nu nuu nación
Israel na jana'an ni nani Moisés, ti
inga chaa un ni kuu profeta ni nani
Elías ja ni kii suni undi na jana'an.
31Ti vii xaan ni nduu nuu kajii da,
ti ni ka ndajnu'un da ja ka'ní yívi
Jesús nuu ñuu Jerusalén. **32**Ti Pedro
jiin uu ga chaa un, vasu ka ji'i xaan
da ma'ná, ko ni ka ndoto nduchi da,
ti ni ka nde'e da nuu kajii Jesús jiin
uu ga chaa un, ti ni ka nakuni da ja
ni nduña'nu xaan Jesús. **33**Ti nu ni
ka xndoo Moisés jiin Elías Jesús, ti
ni kachi Pedro jiin ya:

—Maestro, xaan va'a ja ka'iin
yo ja'a. Na sa'a yo uni ve'e kuachi
kunchuku yo, iin kuu ni, inga na
kuu Moisés, ti inga na kuu Elías —
ni kachi da.

Ko vasu Pedro, tukaa jini da naa
jnu'un ka'an da. **34**Ti ni ka'an ga
da sia'an, ti ni jinu iin viko nu'un
ja ni nasuku da naa da, ti yukan ni
ka yu'u xaan da nu ni kasuku viko
un da. **35**Ti nuu viko un ni ka'an iin
ndusu sia'an:

—Ja'a kuu se'e ri ja kunda'u ini
ri ti kusii ini ri jiin. Ti chunso'o
jnu'un ka'an da —kachi.

36Nu ni ndi'i ni ka'an ndusu un, ti
ni ka nde'e da ja maa iin ni ga Jesús

kandichi. Yukan ti na'iin kuiti ni ka kuu da. Tu ni ka jani da jnu'un nuu ni iin yivi ja sia'an ni ka jini da un.

Sa'a Jesús tajna iin chaa lulu ji'i yi'i

(Mt. 17.14-21; Mr. 9.14-29)

37 Nu ni ka natinu da ja'a yuku un inga kivi, ti kua'a xaan yivi ni ka ja'an nujna'an Jesús. **38** Ti iin chaa un ni kana xini Jesús, ti jaa xaan ni kachi da:

—Maestro, kanda'u na jiin ni ja na kin nde'e ni se'e na, chi maa iin ni ja'a kuu se'e na. **39** Hin tachi xaan un jnii i, skanajiin i ti ja'n iyi'i i, kaña tilinu yu'u i. Ja'a xaan nundo'o i, ti tu kuni sia maa i. **40** Ja ni kanda'u na jiin ndaja'a ni ja na kenchaa da ki'in, ko tu ni kuu sa'a da naa da — ni kachi da.

41 Ti ni kachi Jesús nuu tendi'i yivi un:

—Xaan ga tu ka kandixia ra jniñu sa'a Yandios. Xaan ga ni'l'in ini ra naa ra ja tu ka jandatu ra nuu Yandios. Nasa ga ndo'o nene ri ja siki ro'o naa ra. Chaan chaa lulu jña, na kii da naa ra —kachi Jesús.

42 Ko nu kuan tu'va chaa lulu un nuu Jesús, ni skuiko tuku tachi xaan un maa da nuu ñu'un un, ti ja'n iyi'i tuku maa da. Yukan ti ni nduxaan ni'in ya nuu tachi xaan un, ti ni nduva'a chaa lulu un. Ti ni nakua'a ya nuu tata da. **43** Ti tendi'i yivi un ni ka naa ini i jiin jniñu ña'nu sa'a Yandios.

Hin kivi ni ka'an tuku Jesús ja kuū ya

(Mt. 17.22-23; Mr. 9.30-32)

Ni ka naa ini yivi un jiin jniñu ña'nu ni sa'a Jesús, ti ni kachi ya jiin ndaja'a ya:

44 —Chunso'o va'a jnu'un ja'a, ti koto naa ini ra naa ra. Ru'u, ja kuu ri maa Se'e Yivi Ñuyivi, ti iyo iin da ja nakua'a da ru'u nuu nda'a chaa ka jito u'u ru'u —ni kachi ya.

45 Ko ndaja'a ya tu ka chaku ini da jnu'un ni ka'an ya un, chi tu ni ja'a ya jnu'un ja chaku ini da naa da. Ti ka yu'u da ka'an da jiin ya ja na xndaku ya jnu'un ni ka'an ya un nuu da.

Nau kuu ja kuña'nu ga

(Mt. 18.1-5; Mr. 9.33-37)

46 Hin kivi ti ni ka keja'a ndaja'a Jesús ka jikajnu'un jna'an da na ndenu nau iin iin da kuu ja kuña'nu ga. **47** Ko ni jini Jesús nava ka ndo'o ini da. Yukan ni ki'in ya iin suchi lulu, ni jani ya xiin ya, **48** ti ni kachi ya jiin da naa da:

—Jlin jniñu ndiso ri na kachi ri ja nu na kunda'u ini ra iin suchi lulu sia'an, ti ja ni kuu ra iin yivi ni janta'u ru'u. Ti ja janta'u ra ru'u, ansu nini ru'u janta'u ra, chi suni janta'u ra Yandios, ya ni taji ru'u vají ri. Ja yukan kuu ja taka ro'o ja ka ndo'o ini ja nukuu ga ja kuu taka ra naa ra, ja tu ka ndo'o vixi ini ra, yukan kuu ja kuña'nu ga —ni kachi ya.

Jesús ka'an ya jiin ndaja'a ya ja na kuanta'u da yivi sa'a jniñu ña'nu jiin sivi ya

(Mr. 9.38-40)

49 Yukan ti ni kachi Juan jiin Jesús:

—Maestro, ni ka jini na iin chaa ja jiin sivi ni ni kenchaa da tachi xaan un kua'an, ti ni ka nduxaan na jiin da, chi tu yaku da jiin yo —ni kachi da.

50 Ti ni kachi Jesús jiin da:
—Tu kasi ra ja sa'a da, chi chaa
kenchaa tachi xaan nanu sa'a ri,
suni chindee da yo'o naa yo, chi tu
ka'an da siki yo —ni kachi ya.

**Ni nduxaan Jesús nuu
Jacobo jiin Juan**

51 Nu kuan kuyajni kivi ja kee
Jesús ñuyivi ja'a no'on ya andivi, ni
chundee ini ya ti kua'an ya ichi ñuu
Jerusalén. **52** Ni taji ya uu chaa ka
yoxnuu, ti chaa un ni ka ja'an iin
ndañuu Samaria ka nduku da nuu
kendo ya, **53** ko yivi Samaritano un
tu ni ka janta'u ja kendo ya yukan,
chi ni ka jini ja Jerusalén kua'an ya.
54 Yukan ti nu ni ka jini Jacobo jiin
Juan ja yivi Samaritano un, tu ni ka
janta'u i Jesús, ti ni ka kachi da:

—Jito'yo, kua'a ni jnu'un ti na ta'u
yo jniñu ja na jinu ñu'un andivi,
ti na xnaa yo yivi Samaritano
un, nanu ni sa'a profeta Elías na
jana'an—ni ka kachi da.

55 Yukan ti ni nde'e Jesús nuu da
naa da, ni nduxaan ya, ti ni kachi ya:

—Ro'o naa ra, tu ka jini ra na
jnu'un ka ka'an ra. **56** Chi ru'u, maa
Se'e Yívi Ñuyivi, tu vaji ri ñuyivi
ja'a ja xnaa ri yivi naa i, chi su'va,
vaji ri vee nama ri siki yivi naa i —
ni kachi ya.

Yukan na ti kuankoyo da inga ñuu
tuku.

Uu chaa ka kuni ki'in jiin Jesús

(Mt. 8.19-22)

57 Ni kuankoyo da ichi un, ti ni
kenda iin chaa ni kachi jiin Jesús:
—Jito'yo, kuni ki'in na jiin ni vasu
sava'a ni ga ichi na ki'in ni, ti ki'in
yo —ni kachi da.

58 Ti ni kachi Jesús jiin da:
—Ñukui un chi ka iyo yau kava
ka yi'i ti. Ti saa un suni ka iyo tako
ti nuu ka ndetatu ti. Ko ru'u, maa
Se'e Yívi Ñuyivi, va sa nanu iyo nuu
ndetatu ti'lì xini ri —ni kachi Jesús.

59 Yukan ti ni kachi Jesús jiin inga
da:

—Kundikun ru'u na cho'o —ni
kachi ya.

Ti ni kachi chaa un:

—Jito'yo, kundatu ni na kin
chunduji na tata na xnakan, sa chaa
na, ti na cho'o —ni kachi da.

60 Ti ni kachi Jesús jiin da:

—Jini ra ja ka iyo yivi un ja
kanchuku i nanu ndiyi, chi tu ka
chunso'o i jnu'un Yandios. Ti sia
yivi un na chunduji jna'an maa
i. Ko ro'o, kin xna'an ra jnu'un
Yandios nau yivi kuu kivikoyo i
nda'a maa ya, ja na ta'u ya jniñu
nuu i —ni kachi ya.

61 Yukan ti ni kenda inga chaa ni
kachi jiin ya:

—Jito'yo, kuni ki'in na jiin ni, ko
kundatu ni na kin kanxia'u na jiin
yivi ni ka kendo ve'e na —ni kachi
da.

62 Ti ni kachi Jesús jiin da:

—Sa'a yo nanu ja iyo yivi ni
chisojnu'un ja na kin kunukuachi
i nuu Yandios, ko tu kundee i jiin
jnu'un ni chiso i un. Yivi un kuu
nanu iin chaa ki'in latu da ja na
kutu da itu da, ko tu kundee da
xndi'i da jniñu un. Ti yivi un tu
kaxaan ja kunukuachi i nuu ta'u
Yandios jniñu —ni kachi Jesús.

Ni taji Jesús uni xiko uxi ndaja'a ya

10 **Nu ni ya'a yukan na ti ni**
nakaji Jito'yo Jesús uni

xiko uxi ga yivi, ti ni taji ya ndi uu ndi uu da ka yoxnuu da kuankoyo da taka ñuu nuu ki'in maa ya,² ti ni kachi ya jiin da naa da:

—Jniñu Yandios kuu nanu kivi ka nastutu yo triu, chi jandaa ndixia kuu ja, ja ni kuu ja te'nde triu un, ko jaku ni muzu iyo ja kin sajniñu un. Sia'an kuu yivi ja'a naa i, chi nda'u ka sa'a i ja tundo xndaku nuu i, chi kumani chaa kin xndaku un. Yukan kuu ja ka'an ri ja kakanta'u nuu maa Yandios, ya xiin jniñu un, ti na chu'un ya muzu kin nastutu jniñu un.³ Kuankoyo naa ra, ko nduku ndee ra, chi taji ri ro'o naa ra nanu riñ ja kua'an ti nuu ka'iin kuiti xaan.⁴ Tu kundiso ra xu'un ni ñunu staa ja kuu ichi, ti tu kunda'a ra ndijña, ti koto jakuñi ra ja kanxia'u konu'un ra jiin yivi ichi naa ra.⁵ Nu ka kivi ra iin ve'e ko xnaka kachi ra: “Na kukuee ja kuu ve'e ja'a.”⁶ Ti nu yukan kanchuku yivi va'a ini, jiin jnu'un kukuee, ti na kuu ja kuu yivi un naa i. Ko nu tu va'a ini yivi un, va tu kukuee kanchuku i. Kanxia'u jiin i ti kuankoyo naa ra.⁷ Kendo ve'e nuu kanchuku yivi va'a ini, ti kaji ra ko'o ra ndoo na kua'a yivi un nuu ra naa ra, chi iin chaa sa'a jniñu, suni iyo ichi da ja kinya'u da. Ti koto kakanuu ra naa ra ja ndukunuu ra inga ve'e.

⁸Nu ni jakoyo ra iin ñuu naa ra, ti kaji vasu ndoo na kua'a yivi nuu ra naa ra.⁹ Sa'a tajna yivi ka ku'u ka iyo yukan naa ra, ti kachi jiin i: “Jiin jniñu ña'nú un ja ni ka jini ra ja, ja ni jaa kivi ta'u Yandios jniñu, ti kuu kivi ra nda'a ya na ta'u ya jniñu nuu ra naa ra.”¹⁰ Ko nu na

jakoyo ra iin ñuu nuu tu kuanta'u yivi ro'o naa ra, kekoyo ichi un, ti kachi naa ra:¹¹ “Undi tikacha ñu'un ñuu ra ja ni jniñ ja'a ri naa ri, na kisi ri, ti yukan na kuu seña ja tu ni ka janta'u ra ru'u naa ri. Ko kuñkuu ini ra ja, ja ni jaa kivi ja kivikoyo ra nda'a Yandios ja na ta'u ya jniñu nuu ra naa ra”, kachi ra nuu yivi ñuu un.¹² Na kachi ri ja nu na chaa juicio, ti ka'nu ga kuu nundo'o ja kuu ñuu un, ti ansu yivi ñuu Sodoma —kachi Jesús.

Yivi ñuu ni ka nduni'in ini

(Mt. 11.20-24)

¹³Siiñ Jesús xndaku ya, ti ni kachi ya:

—iNa xaan nda'u ro'o yivi ñuu Corazín! iNa xaan nda'u ro'o yivi ñuu Betsaida! Sa ti ñuu Tiro jiin Sidón ni sa'a ri taka jniñu ña'nú un nava ni sa'a ri nuu ñuu ra naa ra, va ja ni kuu na'an ni ka nakani ini yivi un niku, ti ku'un i sa'ma nda'u, ti kuchi i yaa, ja na kuu seña i ja ni ka nakani ini i.¹⁴ Ko na kachi ri ja kivi nu na chaa juicio, ti ni'l'in ga kii nundo'o siki ra ja kuu yivi ñuu Tiro jiin Sidón.¹⁵ Ti ro'o, yivi ñuu Capernaum, koto ndo'o ini ra ja nduña'nu ga ñuu ra. Chi su've nukuu ga ñuu ra, ti ndunda'u ga ja kuu taka ga ñuu —ni kachi Jesús.

¹⁶Ti ni kachi ya nuu ndaja'a ya tuku:

—Nu iin yivi na kuanta'u jnu'un ri ja ka ka'an ra, ti iin ni kuu ja kuanta'u i ru'u. Ko yivi ja tu kuanta'u ro'o naa ra, iin ni kuu ja tu kuanta'u i ru'u. Ti yivi tu ni janta'u i ru'u, iin ni kuu ja tu kuanta'u i Yandios ja ni taji ru'u nuu ñuyivi ja'a —ni kachi Jesús.

**Ni ka ndeokuñi ndi uni
xiko uxi ndaja'a Jesús**

17 Ni ka ndenda ndi uni xiko uxi chaa ni taji Jesús. Ni ka kusii ini da, ti ni ka kachi da:

—Jito'yo, undi tachi xaan un ni ka jandatu nuu na, ja ni ka ndaku ni'l'in na sivi ni —ni ka kachi da.

18 Ti ni kachi Jesús:

—Sia'an chi jini ri ja, ja ni xnaa ja'u'u un jniñu ña'nú maa, nanu ja ni sana ini, nanu iyo naa ini yo ti ndinchaa jinu iin taja nuu andivi. **19** Ti nuu ra naa ra ja ni ja'a ri jniñu ña'nú, ti kuu kuañu ra siki sava'ni ga koo xi ndisu'ma, ti kundee ra jin sava'ni ga ja jito u'u ro'o, ti ni tundo jna'an ra. **20** Ko tu kusii ini ra naa ra ja ka jandatu tachi xaan un nuu ra. Chi su'va na kusii ini ra, chi ja ni nakuni Yandios nau ka kuu ra, ti ni naki'in ya ro'o nda'a maa ya —ni kachi Jesús.

Ni kusii ini Jesús

(Mt. 11.25-27; 13.16-17)

21 Ti hora un ni kusii xaan ini Jesús ja ni sa'a Espíritu Santo, ti ni kanajaa ya nuu Yandios:

—Tata na, nakanajaa na ni'l'in ja kuu ni jito'o ja ta'u ni jniñu ni tu'u andivi jiin ni tu'u ñuyivi ja'a, chi ni xna'an ni taka jniñu ña'nú ni nuu yivi nda'u, ti ni ka chaku ini i. Chi su'va ni chisa'yí ni nuu yivi tu'va ja ndichi xini. Sia'an na koo jiin maa ni, Tata na, chi sia'an ni kuu ini maa ni —ni kachi ya.

22 Yukan ti ni ka'an Jesús nuu yivi un:

—Maa tata ri ni nakua'a ya taka jniñu ja'a nuu ri. Ti maa iin ni ya

jini nau kuu inijnuni ru'u ja kuu ri se'e ya. Ti suni ma iin ni ru'u ja kuu ri se'e ya, jini ri nau kuu inijnuni maa Tata ri Yandios. Ti suni ru'u, ja kuu ri se'e ya, na xndaku ri nuu yivi nau kuu maa Tata ri Yandios —ni kachi ya.

23 Yukan na ti ni nde'e ya nuu chaa ka skua'a jiin ya, ti ni kachi ya nuu maa ni da naa da:

—Kancha Yandios jiin taka yivi ka nde'e i jiin nduchi i taka jniñu ña'nú ja ka jini ra vijna. **24** Ti jandaa na kachi ri nuu ra naa ra, ja kua'a xaan profeta ni kikoyo na jana'an, jiin taka chaa ni ka kuu rey, ni ka ñukuu ini da ja kuni da taka ja ka jini ra ja'a vijna, ko tu ni ka jini da. Suni ni ka ñukuu ini da ja kunso'o da taka jnu'un ka jiniso'o ra ja'a vijna, ko tu ni ka jiniso'o da —kachi Jesús.

**Jnu'un iin chaa ñuu Samaria
ja ni kunda'u ini da**

25 Yukan na ti iin chaa xna'an ley Israel un, ni kenda da ni jan ka'an da jiin Jesús, chi kuni kotojnuni da ya, ti ni jikajnu'un da ya:

—Maestro, ¿nau kuu ja sa'a na ti ni ta'u na ja kuchaku na nusa ja kuu saa ni? —ni kachi da.

26 Ti ni kachi Jesús:

—¿Nasa yoso nuu tutu ley Moisés, ti naa jnu'un ka'u ra yukan, nusa? —ni kachi ya.

27 Ti ni kachi chaa xna'an ley un:

—Kachi ley un ja kuu ini nuu Jito'yo Yandios jiin ni ini ni añaú ra, jiin ni tu'u ra, undi jiin inijnuni ra, ti kunda'u ini nuu ñanijna'an ra nanu kunda'u ini ra nuu maa ra —ni kachi da.

28 Yukan na ti ni kachi Jesús jiinda:

—Jandaa kuiti ni nachiso ra. Ti nusia'an na sa'a ra, ti ni'in ta'u ra ja kuchaku ra ja kuu saa ni —ni kachi ya.

29 Ko chaa xna'an ley un, kuni nama da jnu'un ni ka'an da un nuu Jesús, ti ni kachi da:

—¿Ti nau kuu ñanijna'an na nusa? —ni kachi da.

30 Ti ni kachi Jesús jiin da:

—Na kani ri jnu'un nava ni jna'an iin chaa ni jna'an. Ni kenda da ichi ñuu Jerusalén, ti kua'an da undi ñuu Jericó. Ko ichi un ni ka kenda uu ñakui'na nuu da ja ni ka sakui'na ndajniñu da. Ni ka kenchaa taka ja yinda'a da, jiin undi sa'ma da ni ka ki'in. Ni ka ja'a tau da, ti kuankoyo, ti ni kendo chaa un katuu da nanu ndiyi. **31** Ti ndo ichi yukan ni ya'a iin sutu Israel. Ni jini da nuu katuu chaa un, ko tu ni ve'e da nuu da, ti ni ya'a da inga yu'u ichi un, ti ni ya'a da kua'an da. **32** Suni ichi un ni ya'a iin chaa Israel ja kuu da iin ndaja'a nuu sutu levita naa da. Suni ni jini da nuu katuu chaa un, ko tu ni nde'e da nuu chaa un, ti ni ya'a da kua'an da. **33** Ko iin chaa ñuu Samaria, ja kua'an da suni ichi yukan, ti nu ni jini da chaa katuu un, ni kunda'u ini da maa da. **34** Ni

tu've da nuu katuu chaa un, ti ni sa'a da tajna nuu ni tuji chaa un jiin aceite, jiin vino yinda'a da un. Ti ni suku da nuu ni tuji un jiin sa'ma. Yukan na ti ni ndani'in da chaa un, ni skaa da chaa sikí burru da, ti kua'an da jiin da undi nuu iyo iin ve'e ni kendo da. Ti ni jito va'a

da chaa jakuua un. **35** Ti inga kivi kua'an chaa ñuu Samaria un, ko ni tava da uu xu'un plata, ti ni chunaa da nuu chaa xiin ve'e un, ti ni kachi da: "Koto va'a ni chaa ja'a, ti nu ni xnaa ga ni jiin da, ti na chunaa na nuu ni kivi nandeokuñi na", ni kachi da. **36** Vijná ti kachi nuu ri, ¿nau ndi uni chaa un ni kunda'u ini nuu ñanijna'an da nusa? —ni kachi Jesús.

37 Ti ni kachi chaa xna'an ley un:

—Chaa ni kunda'u ini un kuu chaa va'a —ni kachi da.

Yukan na ti ni kachi Jesús jiin da:

—Kua'an nusa, ti siuku nava ni sa'a chaa un, ti kunda'u ini nuu taka yivi naa i —ni kachi ya.

Ni jaa Jesús ve'e Marta jiin María

38 Ti ni siin Jesús ichi kua'an ya, ti ni jaa ya iin ñuu lulu. Ti iin ña'an nani Marta yukan, ni kana ña ya kua'an ya ve'e ña. **39** Ti iyo iin ku'u Marta ja nani ña María, ti María ni nukoo ña nuu ja'a Jesús, ti ni ñuso'o ña taka jnu'un ka'an ya. **40** Ko Marta kujneñu xaan ña jiin jniñu iyo ini ve'e ña. Ti ni tu'va ña nuu Jesús, ti ni kachi ña:

—Jito'yo, tu ndi'i kuiti ini ni ja ku'u na María, ni xndoo maa iin ña saña jiin taka jniñu ja'a. Kachi ni jiin ña na chindee ña saña —ni kachi ña.

41 Ko Jesús ni kachi ya:

—iMarta! iMarta! Kujneñu xaan ra ti ndi'i xaan ini ra jiin taka jniñu un. **42** Ko vijná iyo iin ja kanuu ga ja kuu jniñu ra un. Ti María ni nakaji ña ja kanuu ga un. Ti jankivi ga naa ini ña taka jnu'un ni ñuso'o ña vijná —ni kachi ya.

**Xna'an Jesús nasa kakanta'u yo nuu
Yandios**

(Mt. 6.9-13; 7.7-11)

11 Ni kuu ja iin kivi kande
Jesús jikanta'u ya nuu
Yandios, ti nu ni ndi'i ni jikanta'u
ya, ti iin chaa kuu ndaja'a ya un, ni
kachi da:

—Jito'yo, xna'an ni saña naa na
nasa kakanta'u na, nanu ni xna'an
Juan nuu ndaja'a da —ni kachi da.

2 Ti ni kachi Jesús:

—Su've ka'an ra naa ra nuu ka
jikanta'u ra:

Tata yo Yandios, ja kancha ni
andivi.

Kava yiñu'un yo nuu maa ni, chi
maa ni kuu ja kuña'nu ga.

Jika na nuu ni ja yachi na kiji
kivi ta'u ni jniñu ña'nu nuu
niñ tu'u ñuyivi.

Ka kuni na ja yivi ñuyivi ja'a na
kuandatu i jnu'un ni, nanu
jandatu ángel kanchuku
andivi.

3 Ti kua'a ni staa na kaji na vijna
ja kuu ja ndendajnu na iin
kivi iin kivi.

4 Kuan ka'nun ini ni nuu kuachi
ka sa'a na, chi suni saña ka
janka'nun ini na nuu taka ja ka
sa'a yivi jiin na.

Ti koto ma kua'a ni jnu'un ja
kotojnuni ja'u'u un saña,
ti su've nama ni saña nuu
nundo'o un —ni kachi Jesús.

5 Ti suni ni kachi ya:

—Sa'a yo nanu ja nau ro'o iyo iin
yivi mani ra jiin, ti ñuu kuiti jaa ra
ve'e da, ti kana ra xini da, ti kachi
ra: “Amigo, kua'anuu ti uni staa
nuu ri, **6**chi iin amigo ri kua'an

da viaje, sa ni nchaa da ve'e ri, ti
tu nau ja iyo ja kua'a ri ja kaji da”,
kachi da. **7** Ti ka'an chaa xiin ve'e
un undi ini ve'e da: “Tu xnaña'an
ra ru'u, chi tu kuu ndoko ri kua'a
ri ja kuni ra, chi ka kixi se'e kuachi
ri jiin ri, ti vijna ndi'yu yux'e're ri”,
kachi da. **8** Ti kachi ri ja vasu tu
kuni da ndoko da, vasu mani ra
jiin da, ko vanuxia siin ra xnaña'an
ra nuu da. Ti ndoko da kua'a da ja
kuni ra. **9** Ja yukan kuu ja na kachi
ri: Kakanta'u nuu Yandios, ti na
kua'a ya ja kuni ra. Nduku taka ja
va'a ja iyo nuu ya, ti ni'in ra. **10** Ti
siin kakanta'u nuu ya undi ni'in ra,
nanu sa'a iin yivi ja siin i skajan i
yux'e' undi na nuña, ti sa kivi i.

11 ¿Xi iyo iin ro'o ja kuu tata suchi
kuachi, xi kua'a ra iin yuū nuu se'e
ra nu ka jikan i staa nu? ¿Xi kua'a
ra iin koo nuu i nu ka jikan i cháká
nu? **12** ¿Xi kua'a ra iin ndisu'ma
nuu i nu ka jikan i ndivi nuu ra
nu? **13** Ro'o naa ra, vasu ka sa'a
ra kuachi, ko suni iyo jniñu va'a
ka sa'a ra ja ka nduku ra ja va'a
ja kuu se'e ra. Ti suni sia'an Tata
ra Yandios, ja kancha ya andivi,
kua'a ya Espíritu Santo nu sia'an na
kakanta'u ra —ni kachi Jesús.

**Ka chakuachi da Jesús ja ndiso jniñu
ya nuu ja'u'u**

(Mt. 12.22-30; Mr. 3.19-27)

14 Ti iin kivi ni keni'in Jesús tachi
xaan un ja ni sa'a ñiñin iin chaa un.
Ko ni kee tachi xaan un kua'an, ti
ni ndoka'an chaa ñiñin un, so ni ka
naa ini yivi jiin jniñu un. **15** Ko sava
i ni ka ka'an:

—Keni'in chaa ja'a tachi xaan un,
ko jiin sivi maa ja'u'u kuña'nu un

(ja suni nani Beelzebú), ja yinda'a tak a tachi xaan un —ni ka kachi da.

¹⁶Ko sava ga yivi un, ka kuni kotojnuni da ya, ti ka jikan da iin jniñu ña'nu ja na koo nuu andivi.

¹⁷Ko maa ya ja jini va'a ya ndoo ka ndo'o ini i, ti ni kachi ya:

—Nu ndaja'a iin gobieno kusiin ini da naa da ti keja'a kanaa da naa da, ti gobieno un tu kuñii, chi naa. Ti nu tendi'i iin familia keja'a kanaa naa, ti familia un tu kuu kunchuku mani. ¹⁸Suni sia'an kuu nu maa ja'u'u un na sasiin jna'an jiin tachi xaan un, ¿ti ka jani ini ra ja nasa kuñii jiin jniñu un nusa? Na kachi ri ja'a nuu ra chi ka ka'an ra ja jiin sivi ja'u'u un kuu ja keni'in ri tachi xaan un kua'an. ¹⁹Ti nu sia'an kuu, ti va suni yivi ka skua'a jiin ra naa ra, suni kuu ja kuu keni'in i tachi xaan jiin sivi ja'u'u un. Ja sia'an ti ka stuu i ja maa ni ra ka yuji jiin jnu'un ka ka'an ra un. ²⁰Ko ru'u, jiin sivi maa Yandios keni'in ri tachi xaan un kua'an. Yukan kuu ja, ja ni chaa jniñu ña'nu Yandios ja kuu nuu ra naa ra.

²¹Ti ja siki ja'u'u un, sa'a yo nanu ja iin ni kuu nu iin chaa kaña ni'lín xaan da ja ndito va'a da ve'e da, ti ka'iin va'a ja ñava'a da un. ²²Ko nu na chaa ñinga chaa ni'lín ga ja kuu maa da, ti kundee chaa un jiin da, kuisonchaa da taka machete jiin espada ja ndito da ve'e da jiin un, ti kivi da keni'in da taka ja ñava'a chaa un. Hin ni kuu ja ni kundee ri jiin chaa u'u un, chi ni keni'in ri ndaja'a da un kua'an.

²³Ti suni na kachi ri nuu ra naa ra siki yivi ja tu ka'an va'a siki ri, ti yivi un jito u'u i ru'u. Yivi tu

kejna'an jiin ri, jachanuu i yivi ka kuni kejna'an jiin ri —kachi ya.

Hin tachi xaan ja nandeokuñi

(Mt. 12.43-45)

²⁴Sii Jesús xndaku ya, ti ni kachi ya:

—Nu iin tachi xaan na xndoo iin chaa ti ki'in, kua'an ti jikonuu nuu ñu'un ichi, nduku nuu ndetatu. Nu tu ni'in, ti ndo'o ini: “Na nandeokuñi tuku ri ve'e nuu ni kunde ri un.” ²⁵Ko nu ni najaa, ti jini ja iyo nuña ini chaa un nanu iin ve'e iyo nuña, ja iyo ndoo, ja iyo nakoo. ²⁶Yukan na ti ki'in tachi un, ti kin kuaka uxia ga tachi xaan un ja jaku ga kanda ga ja kuu maa. Yukan na ti nchaa, ti ñidivikoyo kunchuku jiin chaa un. Yukan na ti chaa un vi'i ga nduu da ansu nava ni kaa da undi nuu —ni kachi ya.

Ka'an Jesús nau yivi ndatu ga

²⁷Ni ka'an ga Jesús jnu'un un, ti ni kana ko'o iin ña'an kandichi ma'ñu yivi kua'a un xini Jesús, ti ni kachi ña:

—iXaan ga ndatu ña'an ni skaku ni'lín, ti ni skaxin ña ni'lín! —ni kachi ña.

²⁸Ti ni kachi Jesús:

—Ko su'va ndatu ga yivi ka jiniso'o jnu'un Yandios, ti ka jandatu i —ni kachi ya.

Chaa fariseo ka jikan da iin jniñu ña'nu

(Mt. 12.38-42; Mr. 8.12)

²⁹Ti ni ka nakuikonduu ni ga yivi kua'a un nuu Jesús, ti ni keja'a ka'an Jesús jnu'un ja'a:

—Taka yivi ka chaku vijna, tu kuni kuandatu i nuu Yandios, ka

kuni i ja na sa'a ri iin jniñu ña'nu nuu i. Ko jankivi sa'a ri jniñu ña'nu un, chi nini jiin vanuxii nundo'o ni jna'an Jonás, chaa ni kuu profeta na jana'an, yukan ni kuu ja xna'an ri. ³⁰Chi yivi ñuu Nínive ni ka nakuni i ja ni ka'an profeta Jonás maa jnu'un Yandios nuu i. Ti suni sia'an ru'u, maa Se'e Yivi Ñuyivi, ka'an ri jnu'un Yandios nuu ro'o naa ra vijna. ³¹Suni iin ña'an ni kuu reina ja ni ta'u jniñu iin ñuu ichi sur, nandoto ña kivi na chaa juicio, kivi na kii xndichi ya yivi kivi vijna. Ti naa ini ña nde'e ña nuu yivi kivi vijna ja ni'l'in ini i, chi maa ña undi jika xaan ni kii ña ja na kunso'o ña jnu'un ndichi ni ka'an rey Salomón, na jana'an. Ti vijna kuña'nu ga jniñu sa'a ri ja kuu Salomón, ti ro'o naa ra tu ka chunso'o ra jnu'un xndaku ri nuu ra.

³²Ti ja kuu siki ñuu Nínive, nuu ni ja'an profeta Jonás, ti yivi ni kunchuku ñuu un, nandoto i kivi na chaa juicio ja xndichi ya yivi kivi vijna, ti naa ini i nde'e i nuu yivi kivi vijna, chi tendil'i yivi ñuu Nínive ni ka nakani ini i na ni ka'an profeta Jonás jnu'un Yandios nuu i. Ko ru'u, chi kuña'nu ga jniñu sa'a ri ja kuu Jonás, ti ro'o naa ra, tu ka chunso'o ra tu nakani ini ra naa ra —ni kachi Jesús.

Jnu'un iin yiti

(Mt. 5.15; 6.22-23)

³³Siin Jesús xndaku ya, ti ni kachi ya:

—Tu ni iin yivi ja skuikun iin yiti, ti chisa'yí chii iin janu. Chi su'va kani i yiti un nuu sukun nava na kundijin nuu yivi ja kivi ini ve'e.

³⁴Ti nduchi yo kuu nanu iin yiti ja kuu yiki kuñu yo, ti nuu nduchi ra iyo ndijin, ti suni sia'an iyo va'a ni yiki kuñu ra. Ko nu nduchi ra tu kundijin, ti NASA kundijin na ichi ki'in ra nusa. Ti ñuñaa kua'an ra nu sia'an, ti sana ini ra ti nduva ra. ¿Ti NASA ndoko ra ja ñaa xaan ichi kua'an un nusa? ³⁵Koto yukun inijnuni ra jiin jnu'un ka'an ri nava tu naa ini ra. ³⁶Ko nu kujnuni va'a ini ra jnu'un ka'an ri, ti tu naa ini ra, chi ñukuu ini ra. Chi ja ni nakuni ndijin ra ja ichi Yandios kuu nu ki'in ra nanu ja nu ndinchaa nduva yiti ja kundijin ichi ki'in ra ñuñaa —ni kachi ya.

Ni kanajiiin Jesús nuu chaa fariseo jiin chaa ka xna'an ley Israel

(Mt. 23.1-36; Mr. 12.38-40; Lc. 20.45-47)

³⁷Nu ni ndi'i ni ka'an Jesús jnu'un un, ti iin chaa fariseo ni kana da Jesús ja na kaji ya staa jiin da ve'e da. Ni jaa ya ve'e da, ti ni nukoo ya mesa ja kee ya staa jiin da. ³⁸Ko ni naa ini chaa fariseo un nu ni jini da, ja tu ni nanda'a ya nava iyo jnu'un ja xnaka ka nanda'a da tijni jinu, sa ka yee da staa.

³⁹Ko maa Jito'yo ni kachi ya:
—Ro'o chaa fariseo naa ra,
ndundoo ko'o ndundoo yajin ra, chi
ndo'o ini ra ja ka iyo ndoo ra nuu
Yandios, vasu jaku ga kanda ra. Ka
kuu ra nanu yivi ka nakacha nini
ichi jata ko'o i jiin yajin i, ko tu ka
nakacha i ichi ini, vasu jña'an ga
ichi ini un. Sia'an ka kuu ra, chi
ka ndo'o ini ra ja ka kuu ra yivi
va'a, vasu mani jnu'un kui'na jiin
taka ga jnu'un kue'e ka ñu'un ini
ra. ⁴⁰¡Yivi ni'l'in ini ka kuu ra! iXi tu

jini ra ja Yandios ni sa'a ya ni tu'u yíkí kuñu ra jiin añu ra, ti ni ja'a ya inijnuni ra! ⁴¹ Ja yukan kuu ja nakani ini naa ra, ti nakua'a taka ja ni ka jisonchaa ra nuu yívi nda'u un. Sia'an na ti ka stuu ra ja, ja ni ka nundoo undi ini añu ra ja kuu nuu Yandios.

⁴² iXaan ga nda'u ro'o naa ra chaa fariseo! Chi ka siuku ra taka jniñu kuachi, ti tu ka siuku ra jniñu kanuu ja kuu nuu Yandios. Chi jakuu ni ka ja'a ra nuu taka ja ka ñava'a ra, ka ja'a ra ja kuu nuu chaa junukuachi nuu Yandios. Ka ja'a ra jakuu nuu taka ja yí'lí xiko asun nanu ita tamino, jiin ruda, jiin sava'ni ga inka nuu yuku tajna, jiin yuku yí'lí xiko asun. Taka un ka sa'a ra, ko ni ka naa ini ra jnu'un kanuu ga ja kaka ndaa ra nuu ichi Yandios, ti kuu ini ra nuu ya. Taka ja'a kanuu ga ja sa'a ra, ti koto naa ini ra ja kual'a ra taka nuu ja kaa ñava'a ra un.

⁴³ iXaan ga nda'u ro'o chaa fariseo naa ra! Chi ka jajna'an ini ra jnu'un yíñu'un ga nuu nukoo ra ini veñu'un Israel un. Ti kuni ra ja na ka'an yíñu'un yívi jiin ra nuu ya'u. ⁴⁴ iXaan ga nda'u ro'o ja ka xna'an jiin chaa fariseo naa ra! Ka kuu ra nanu ñaña ndiyi ja ni nda've chi ka ya'a yívi siki, ko tu ka jini i ja kande ndiyi chii un. Ti sia'an ka kuu ro'o naa ra, chi yívi ka kandixia jnu'un ra, va tu chaku ini i ja jnu'un ra kuu nanu ndiyi ja kuan te'yu —ni kachi Jesús.

⁴⁵ Yukan ti ni nachiso iin chaa xna'an ley un:

—Maestro, jiin jnu'un ni ka'an ni un suni ni ka'an ndeva'a ni siki na naa na —kachi da.

⁴⁶ Ti ni kachi Jesús:

—iSuni xaan ga nda'u tu ro'o ja ka xna'an ley! Kua'a jnu'un ka xna'an ra, ti ta'u ra jniñu ja na siuku yívi jnu'un un naa i, vasu maa ra naa ra, tu ka siuku kuiti ra jnu'un un.

⁴⁷ iNa nda'u ra naa ra! Chi ka sa'a ra nama nuu ñaña chaa ni ka kuu profeta na jana'an ja ni ka ja'ní ndiyi velu ra naa da. ⁴⁸ Jiin jniñu ka sa'a ra vijna, jini yo ja ka kejna'an ini ra jiin jniñu ni ka sa'a ndiyi velu ra, chi maa da ni ka sa'a ja ni ka ji'lí profeta un. Ti vijna ro'o naa ra, ka nasa'a ra nama nuu ñaña ndiyi ni ka kuu profeta un. ⁴⁹ Ja siki yukan kuu ja undi jana'an ni kachi Yandios iin jnu'un ndichi: “Taji ri profeta ja na ka'an da jnu'un ri jiin chaa kuu apóstol nuu yívi naa i, ti sava da ka'ní yívi da, ti sava ga da koto u'u yívi da naa da.” ⁵⁰ Ko ro'o naa ra jiin taka ga yívi ka iyo kívi vijna, chi kandiso ra niñi chaa ni ka kuu profeta ja ni ka ji'lí da undi na ni nukoo ñuyivi. ⁵¹ Kandiso ra undi niñi Abel jiin niñi Zacarías, ja ni ka ja'ní jna'an ra jana'an sava ma'ñu altar jiin ve'e ii ini veñu'un Israel un. Ti na kachi ndaa ri nuu ra naa ra ja taka nundo'o un nanduku jnu'un Yandios, ti kii kuachi un siki taka yívi kanchuku kívi vijna.

⁵² iXaan ga nda'u ro'o chaa ka xna'an ley! Chi jiin jnu'un ra ka jasi ra ja na chunso'o yívi jnu'un Yandios. Ti ni maa ra tu ka kuni chunso'o ra jnu'un ya, ni tu ka ja'a ra jnu'un ja kunso'o yívi ka kuni skual'a jnu'un ya —ni kachi ya.

⁵³ Ti nu ni ka'an Jesús taka jnu'un un, ti chaa ka xna'an ley jiin chaa fariseo, ni ka kuiti xaan ini da nuu

ya. Ti ni ka keja'a ka xnaña'an da jiin tijni jnu'un ka jikajnu'un da nuu ya,⁵⁴ ja ka nduku da na ndee nuu tu yuji ya iin jnu'un ka'an ya, nava yukan ti kuu kankuachi da siki ya.

Xndaku Jesús siki jnu'un fariseo
(Mt. 10.26-27)

12 Ti ni kakuu da sia'an ti yachi xaan ni ka kututu tijni mil yivi naa i, ti ni ka tako yivi ja undi ka jaxin jna'an i naa i. Ti ni jakunchaa Jesús xndaku ya nini nuu maa ni ndaja'a ya, ti ni kachi ya:

—Koto maa ra naa ra jiin jnu'un ka ka'an chaa fariseo, chi yachi xaan kuan kuichanuu nanu keni'no levadura chii yujña staa stila. Ka kenda da nanu chaa va'a ga, ko vanuxia mani jnu'un xndoña'an kuu.
² Chi tu iyo ni iin ja kendo sa'yí ja kuu nuu Yandios, chi tako ni kenda nuu ndijin. Ni tu iyo ni iin ja yisa'yí ja tu kuni ndaa yo, chi tako ni kuni ndaa yo. ³ Ti tako jnu'un ni ka ndajnu'un xe'e ra jiin yivi, ti kenda ndijin vasu tu nau inga yivi ni jiniso'o. Vasu ni ka jasi ra yux'e, ti ni ka ndajnu'un ra un, ko kuichanuu kílin, ti ya yukan kani yivi jnu'un un —ni kachi Jesús.

Xndaku ya siki nau kuu ja na koyu'u yo
(Mt. 10.28-31)

⁴ Siin Jesús xndaku ya nuu ndaja'a ya, ti ni kachi ya:

—Ro'o naa ra, amigo ri, na kachi ri ja tu koyu'u ra koto ra yivi ja'ní yíki kuñu, chi nu na ka'ní i ro'o ko nini yíki kuñu ra ka'ní i. ⁵ Ko na kachi ri nuu ra nau iin ja koyu'u

ra nde'e ra. Koyu'u ra Yandios, chi maa ya ndiso jniñu ña'nú ja xnaa ndí'i ya ro'o, ti kuu chunde ya ro'o nuu infiernu. Ti yukan ndixia kuu ja koyu'u ra ya.

⁶ Maa Yandios kuu ja kachi nasa koo jiin ra naa ra. Jini yo ja jandaa kuu yukan, chi undi u'un saa kuachi un, ka kuya'u ti ja uu pesu, ko jito va'a Yandios ti, chi ni iin ti tu naa ini ya. ⁷ Ti ja kuu ro'o naa ra, chi undi ixi xini ra ni ka'u ya ndí iin ndí iin. Yukan kuu ja koto xndí'i ra ini ra chi ya'u ga nchaa ra naa ra nuu Yandios ja kuu iin jniñ saa kuachi un —kachi Jesús.

Yivi ka'an ndaa ja'a Cristo Jesús nuu inga yivi

(Mt. 10:32-33; 12:32; 10:19-20)

⁸ Siin Jesús xndaku, ti ni kachi ya:
 —Ti na kachi ri ja tako yivi nu na ka'an ndaa i, ti stuu i ru'u nuu inga yivi, suni ru'u, maa Se'e Yivi Ñuyivi, suni ka'an ndaa ri ja stuu ri yivi un nuu ángel ka junukuachi nuu Yandios. ⁹ Ko nu na chisa'yí i ru'u nuu yivi, suni sia'an skexiko ri yivi un nuu ángel ka junukuachi nuu Yandios, chi kachi ri ja tu ka yíi i jiin ri.

¹⁰ Suni na kachi ri ja sava'a ni ga yivi na ka'an ndeva'a siki ru'u, ja kuu ri maa Se'e Yivi Ñuyivi, va iyo jnu'un ka'nú ini nuu i. Ko nu iin yivi na ka'an ndeva'a siki Espíritu Santo, jankívi iyo jnu'un ka'nú ini nuu i. ¹¹ Nu na jniñ chaa ka kuñá'nú ini veñu'un Israel ro'o naa ra, xi stisia, xi juez jniñ da ro'o naa ra, ti koto ma xndí'i ra ini ra naa ra ja nasa koo jnu'un ka'an ra. ¹² Chi nu na jaa hora ka'an ra, ti maa Espíritu

Santo kachi nasa koo jnu'un ka'an ra hora un —ni kachi ya.

Síki ja tu kundio ini yo kuu riku yo

¹³Ti iin yivi kandichi ma'ñu yivi kua'a un ni kachi jiin Jesús:
—Maestro, kachi ni jiin ñani na, na kua'a da ti'lí ñu'un kuu ta'u na —kachi da.

¹⁴Ko ni kachi Jesús:
—¿Ndoo ka'an ra sia'an? Ti tu kuu ri juez ja tejna'an ri ta'u ra naa ra —ni kachi ya.

¹⁵Ti suni ni kachi ya nuu yivi un:
—Nde'e, koto va'a maa ra naa ra, ti koto kundio ini ra ja kuñava'a kua'a ra ndajniñu ja kuu riku ra. ¹⁶Ti va nu ja kua'a xaan ja ñava'a ra, ti nama un ro'o ja kuchaku na'an ra nu? —ni kachi Jesús.

¹⁶Yukan na ti ni ka'an ya jnu'un ja'a nuu yivi un:

—Ni iyo iin chaa riko xaan ja ni ñava'a kua'a da ñu'un, ti va'a xaan ni kuu itu da. ¹⁷Ti ni keja'a ndo'o ini chaa riko un: “¿Nasa sa'a ri vijna? Ti tukaa ga nuña yaka nuu ku'un niñi ri.” ¹⁸Yukan ti ni ndo'o ini da: “Su'va na sa'a ri. Na kanu ndi'i ri taka yaka ri, ti na sa'a ri iin ja ka'nun ga, ti yukan kujaa sava'a ndi'i ri niñi ri jiin taka ja ñava'a ri.

¹⁹Yukan ti kachi ri: Vijná ti kua'a xaan ja ñava'a ri ti kujaa ja kuu tijni kuiya. Vijná ti na ndetatu ri, ti kaji ko'o ri ja jnu'un siii ini”, kachi da, ndo'o ini da. ²⁰Ko ni kachi Yandios jiin da: “iChaa ñaa kuu ra! Ja tu jini ra ja jakuaa vijná kuú ra. ²¹Ti ndoo kendo jiin taka ja ñava'a ra un nusa”? ni kachi ya. ²²Sia'an ka jna'an yivi kandio ini ja kuu riku i naa i, ti tu ka nakututu ini i ja kuu

ta'u i nuu Yandios, naa i —ni kachi Jesús.

Jito Yandios yivi ya

(Mt. 6.25-34)

²²Yukan sa ni kachi Jesús jiin ndaja'a ya:

—Na kachi ri nuu ra naa ra, ja koto maa xndi'i ra ini ra ja kuu ja kaji ra, ja na kuchaku ra, xi ja kuu sa'ma ku'un ra naa ra. ²³Chi nu ni ja'a Yandios ja kuchaku ra, va suni kua'a ya ja kaji ra jiin sa'ma ku'un ra. ²⁴Nde'e naa ra nasa chaku tikaka un. Tu naa jniñu ka sa'a ti ja nastutu ti ini yaka ti, ko maa Yandios jito ya ti ja ka yee ti. ²⁵¿Ti ansu kanuu ga ro'o naa ra ja kuu kuiti un nu? ²⁶¿Ko ndoo ni'in ra naa ra vasu na xndi'i xaan ini ra jiin ja kuchaku ra, xi ja kundii kusuku ra yukan? Tu nijníñu ja sia'an ka xndi'i xaan ini ra, chi ni tu ni'in ra ja va'a ga ja kuu ra. ²⁷Nu tu kuu sa'a ra vasu iin jniñu lulu sia'an, ²⁸¿ti ndoo xaan ka ndi'i ini ra ja kuu taka ga ja kuchaku ra nusa?

²⁷Ko nde'e naa ra, nasa ja'nú ita yuku un, ti tu jini yo nasa ja'nú, ko vii xaan kanda. Ko na kachi ri ja ni rey ni nani Salomón na jana'an, tu ni suku da nanu ita yuku un, vasu vii xaan ni kaa sa'ma da. ²⁸Ti maa Yandios skua'nú ya ita yuku un, ti vii xaan na skutu ya i. Ko vasu vii xaan kanda vijná, ti ijña ja ni ichi, ti ka'ma ya nuu ñu'un ini horno. Ja yukan kuu ja nu sia'an sa'a Yandios, ja jito ya ita yuku un, ²⁹¿ti ansu kanuu ga ro'o naa ra ja jito va'a ya ro'o naa ra nu? Ko ka ndi'i xaan ini ra, chi tu kandixia ndaa ra ja maa Tata ra Yandios jito va'a ya ro'o naa

ra. ²⁹Ja yukan kuu ja tu nakukutu ini ra kuyaku ra ja nduku ra nasa kaji ra, nasa ko'o ra. ³⁰Chi taka un ka nduku yivi naa i ja tu ka nakuni i nau kuu Yandios, ko ro'o naa ra, iyo ⁱⁱⁱⁿ Tata ra ja kuu Yandios kancha andivi, ti ja jini ya ja taka un ka nandi'i ra naa ra. ³¹Ti ro'o naa ra kukutu ini ja na kivi ra nda'a Yandios ja na ta'u ya jniñu nuu ra naa ra. Ti nu na kundio ini ra un, ti kua'a ya taka ja ka nandi'i ra ja kuchaku ra naa ra —ni kachi Jesús.

Nasa ni'in yo yaji yo

(Mt. 6.19-21)

³²Siiin Jesús xndaku ya nuu ndaja'a ya, ti ni kachi ya:

—Koto yu'u ra naa ra chi ka kuu ra nanu ⁱⁱⁱⁿ ataju lulu ri, ja ndito va'a jito'o ti maa ti, ti ru'u ndito va'a ri ro'o naa ra. Ti maa Tata ri ja ni ja'a ya jnu'un ja na ndivi ra ñuu nuu ta'u ya jniñu. ³³Ti koto xndi'i ini ra ja ni'in ra kua'a ndajniñu nuu ñuyivi ja'a. Va'a ga kua'an ti xiko ra taka ja ka ñava'a ra, ti kua'a xu'un un nuu yivi nda'u naa i. Sia'an ti sa nakaya ta'u ra nuu Yandios ja kancha ya andivi, ti yukan tu kututu nanu nu sava'a yo xu'un ini ⁱⁱⁱⁿ jajnu. Ti andivi yukan tu kivi ñakui'na, ni tikixin tu kivi ti ja stivi ti. ³⁴Ti sava'ni ga nanu ndo'o ini ra ja nakaya ra yaji ra, ti yukan kundio ini ra ja na ni'in ra —ni kachi ya.

Na kotu'va yo kivi chaa Jesús

³⁵Siiin Jesús xndaku ya nuu ndaja'a ya, ti ni kachi ya:

—Va'a nusa, ti suni koto maa ra naa ra, kotu'va ra ja kuu kivi

nchaa jito'o ra, ³⁶nanu ⁱⁱⁱⁿ muzu ja kayu kayu ni candil da, ja ndatu da jito'o da vendi da nu ni ja'an da ⁱⁱⁱⁿ viko nanda'a. Ti muzu un kuiña da yux'e sava'ni ga hora na nchaa amu da. ³⁷Ko ndatu muzu un, nu na nchaa jito'o da ti kuni da ja ndito muzu da. Ti na kachi ri ja maa jito'o da un, su'va kuanukuachi da, chi sava'a da mesa da, ti kana da muzu da un ja na nukoo da ti kee da staa. ³⁸Ti kee va'a muzu un nu ndito da sava'ni ga hora na nchaa jito'o da, va'a ni ñuu, xi kuan ndii ni ga. ³⁹Nde'e naa ra, sa ti ⁱⁱⁱⁿ chaa xiin ve'e ja jini da na hora jaa ñakui'na ve'e da ⁱⁱⁱⁿ jakuua, va kondito da, ti tu kua'a da jnu'un ja sakui'na ve'e da, ti tava ndajniñu da. ⁴⁰Ja yukan kuu ja suni kotu'va ra naa ra, chi jaa ⁱⁱⁱⁿ kivi, ti sana ini ra, ti nchaa ru'u, ja kuu ri maa Se'e Yivi Ñuyivi —ni kachi ya.

Siki muzu va'a jiin muzu tu jandatu

(Mt. 24.45-51)

⁴¹Yukan ti ni jikan jnu'un Pedro ya:

—Jito'yo, ¿nuu taka maa ni na ni ka'an ni jnu'un ja'a, xi ni ka'an ni ja kuu tendi'i yivi nu? —ni kachi da.

⁴²Ti ni kachi maa Jito'yo:

—Chaa kuu muzu va'a ja junukuachi ndaa un, ti kanu ini chaa xiin ve'e un ja na kinda'a da uu ga muzu un, ti suni jiin hora na kua'a da ja kaji uu ga muzu un. ⁴³Ndatu chaa kuu muzu un nu na najaa chaa xiin ve'e un, ti kuni da chaa siuku da nava ni ta'u jniñu nuu da. ⁴⁴Ti na kachi ndaa ri ja kusii ini maa jito'o da un, ti xndoo da chaa ja na kinda'a da

taka ja ñava'a da un. ⁴⁵Ko nu chaa junukuachi un na sa'a ndeva'a da, chi ndo'o ini da ja kukuee ga jito'o da un, ti keja'a nduxaan da nuu uu ga muzu un, jiin ña'an ka junukuachi, ti keja'a kaji ko'o da ti keja'a najini da. ⁴⁶Yukan ti iyo naa ini da ti nchaa jito'o da. Ti kua'a da tau chaa un jiin iin nundo'o ja jna'nunu ndatu da. Sia'an ka jna'an yivi tu ka ñukuu kuiti ini i Yandios.

⁴⁷Ko muzu ja tu chunso'o taka jniñu kuni jito'o da ja sa'a da, vasu jini da jniñu ta'u jito'o da, ti tu jandatu da ja siuku da taka nava kuni jito'o da, ni tu iyo tu'va da ja kuu kivi nchaa jito'o da. Ti muzu un, ndo'o xaan da. ⁴⁸Ko muzu ja tu jini na jniñu kuni jito'o da ja sa'a da, ti sa'a da iin jniñu ja tu jajna'an ini jito'o da, ti muzu un jaku ni ndo'o da. Chi vanuxia tu ni kujnuni ini da naa jniñu kuni jito'o da. Suni sia'an kuu jiin iin yivi ni kutu'va va'a chi kua'a ja nakua'a i jnu'un, chi jito'o i kuni ja na kuanukuachi va'a i nuu da, ti na siuku ndaa i jiin taka jniñu ni ta'u da nuu i —ni kachi ya.

Ja siki Jesùs, ti kusiin ini yivi naa i
(Mt. 10.34-36)

⁴⁹Siin Jesùs xndaku ya nuu ndaja'a ya, ti ni kachi ya:
—Ru'u ni chaa ri, ko so ja na skuikun ri ñu'un, nanu ka naka'ma yo icha ja na ndundoo yuku. Chi ka iyo sava yivi ja nasa'a ndoo ri undi ini aña i, ko ka iyo sava yivi ni'in ini, ti ja kuu yivi un, kuu ri nanu iin ñu'un nuu ka naka'ma yivi yuku, chi xnaa ri yivi un. Chi yukan kuu ja ve sa'a ri. ⁵⁰Ko iyo iin nundo'o kii siki ri, nanu nundo'o

jna'an iin yivi keka'nunu chii nducha. Ti kukui'ya xaan ini ri jiin nundo'o ja'a undi na siuku ndi'i ri. ⁵¹¿Xi ka jani ini ra ja ni chaa ri, ti sa'a ri ja na kunchuku mani yivi naa i nuu ñuyiví ja'a nu? Ko na kachi ri ja tuu. Chi su'va kusiin ini yivi naa i ja siki ru'u. ⁵²Ti undi vijna keja'a kusiin ini yivi ja siki ru'u. Chi nu ka iyo u'un yivi ini iin ve'e, uni yivi un, tu kuanta'u i ru'u, ti uu ga yivi un, tu kuanta'u i ru'u. ⁵³Ti chunsama ini tata jiin se'e ja tu kunchuku mani ti koto u'u jna'an i. Ti koto u'u nana jiin se'e si'i, ti se'e si'i jiin nana. Koto u'u se'e janu un jiin nana chiso, ti nana chiso un jiin se'e janu —ni kachi ya.

Nasa na kani kivi
(Mt. 16.1-4; Mr. 8.11-13)

⁵⁴Ni ndi'i ni ka'an ya nuu ndaja'a ya, ti ni ka'an tuku ya nuu yivi kua'a un. Ti ni kachi ya:

—Nu ni ka jini ra nuu ku'iin viko ichi nuu kee ndikandii, ti ka ka'an ra ja kua'i sau, ti sia'an kuu ndixia. ⁵⁵Ti nu ni keja'a kee tachi ichi vee, ti ka ka'an ra ja nandii, ti jandaa ndixia kuu. ⁵⁶Ko chaa ñaa xini ka kuu ra, vasu tu'va ra, ko ka xndoña'an ra. Chi ka jini va'a ra nasa nakani kivi nuu andivi jiin ja ndenda nuu ñu'un, ¿ti nasa kuu ja tu ka chaku ini ra nau ja kuu ru'u, ja sa'a ri taka jniñu ña'nunu kivi vijna nusa? —ni kachi ya.

Kanuu ndumani yo jiin yivi jito u'u yo'o
(Mt. 5.25-26)

⁵⁷Siin xndaku Jesùs nuu yivi un, ti ni kachi ya:

—Kani ini nuu jniñu ña'nú sa'a ri, nanu ja ka nakani ini ra nasa ndumani ra jiin yívi kankuachi ja'a ra. ⁵⁸Chi nu iin yívi na kankuachi ja'a ra, ti ki'in ra ve'e sticia.

Xnakan ndajnu'un mani naa ra ichi kuankoyo ra ti na kukuee, nava tukaa ga ki'in da jiin ra ve'e sticia, chi nakua'a juez un ro'o nuu policia, ti chindiyu da ro'o vekaa. ⁵⁹Ti na kachi ndaa ri nuu ra naa ra ja tu kaña ra yukan undi nu tu chunaa ndi'i ra xu'un tau ra un —ni kachi Jesús.

**Kanuu ja na nakani ini
yo nuu kuachi yo**

13 Ti kivi yukan ni ka chakoyo tijni chaa, ti ni ka jani da jnu'un nuu Jesús nava ni sa'a gobernador Pilato jiin tijni chaa ñuu Galilea, ja nanu ka ja'ní da kuiti ja soko da nuu Yandios ni jakoyo soldado Pilato ti ni ka ja'ní da chaa Galilea un, ti undi ni ka nasakanuu niñi da jiin niñi kuiti un. ²Ti ni kachi Jesús:

—Va nu ja sia'an ni ka jna'an chaa un, ti ka ndo'o ini ra ja iyo ga kuachi maa da ja kuu taka ga chaa ñuu Galilea un. ³Ko na kachi ri ja tuu. Chi ro'o naa ra, nu tu nakani ini ra nuu kuachi ra, ti suni jna'nu ndatu ra ti xnaa ra maa ra. ⁴Xi ka jani ini ra ja ndi'i xia'un uni yívi ja ni ka ji'i chii torre Siloé na ni nduva siki da, xi ni iyo ga kuachi chaa un ja kuu taka ga yívi kanchuku ñuu Jerusalén nu? ⁵Ko na kachi ri ja tuu. Chi ro'o naa ra, nu tu nakani ini ra nuu kuachi ra, ti suni jna'nu ndatu ra ti xnaa ra maa ra —ni kachi ya.

Siki nutichi vixi ja tu ja'a tichi

⁶Yukan ti ni kachi Jesús jnu'un ja'a, ja xna'an ya nau kuu yívi ja tu siuku jnu'un xndaku Yandios:

—Kuu i nanu iin nutichi vixi ja kandichi nuu ñu'un iin yívi, ti chaa xiin un jan nduku da tichi vixi xini yujnu un, ko tundo ni'in da. ⁷Yukan na ti ni kachi da jiin chaa ndito ñu'un da un: “Vijná ti ja ni kuu uni kuiya kin nduku ri tichi vixi xini yujnu ja'a, ko tu ja'a ni iin tichi. Ki'in ti ka'ncha ra va'a ga, chi so xnaña'an kandichi nuu ñu'un ja'a”, ni kachi da. ⁸Ko ni kachi chaa ndito ñu'un un: “Taa, sia ni na kundichi ti'lí ga kuiya vijná, na staya na ñu'un ja'a, ti na chi'i na ja'an. ⁹Na nde'e yo nu tu kuun tichi xini inga kuiya. Ti nu tuu, ti sa ka'ncha ni”, ni kachi muzu un —ni kachi ya.

**iin kivi ni sa'a Jesús tajna
iin ña'an ni kuu ti'i siki**

¹⁰Ni kuu ja iin kivi ndetatu, kande Jesús ini iin veñu'un Israel ja xna'an ya, ¹¹ti yukan kande iin ña'an ja, ja ni kuu xia'un uni kuiya ku'u ña. Ja ni kuu ti'i siki ña ni sa'a iin tachi xaan, ti tu kuu kuiti kaka ndaa ña. ¹²Ti nu ni jini Jesús maa ña, ni kana ya ña, ti ni kachi ya:

—Ro'o ñasi'i, vijná ti nduva'a ra jiin kue'e ra —ni kachi ya.

¹³Ti ni chuxndee ya nda'a ya xini ña, ti hora ni, ni ndokuiñi ndaa ña. Ti ni keja'a ña nakanajaa ña Yandios. ¹⁴Ko chaa ndiso jniñu ini veñu'un un, ni kuiti ini da, chi Jesús ni sa'a ya tajna kivi ndetatu un. Ti ni kachi da nuu yívi un naa i:

—Iyo iñu kivi ja sa'a yo jniñu, ti nuu iin kivi un kikoyo ra ja nduva'a ra, ti ansu ja kikoyo ra kivi ndetatu ja'a —ni kachi da.

15 Ko ni kachi Jito'yo jiin da:

—Chaa xnda'u ka kuu ra. ¿Va nu tu ka ndaji ra xndiki ra naa ra xi burru ra ja kin sko'o ra ti nducha iin kivi ndetatu nu? **16** Ti ña'an ja'a ja kuu ña ñanijna'an tata yo Abraham na jana'an, chi na kaa ni ndikun ña xia'un uni kuiya ni sa'a ja'u'u un. ¿Xi tu kuu kenchaa yo kue'e jna'an ña un vijnal kivi ndetatu nu? —ni kachi ya.

17 Ti nu ni ka'an ya sia'an, ti ni kukanuu chaa jito u'u ya un, ko taká ga yivi kua'a un ni ka kusii ini jiin jniñu ña'nú ni sa'a ya un.

Jnu'un iin ndikin lulu

(Mt. 13.31-32; Mr. 4.30-32)

18 Yukan na ti ni kachi Jesú:

—Na ka'an ri iin jnu'un nuu ra nava kuni ra nasa kuu ja ka nakaya yivi ta'u Yandios jniñu nuu i. **19** Sia'an kuu nanu iin ndikin lulu, ja nu ni xndee iin yivi nuu ñu'un i, ti yukan keja'a ja'nú undi kuu iin yujnu ka'lú xaan, ti yukan ka ja'an saa un ka sa'a ti taká ti nuu nda'a yujnu un —ni kachi ya.

Jnu'un levadura

(Mt. 13.33)

20 Suni ni ka'an tuku Jesú:

—Sia'an ka nakaya yivi ta'u Yandios jniñu nuu. **21** Kuu i nanu iin levadura ja ki'in iin ñasi'i ti sakanuu ña jiin uni kilo yuchi triu, ti sa'a levadura un ja na najinu ni tu'u chii yujna un —ni kachi Jesú.

Yii ja ka kivi yo nuu ta'u Yandios jniñu

(Mt. 7.13-14, 21-23)

22 Ichi kua'an Jesú ñuu Jerusalén xna'an ya nuu yivi ini veñu'un Israel taka ñuu nuu ya'a ya kua'an ya. **23** Ti ni kenda iin chaa ni jikajnu'un ya, ti ni kachi da:

—Jito'yo, ¿Jandaan kuu ja jaku ni yivi kuu ja keta'u i nu? —ni kachi da.

Ti ni kachi Jesú:

24 —Nduku ndee naa ra ti kivikoyo ra ñuu nuu ta'u Yandios jniñu. Nduku ndee ra nanu yivi kuni kivikoyo i iin ve'e nuu iyo iin yuxe'e lulu. Chi na kachi ri nuu ra naa ra ja nde kua'a yivi ka kuni kivikoyo i ñuu nuu ta'u ya jniñu, ko tu ka nani'in i ichi, **25** chi maa Yandios nakasi ya yuxe'e nava tukaa kivikoyo i. Kasi ya nanu iin chaa xiin ve'e ja ndokuiñi da ti kasi da yuxe'e da, ti tukaa kua'a da jnu'un kivikoyo yivi ve'e da. Vasu na kendo i ichi fuera ti kachi i: “Jito'yo, kuni kivikoyo na nuu ta'u ni jniñu.” Ko kachi ya: “Tu kuanta'u ri ro'o naa ra, ni tu jini ri naa ichi vekoyo ra naa ra”, kachi ya. **26** Yukan ti keja'a ra kachi ra naa ra: “Ko ka jini na maa ni, chi taka yo ni ka yee staa, ti maa ni, ni xna'an ni jnu'un ni nuu ñuu na naa na”, kachi ra. **27** Ko maa ya chi kachi tuku ya: “Ja ni kachi ri ja tu jini ri naa yivi ka kuu ra. Kuancha'a naa ra, ro'o ja ka sa'a jniñu ndeva'a naa ra”, kachi ya.

28 Yukan na ti keja'a ra nde'e ra naa ra ti ku'yu jnu'un ra siki jnu'un kui'ya ini. Chi kuni ra nuu

chaa jana'an, ja ni ka kuu tata yo, Abraham, Isaac, jiin Jacob jiin takága profeta jana'an ja ka'iin da nuu ta'u Yandios jniñu, ti ro'o sa su'va kekoyo ra ki'in ra fuera naa ra.

²⁹ Chi chakoyo yivi ka'iin ndi kuun jiki ñuyiví, ichi ninu, ichi vee, ichi nuu kaña ndikandii, jiin ichi nuu kee ndikandii, ti nukoo i ti kaji i ini ñuu nuu ta'u Yandios jniñu. ³⁰ Ko kua'a yivi nda'u ja tu kuña'nu vijna, ti yivi un kuu ja nduña'nu ñuu nuu ta'u Yandios jniñu. Ti kua'a yivi ka kunuu vijna, ti yivi un ndunda'u i nuu ta'u Yandios jniñu —ni kachi Jesús.

**Ni iyo jnu'un kui'ya ini Jesús siki
ñuu Jerusalén**

(Mt. 23.37-39)

³¹ Ti suni kivi un ni jakoyo sava chaa fariseo un, ti ni ka kachi da jiin Jesús:

—Va'a ga ja na kee ra ñuu ja'a ti ki'in ra, chi rey Herodes kuni ka'ní da ro'o —ni ka kachi da.

³² Ti ni kachi Jesús jiin da:

—Kuankoyo naa ra nuu Herodes, ja kuu da chaa kua'an, chi kuni ka'ní da ndiyí, ti kachi ra jiin chaa un: “Nde'e, vijna jiin ijña keni'in ri tachi xaan un kinkoyo, ti isa sa xndi'i ri jniñu un.” ³³ Ko siin ri ichi kua'an ri vijna, ijña, jiin isa, ¿xi vatuni ja kuü iin profeta Yandios fuera ñuu Jerusalén xino? —ni kachi Jesús.

³⁴ Yukán ti ni kachi ya siki yivi ñuu Jerusalén:

—Ro'o, yivi ñuu Jerusalén, ja ka ja'ní ra profeta najana'an, chaa ni ka'an jnu'un Yandios, ti ka ja'a ra yuu siki chaa ka ka'an jnu'un

Yandios ja ni taji ya. Nasa jinu ni kunda'u ini ri nuu ra naa ra, ja nama ri ro'o nuu nundo'o un nanu sa'a chuun ja kana ti se'e kuachi ti ja na ndututu chii ndijin ti, ko tu ni ka janta'u ra naa ra. ³⁵ Vijná na nusa, ti na xndoo ri ro'o naa ra jiin ñuu ra. Chi na kachi ri jiin ra ja jankiví ga kuni ra ru'u naa ra undi na jaa kivi ja kachi ra naa ra: “Ña'nu na koo maa rey yo, chi Tata yo Yandios ni taji ya maa chaa ja ndiso jniñu ña'nu nuu ya”, kachi ra —ni kachi Jesús.

**Ni sa'a Jesús tajna iin
chaa ni iin kuiñi**

14 Hin kivi ndetatu ni kuu, na ni kana iin chaa fariseo kuña'nu un Jesús, ni jan kaji ya staa ve'e da, ti sava ga chaa fariseo un ka jito yu'u da Jesús. ² Ti nuu kande Jesús yukan kande iin chaa ndo'o kue'e kuiñi. ³ Yukán ti ni jikajnu'un ya chaa ka xna'an ley Israel un jiin chaa fariseo, ti ni kachi ya:

—¿Kuu sa'a yo tajna iin yivi ku'u ja kuu kivi ndetatu, xi tuu nu? —ni kachi ya.

⁴ Ti ni ka jasi yu'u yivi un, tukaa ni ka ka'an. Ti maa ya ni jnií ya chaa ku'u un, ni sa'a ya tajna da, ti ni kachi ya jiin da ja na ki'in da. ⁵ Yukán ti ni kachi ya jiin chaa fariseo un:

—¿Nu iin iin ra na kanakava iin se'e ra xi iin xndíki ra ini soko, ti tu tava ra ti hora ni, vasu kuu iin kivi ndetatu nu? —ni kachi ya.

⁶ Yukán na ti tukaa ni kuu ndeokani chaa un iin jnu'un maa da.

Yíví ni ka ja'an iin viko nanda'a

⁷Nu ni jini Jesús ja ka nakaji yivi ni ka jakoyo viko un nuu va'a ga ja kunchuku i nuu mesa un, ti ni xndaku ya iin jnu'un nuu i, ti ni kachi ya:

⁸—Nu na kana yivi ro'o iin viko nanda'a naa ra, koto nukoo ra nuu sillu kanuu ga un, chi tu jini ra xi jaa iin chaa kuña'nu ga ja kuu ro'o, ⁹ti chaa ni kana ro'o un, kuu kachi da jiin ra: “Kua'a sillu ra na nukoo ingle chaa ja'a.” Yukan na ti koñaa ra nuu kanuu, chi kua'a da iin sillu kancha undi sandi'i kuiti ni ga kunchaku ra. ¹⁰Ti va'a ga ja nu na kana yivi ro'o, ti nukoo undi sandi'i ni ga, ti nava nu na jaa chaa ni kana ro'o un, ti kachi da: “Amigo, ña'an ti kuncha ra undi nuu kanuu ga ja'a”, kachi da. Yukan na ti kuni yivi kanchuku mesa jiin ra un ja suni kuu ra iin chaa kuña'nu. ¹¹Ti yivi kuni kuña'nu, su'va ni'in yi jnu'un kanuu, ko yivi kui'ya kaa un, su'va nduña'nu i, chi maa Yandios kuu ja sa'a —ni kachi ya.

¹²Yukan ti ni kachi Jesús nuu chaa ni kana ya un sia'an:

—Nu kuni ra kua'a ra iin ndeyu ja kaji yivi, ti koto kana ra iin amigo ra, xi ñani ra, xi iin iin jna'an ra, xi iin iin chaa riko kanchuku yajni jiin ra, chi suni na kana yivi un ro'o, ti yukan nani'in ra ja ni ja'a ra un.

¹³Ti va'a ga ja nu na sa'a ra iin viko, ti kana taka yivi nda'u un, yivi tu ka kuu sa'a jniñu, yivi ni ka tiyi un jiin yivi kuaa un. ¹⁴Ti nu sia'an na sa'a ra vasu ja kundatu ra, chi tu kuu chunaa yivi un nuu ra. Ko maa ra, chi nani'in ra taka ja ni ja'a ra

un kivi na nachaku ra, ti kuncha ra nuu ka'iin yivi va'a ja ni nakaji Yandios ja kunchuku i, i jiin ya ja kuu saa ni —ni kachi Jesús.

Jnu'un iin viko nanda'a

¹⁵Nu ni ka jiniso'o yivi jnu'un un, ti ni kachi iin chaa nukoo mesa un jiin Jesús:

—Xaan ndatu yivi kaji i staa ñuu nuu ta'u Yandios jniñu —ni kachi da.

¹⁶Yukan ti ni kachi Jesús jiin da:

—Sa'a yo nanu siki iin chaa ni sa'a iin viko ka'nu, ni ja'a da iin ja ni kuxini, ti ni kana da kua'a xaan yivi. ¹⁷Nu ni jaa hora kuxini, ti ni taji da chaa ka junukuachi nuu da un, kuan kana da chaa ni kana da un, ti ni kachi muzu da jiin chaa un naa da: “Cho'o naa ra, chi ja ni kuu nakoo ja kuxini yo”, ni kachi da.

¹⁸Ko tendi'i chaa un ni ka kanda'u. Undi nuu ni kachi iin da: “San ni jaan ri iin pedazu ñu'un, ti yukan kin nde'e ri, ti kanda'u ri jiin ra ja na saka'nu ini ra nuu ri”, ni kachi da. ¹⁹Ingá da ni kachi: “San ni jaa ri u'un yunta, ti kuni ri skua'a ri ti. Ja yukan kuu ja saka'nu ini ra nuu ri”, ni kachi da. ²⁰Ti ingá da ni kachi: “San ni nanda'a ri, ti ja yukan kuu ja tu kuu ki'in ri”, ni kachi da.

²¹Nu ni nandeokuñi muzu un, ni nakani da jnu'un nuu jito'o da ja sia'an ni ka ka'an chaa un. Yukan ti ni kuiti xaan ini jito'o un, ti ni kachi da jiin muzu da un: “Kua'a corri. Kua'an taka ichi ka iyo ñuu yukan, ti kana taka yivi nda'u un, jiin taka yivi tu ka kuu sa'a jniñu un, jiin yivi ni ka tiyi un, jiin taka

yíví kuaa un na kikoyo i”, ni kachi da. ²²Nu ni kuu na'an ga, ti ni kachi tuku muzu un: “Jito'o na, ja ni ja'an ndí'i na nava ni ta'u ni jniñu, ko nuña ga ini ve'e ni”, ni kachi da. ²³Yukan ti ni kachi tuku jito'o da jiin da: “Kua'an tuku taka calle un jiin taka ichi un, ti chayika yíví na kikoyo i, ti nava na chitu ini ve'e ri. ²⁴Chi na kachi ri nuu ra naa ra, ja ni iin yíví ni kana ri undi nuu un, tu kuxini da ve'e ri”, ni kachi da — kachi Jesús.

Ko ndo'o va'a ini yo, sa kundikun yo Cristo

(Mt. 10.37-39)

²⁵Ni kuu kua'a xaan yíví kuankoyo i jiin Jesús, ti ni ndeokoto Jesús ja xndaku ya nuu i, ti ni kachi ya:

²⁶—Nu nau yíví na kuni kundikun ru'u, ko nu ka ndí'i ga ini i ja kuu tata i, nana i, ñasi'lí i, se'e i, ñani i, kua'a i, jiin maa i, ja kuu ru'u, ti na kachi ri ja tukaa ga yi'i i jiin ri. ²⁷Ti nu tu ka ñukuu ini ra ru'u ja kundikun ra ru'u, ti vasu na kuū ra, ko tukaa ga ndí'i ra jiin ri.

²⁸Ti nu iin iin ra ka kuni sa'a iin ve'e sukun ja na kundiñin kotonchaa ra ni tu'u ñu'un ra, ¿xi ansu jandaa kuu ja xnakan nukoo ra, ti nde'e ra nasa gastu kuu, na ndenu kujaa xu'un ra undi xndí'i ra jniñu un nu? ²⁹Ti nu na keja'a ra sa'a ra nama ja'a, ti tu sinu ra, ti tako yíví kuni un, keja'a i kuaku i nde'e i ro'o, ³⁰ti kachi i: “Ni tejna'an chaa un ve'e da ko tu ni sinu da”, kachi i.

³¹Xi iin rey kuni da kanaa jna'an da jiin inga rey, ¿xi ansu jandaa kuu ja xnakan nukoo da, ti nde'e

da nu kundee uxi mil soldado da ja kinjna'an da jiin oko mil kikoyo jiin inga rey un nu? ³²Ti nu ni jini da ja tu kundee da, ti nu ni jika vaji inga rey un, ti taji da sava chaa ka ndiso jniñu, ja na kin ka'an nda'u jiin chaa un ja na kukuee. ³³Ti suni sia'an kuu jiin ro'o naa ra, nu kuni kundikun ra ru'u, ti kuñu kuu ini ra ja xndoo ra taka ndajniñu ñava'a ra. Xi nu tuu, ti na kachi ri ja tukaa ga yi'i ra jiin ri —ni kachi Jesús.

Tukaa ga va'a ñii un nu ni xndí'i na nuu u'ua

(Mt. 5.13; Mr. 9.50)

³⁴Siin Jesús xndaku ya, ti ni kachi ya:

—Kuanjniñu yo ñii ja kuu nuu ndeyu, ko nu na naa xiko u'ua ñii un, ti tukaa kuajniñu yo, ³⁵ni vasu ja sakanuu yo jiin ñu'un, ni ja sakanuu yo jiin ja'an. Tukaa kaxaan. Yukan ti so kacha yo ki'in. Yíví chunso'o, ti na chunso'o va'a i jnu'un un —ni kachi Jesús.

Jnu'un rii, kuiti ni sana

(Mt. 18.10-14)

15 Yukan ni ka tu'va tijni ga yíví nuu Jesús naa i ja ka ñuso'o i jnu'un ka'an ya. Ti ka'iin chaa ka kinya'u puesto un jiin uu ga yíví ja tu ka siuku ley Israel. ²Ti chaa ka xna'an ley Israel un jiin chaa fariseo un ka ka'an da siki Jesús, ti ni ka kachi da:

— Janta'u chaa ja'a yíví tu siuku ley Israel, ti yaji jna'an da jiin i vasu ka kuu i yíví ka sa'a ndeva'a —kachi naa.

³Yukan ti ni jani Jesús iin jnu'un ja xndaku ya nuu yíví un, ti ni kachi ya:

4—Nu iin iin ra ñava'a iin ciento rii, ti skuita ra iin ti, ¿ti va nu tu xndoo ra ndi'i kuun xiko xia'un kuu ga ti un yuku un, ti kin nunduku ra kuiti ni skuita ra un undi nu tu nani'in ra ti xino? **5**Ti nu na nani'in ra ti, ti kusii ini ra, nachuxndee ra ti nuu soko ra, ti kuano'on ra jiin ti. **6**Nu ni najaa ra ve'e ra, ti nastutu ra amigo ra jiin ñanijna'an ra, ti kachi ra: “Na kusii ini yo, chi ja ni ndenda rii ni skuita ri un”, kachi ra. **7**Ti na kachi ri jiin ra naa ra ja suni sia'an iyo jnu'un sii ini nuu andiví nuu kancha Tata yo Yandios jiin iin yivi ja ni nakani ini i nuu kuachi i, ansu jiin kuun xiko xia'un kuun yivi ja ka ndo'o ini i ja tu iyo kuachi i, ti ka ndo'o ini i ja tu ni kuu ja nakani ini i nuu kuachi i —ni kachi Jesús.

Siki ña'an ni skuita xu'un

8Suin Jesús xndaku ya, ti ni jani ya iin jnu'un sia'an:

—Jikajnu'un ri nuu ra naa ra. ¿Nu iin ñasi'i yijni ña uxi xu'un plata ti skuita ña iin, xi ansu jandaa kuu ja skuikun ña yiti ña, ti vii vii najista ña undi nuu tu nani'in ña xu'un ña nu? **9**Nu ni ndenda xu'un ña un, ti nastutu jna'an ña, jiin amigo ña, jiin ñanijna'an ña ja kanchuku yajni un, ti kachi ña: “Na kusii ini yo vijna, chi ja ni ndenda xu'un ni skuita ri un”, kachi ña. **10**Ti na kachi ri ja suni sia'an kusii ini ángel ka junukuachi nuu Yandios jiin iin yivi, ja nu ni nakani ini i nuu kuachi i —ni kachi Jesús.

Iin suchi ni naa, ti ni ndenda i

11Suin Jesús xndaku ya, ti ni jani ya iin jnu'un sia'an:

—Iin chaa ni iyo uu se'e da, **12**ti chaa suchi ga un ni kachi da jiin tata da: “Taa, kua'a ni ti'li ta'u na, ti'li ñu'un jiin xu'un na kuu na”, ni kachi da. Yukan ti ni chunsava tata da un ta'u da naa da. **13**Jaku ni kivi, ti ni xiko chaa suchi un ta'u da ja ni ja'a tata da un, ti jiin xu'un un kua'an chaa un, kuan kuikonuu da inga ñuu, ti yukan ni xnaa ndeval'a kuiti da xu'un da. **14**Nu ja ni ndi'i xu'un da ni xnaa da, ti kuiya un ni iyo iin jnama xaan tonto ñuu yukan, ti chaa un ni keja'a ji'i da soko.

15Yukan ti ni kee da ni jan nduku da jniñu nuu iin chaa ñuu yukan, ti chaa un ni taji da chaa kuan koto da kini. **16**Ko ni keja'a ji'i xaan da soko, ti kuni da kaji da, nde'e da ka yee kini un, ko tu ni iin yivi ja kua'a ja kaji da. **17**Yukan ti ni keja'a da ndo'o ini da: Iin kua'a muzu ve'e tata yo ja tu kumani staa kaji da, ko maa yo, kande yo ja'a, ndo'o nene yo ti ji'i xaan yo soko ja kuni kuú yo. **18**Va'a ga na nandeokuñi yo nuu tata yo, ti na kachi yo jiin da: Taa, ni chaa kuachi na maa na nuu Yandios, ti suni nuu maa ni. **19**Yukaa ga sa'a ni nanu ja kuu na se'e ni, chi sa'a ni nanu ja kuu na iin muzu ni. Sia'an ndo'o ini da ja kachi da jiin tata da.

20Yukan ti ni ki'in da ichi, ti kuano'on da nuu kancha tata da. Ti jika ga kua'an da, ti ni jini tata da nuu da, ti ni kunda'u ini da se'e da. Ni ja'a da corri, ni janujna'an da chaa, ti ni ka nanuu jana'an da, ti ni ka teyu'u nuu jna'an da. **21**Yukan na ti ni kachi se'e da un: “Taa, ni chaa kuachi na maa na nuu Yandios, ti suni nuu maa ni. Tukaa ga sa'a ni

nanu ja se'e ni kuu na", ni kachi da. ²²Ko chaa ña'nun un, ni kachi da jiin muzu da ka junukuachi nuu da un: "Yachi ro naa ra, tava iin sa'ma va'a ga yukan, ti na skui'na ra da naa ra. Suni nachi'i iin xe'e xini nda'a da, ti nachi'i ra ndijña da naa ra. ²³Kuan ki'in chelu ni neñu un, ti ka'ni ra naa ra. iNa sa'a yo iin viko, ti na kaji yo naa yo! ²⁴Chi ni ndo'o ini ri ja, ja ni ji'i se'e ri ja'a, ko nanu ja ni nandoto da, chi ni ndenda tuku da. Ni skuita ri da, ko ni nani'in ri da", kachi da. Ti ni ka keja'a da ni ka sa'a da viko naa da.

²⁵Ti se'e da chaa ña'nun ga, kande da nuu jniñu, ti nu ni nandeokuñi da ja'i ni, ni kuyajni da ve'e, ti ni jiniso'o da kuu yaa, ti ka jitaja'a yivi. ²⁶Yukan ti ni kana da iin chaa kuu muzu un, ti ni jikajnu'un da chaa ndoo kuu un. ²⁷Ti chaa un ni kachi da: "Tuu, chi ñani ra ni nchaa, ti ni ta'u tata ra jniñu ja na kuu chelu ni neñu un, chi ni nchaa va'a da", ni kachi muzu un. ²⁸Ti chaa ña'nun un ni kuiti ini da, ti tu kuni da ndivi da ve'e da. Ti yukan ni kee maa tata da un, ni jan ka'an da jiin da ja na ndivi da. ²⁹Ti ni kachi da jiin tata da: "Ja jini ni nasa ja ni kuu kuiya junukuachi na nuu ni, ti ni iin kivi tu kuni'in ini na nuu ni, ko ni ti kua'a ga ni vasu iin ndixi'yu nuu na ja sa'a na iin viko jiin amigo na. ³⁰Ti vijna ni nchaa inga se'e ni ja'a ja ni ja'an xnaa ndeva'a xu'un ni jiin ña'an sii ini, ti ni ja'nin ni chelu ni neñu un ja na sa'a ni viko da", ni kachi da. ³¹Yukan ti ni kachi tata da un jiin da: "Ro'o, suni se'e ri kuu ra, ti taká ja ñava'a ri ja'a kuu ja kuu maa ra,

chi ndi kivi kancha ra jiin ri. ³²Ko vijna chi kanuu ja na sa'a yo iin viko sii ini, chi ñani ra ja'a, ja ni ji'i da, ti nanu ja ni nandoto da chi ni ndenda tuku da. Ja ni ka skuita yo da, ko ni ka nani'in tuku yo da", ni kachi chaa ña'nun un —kachi Jesús.

Muzu ni junukuachi ndeva'a

(Mt. 6.24)

16 Yukán ti ni xndaku Jesús nuu ndaja'a ya, ti ni kachi ya:

—iin chaa riku, ni iyo iin muzu da ja ndiso jniñu nuu inga muzu, ko ni ka jani yivi jnu'un nuu da ja ni keja'a xnaa ndeva'a chaa un ja ñava'a chaa riku un. ²Yukan ti ni kana chaa riko un muzu da un, ti ni kachi da jiin da: "¿Ndoo kuu ja ka jani yivi jnu'un ra sia'an? Nakua'a jnu'un taka jniñu ra, ti tukaa ga siin ra kuu ra muzu ri vijna na", ni kachi da. ³Yukan na ti ni keja'a ndo'o ini chaa kuu muzu un: "¿Nasa sa'a yo vijna na, ja nu na kenchaa jito'o yo jniñu yo? Ti maa yo, tu kundee yo kutu yo nuu ñu'un yo ja kuchaku yo. Ti kukanuu yo kakan yo caridad", ni ndo'o ini da. Ko ni nakani tuku ini da sia'an: ⁴"Su'va na sa'a yo sava'a ni ga kivi na kenchaa da jniñu ndiso yo, ti nava na koo mani yivi ñuu yo jiin yo, ti kuu kivi yo ini ve'e i. Ja jini yo nasa sa'a yo vijna", ni ndo'o ini da.

⁵Yukan ti ni kana da ndi iin ndi iin chaa ka tau nuu jito'o da. Ti ni kachi da jiin iin da: "¿Nasa tau ra nuu jito'o ri"? ni kachi da. ⁶Ti ni kachi chaa un: "Tau ri uni mil litro aceite", ni kachi da. Yukán ti ni kachi muzu kuña'nun ga un: "Ja'a

iyó tutu ra ja tau ra un, nukoo ti vijna vijna sa'a ra ñinga ja iin mil sava ni ga", ni kachi da. ⁷ Yukan ti ni jikajnu'un da ñinga chaa, ti ni kachi da: "Ti ro'o, ¿Nasa tau ra nuu da nu"? ni kachi da. Ti ni kachi chaa un: "Tau ri iin ciento nundoo triu", ni kachi da. Ti ni kachi tuku chaa kuu muzu kuña'nu un: "Ja'a iyó tutu ra ja tau ra un, ko sa'a tuku ñinga ja kuun xiko ni ga", ni kachi da.

⁸ Yukan ti ni ni'in jito'o un jnu'un siki muzu xndoña'an un ja, ja ni ndu vivo da jiin jna'an da, chi vivo xaan ni ka ndajnu'un da jiin jna'an da un. Sia'an ni sa'a chaa un chi jandaa kuu ja yivi ñuyivi ja'a, ka kuu vivo ga i jiin jniñu ka sa'a jna'an i, ti ansu yivi ka kandixia jnu'un Yandios. ⁹ Ko na kachi ndaa ri nuu ro'o naa ra, ja ka kuu ra ndaja'a ri, ja ka sa'a ra mani jniñu va'a jiin taka ja ñava'a ra. Ti kua'a ra jaku ja ka nandi'i yivi nda'u nava na ndumani i jiin ra. Yukan ti nu ni ndi'i ja ñava'a ra nuu ñuyivi ja'a, ti kuaja ra andivi, ti yukan, taka yivi nda'u ni chindee ra ñuyivi ja'a, na kua'a i jandaa ja ni ka chindee ndixia ra i.

¹⁰ Sa'a yo nanu. Taka yivi ka sa'a niña jniñu va'a jiin jaku ja ka ñava'a i ja ka chindee i ñinga yivi, suni sia'an na sa'a va'a i nu iin kua'a ndajniñu i ja chindee i ñinga yivi. Ko nu tu sa'a i jniñu va'a ja chindee i ñinga yivi jiin jaku ja ka ñava'a i, ti suni sia'an tukaa ga na sa'a kuiti i jniñu va'a nu ñava'a i kua'a ndajniñu. ¹¹ Ti nu tu ni sa'a ra ja va'a ja chindee ra ñinga yivi ñuyivi ja'a, ti koto ma tatu

Yandios ro'o jiin jniñu ña'nu ja kuu nuu ni kani andivi. ¹² Ti nu tu sa'a ra jniñu va'a jiin taka ja ni ja'a ya nuu ra ñuyivi ja'a, ti koto ma tatu ga Yandios ro'o jniñu ña'nu ja kuu saa ni.

¹³ Yukan na kachi ri nuu ra naa ra ja ni iin muzu tu kuu kuanukuachi nuu uu jito'o, chi kendo va'a jiin iin da, ti kendo kui'ya i jiin ñinga da. Ni tu kuu kuanukuachi i nuu Yandios, ti kundio ini i xu'un jiin ñu'un. Ja yukan kuu ja tu kuu kuanukuachi ra nuu Yandios, ti kuñukuu ini ra ni'in ra xu'un jiin ñu'un —ni kachi Jesús.

¹⁴ Ti chaa fariseo un naa da, ni ka skee ichi da ya nu ni jiniso'o da jnu'un ni ka'an Jesús, chi tindi da xu'un naa da. ¹⁵ Yukan ti ni kachi Jesús jiin da:

—Ro'o naa ra, chi ka kuni ra ja na ka'an yiñu'un xaan yivi nuu ra ja chaa ndaa ka kuu ra. Ko Yandios, ja jini ya nasa kaa ichi ini ra. Chi vixi ini ra jiin taka jniñu ka sa'a ra, ti ja kuu nuu Yandios kuu mani jniñu kue'e jiin jniñu ndeva'a —ni kachi ya.

Nasa ni keja'a jniñu ta'u Yandios

¹⁶ Siin Jesús xndaku ya, ti ni kachi ya:

—Undi naa jana'an ni kii Juan, chaa ni skuanducha, ti ni keja'a ka'an da jnu'un Yandios. Ti undi naa ni kii Juan ni ta'u Yandios jniñu nuu ra naa ra jiin ley ni ja'a ya nuu Moisés, chaa ni kii na jana'an jiin uu ga profeta ni ka kii na jana'an. Ko vijna, ti Juan nu ni keja'a ka'an da iin jnu'un jaa, ni jani da jnu'un siki nasa

janta'u Yandios yivi naa i, ti kuu kivi i nda'a ya. Ti kua'a yivi ni ka ndusii ini i ja ni ka jiniso'o i jnu'un un. Vijnna ti kua'a yivi ka janta'u i jnu'un ri, ja na kuu kivi i nda'a Yandios.

¹⁷ Ko vanuxia ja iyo iin jnu'un jaa vijnna. Na kachi ndaa ri nuu ra naa ra, ja yachi ga naa andivi jiin ñuyivi ti ansu ja na kenchaan iin letra nuu ley ni ja'a ya nuu Moisés jiin uu ga profeta. Ko jnu'un ka'an ley un, chi tu naa kuiti. ¹⁸ Ja yukan kuu ja nu iin chaa na xndoo da ñasi'i da, ti nanda'a da jiin inga ñasi'i ti nchakuachi da, chi yisiki nchaa da ñasi'i da. Ti suni nu iin chaa na nanda'a jiin iin ña'an ni xndoo yii, suni nchakuachi da —ni kachi Jesús.

iin chaa riko jiin Lázaro

¹⁹ Siin Jesús xndaku ya, ti ni kachi ya:

—Sa'a yo nanu. Ni iyo iin chaa riku xaan ja taka kivi sa'a da viko ka'nu, ja va'a xaan sa'a da viko un, ti ñu'un da niña sa'ma va'a, sa'ma fina. ²⁰ Ti suni ni iyo iin chaa nda'u xaan tonto ja ni nani Lázaro, ti jan nukatuu da yux'e chaa riko un, ti ni tu'u da iin ndi'yí. ²¹ Ti chaa nda'u un, nini ji'i xaan da soko, ti kuni da kaji da vasu sava'a ni ga ndeyu ja nukoyo yu'u mesa chaa riku un. Ti undi ina un ka tu'va ti nuu da, ti ka nayuu ti nuu ndi'yí da un. ²² Yukan ti ni jaa kivi ja ni ji'i chaa nda'u un, ko ni jakoyo ángel Yandios ti kuankoyo ya jiin da nuu andivi un ja na kuncha da jiin chaa ni kuu tata yo na jana'an ni nani Abraham. Ti chaa riku un suni ni ji'i da, ti ni

jakununduji da. ²³ Ti nu ni keja'a ndo'o da nundo'o nuu ka'iin ndiyí un, ni ndokani da xini da, ti ni nde'e da ja jika ti'lí, ti yukan ka'iin Abraham jiin Lázaro. ²⁴ Yukan na ti ni kanajin da, ni kachi da: "Tata na Abraham, kunda'u ini ni saña. Kachi ni jiin Lázaro na kin chutoo da ti'lí xini nda'a da nuu nducha, ti na kii stoo da ti'lí nuu yaa na, chi ndo'o xaan na nundo'o nuu yaa ñu'un ja'a", ni kachi da. ²⁵ Ti ni kachi Abraham jiin da: "Hijo, nuku'un ini ja va'a xaan ni kuncha ra nuu ñuyivi, ti Lázaro chi nda'u xaan ni jna'an da. Ko vijnna chi iyo jnu'un ndee ini jiin da ja'a, ti ro'o ko ndo'o ko nene ra. ²⁶ Ko vijnna iyo iin xa'va ka'nu ma'ñu nuu ka'iin yo ja'a, ja yukan kuu ja tu kuu ya'a yivi ka'iin jiin ri ja'a jiin nuu ka'iin ra jña. Ni yivi ka'iin jiin ra jña tu ku ya'a i nuu ka'iin ri ja'a", ni kachi Abraham.

²⁷ Yukan na ti ni kachi chaa riku un: "Ka'an nda'u na jiin ni, tata na Abraham. Taji ni Lázaro na ki'in da ve'e tata na, ²⁸ chi yukan kanchuku u'un ga ñani na. Ti na xndaku da nuu da naa da nava tu kikoyo da ja'a, chi iyo xaan ga kaa nundo'o jito na ja'a", ni kachi da. ²⁹ Ko ni kachi Abraham jiin da: "Ka ñava'a da tutu ni chaa Moisés jiin jnu'un ni ka chaa profeta na jana'an, ti nuu jnu'un un na chu'un ini da", ni kachi da. ³⁰ Ti ni kachi tuku chaa riku un: "Jandaa kuu un, tata na Abraham, ko nu iin ndiyí na nandoto ti ki'lín nuu kanchuku da, ti va nakani ini da naa da", kachi da. ³¹ Ti ni kachi Abraham jiin da: "Ko nu tu ka kandixia da jnu'un Yandios

ni ka'an tutu ni chaa Moisés, jiin jnu'un ya ja ni ka chaa profeta na jana'an, ti suni tu kandixia kuiti da vasu na nandoto iin ndiyi ti ki'in nuu da", ni kachi Abraham —ni kachi Jesús.

Ja sa'a ja kuncha kuachi yo
(Mt. 18.6-7, 21-22; Mr. 9.42)

17 Siin Jesús xndaku ya nuu ndaja'a ya, ti ni kachi ya:

—Nini iyo iin jniñu sa'a ja na kunchakuachi yivi naa i, ko iin nundo'o ka'nun xaan kundatu yivi ja skanakava jna'an i nuu kuachi.
²Va'a ga na kundikun suku i jiin yoso molino, ti na ki'in i chii nducha, ansu ja xnda'u i iin suchi lulu ja koto ma kandixia i ru'u.

³Koto va'a ra maa ra. Nu na sa'a ndeva'a ñani ra siki ra, ti ndajnu'un ra jiin da siki ja ni sa'a da un. Ti nu nakani ini da, ti kuanka'nun ini nuu da. ⁴Vasu uxia jinu na sa'a ndeva'a da siki ra iin kivi, ti ndi uxia jinu un jaa da ti kachi da: "Tukaa ga ndoo sa'a ri nuu ra vijna na", kachi da. Ti kuanka'nun ini nuu da —ni kachi Jesús.

Ja na kandixia ni ini yo

⁵Yukan ti apóstol, chaa ni nakaji ya ja kundiso jniñu un, ni ka kachi da jiin Jito'yo Jesús:

—Sa'a ni ja na kandixia ni ini ga na taka jniñu ja ta'u ni nuu na —ni ka kachi da.

⁶Yukan ti ni kachi Jesús jiin da:
—Nu kandixia ndaa ra, vasu ku'va iin ndikin lulu, ti kuu kachi ra jiin yujnu ja'a: "Kuxio nuu kandichi ra ja'a ti kua'an nuu mar un kundichi ra", kachi ra naa ra, ti yujnu un chi

kuandatu i nuu ra naa ra —ni kachi ya.

Jniñu sa'a chaa junukuachi

⁷Siin Jesús xndaku ya nuu ndaja'a ya, ti ni kachi ya:

—Sa'a yo nanu. Nu iin iin ra ñava'a iin muzu ja sajníñu, ko tu ni'in da ja kuu ya'u da, ti chaa un kin sa'a da jniñu, xi kin koto da xndiki ti nchaa da, ¿xi va nu kachi ra jiin da sia'an naa ra? "¿Kuan ya'a ti nukoo ra kaji ra staa un xino?" ⁸Jandaa ni kuu ja tuu, chi su'va kachi ra jiin da: "Sava'a ja na kuxini ri, chu'un ra ndeyu kaji ri, ti chu'un ra nducha na ko'o ri xnakan, ti sa kuu nukoo ra ti kee ra staa."

⁹¿Xi va nu nakuanta'u ra nuu muzu ra un, ja ni sa'a da taka jniñu ni ta'u ra nuu da un nu? Jandaa ni kuu ja tuu. ¹⁰Ti suni sia'an ro'o naa ra, nu ni ndi'i ni ka sa'a ra taka jniñu, ti tu nduvixi ini ra naa ra, ti kachi ra: "Tu kanuu ja nakuanta'u ya nuu yo, chi sa nini jniñu ni ta'u ya ni ka sa'a yo naa yo", kachi ra naa ra —ni kachi Jesús.

**Ni sa'a Jesús tajna uxi chaa ni
ka jna'an kue'e ndi'yí te'yu**

¹¹Nu ni siin Jesús ichi kua'an ya ichi ñuu Jerusalén, ni ya'a ya ñu'un ñuu Samaria jiin Galilea. ¹²Nu ni jaa ya iin rancho, ti yukan ka janujna'an uxi chaa ni ka jna'an kue'e ndi'yí te'yu ya. Ni ka jankuñi jika da ti'lí, ¹³ti ni ka kanajin da sia'an naa da:

—¡Jesús! ¡Maestro! Kunda'u ini ni saña naa na —ni ka kachi da.

¹⁴Nu ni jini Jesús da naa da, ti ni kachi ya:

—Kuan stuu maa ra nuu sutu Israel un naa ra —ni kachi ya.

Ni kuankoyo da naa da, ti ni ka ndundoo da jiin kue'e ka jna'an da un. ¹⁵Ti iin da, nu ni jini da ja, ja ni ndundoo kue'e da un, ni nandeokuñi da, kanajiin da nakanajaa da Yandios. ¹⁶Ni jakunjiti da nuu Jesúis, ni sinu da nuu da undi nuu ñu'un ja nakuanta'u da nuu ya. Ti maa iin ni chaa un ni kuu iin chaa ñuu Samaria.

¹⁷Yukan ti ni ka'an Jesús:

—¿Xi ansu ka iyo uxi jna'an ra ja ni ka ndundoo jiin kue'e ka jna'an ra un nu? ¿Nanu ka'iin uu ga jna'an ra un naa da? ¹⁸¿Xi maa iin ni chaa ñuu jika ja'a kuu ja ni nandeokuñi ja nakanajaa da Yandios nu? —ni kachi ya.

¹⁹Yukan ti ni kachi ya jiin chaa un:

—Ndokuñi ti kua'an, chi ja ni nduva'a ra ti kendo ndaa ra nuu Yandios, chi ni kandixia ndaa ra ru'u —ni kachi ya.

Nasa kuni yo jniñu ta'u Yandios

(Mt. 24.23-28, 9,17-18, 36-41;

Mr. 13.6-9, 15-16; Lc. 21:8-12, 21)

²⁰Chaa fariseo un ni ka jikajnu'un da Jesúis nama kuu ja keja'a Yandios ta'u ya jniñu nuu ñuu da naa da, ti ni kachi ya jiin da:

—Na chaa jniñu ta'u Yandios, ko tu kuni ndijin ra nasa keja'a ya ta'u ya jniñu un. ²¹Ti tu kuu kachi ra: “Ja'a kande”, xi kachi ra: “Yukan kande.” Chi na kachi ri ja, ja ni chaa ñin ja ta'u jniñu nuu ra naa ra —ni kachi ya.

²²Yukan sa ni kachi ya jiin chaa ka skua'a jiin ya:

—Jaa iin kivi ja kundiyo ini ra naa ra ja maa Se'e Yívi Ñuyívi na ndenda ya nuu ra, ko tukaa ga kuni ra maa chaa un. ²³Ti kachi yívi jiin ra naa ra: “Ja'a kande ya”, xi kachi: “Yukan kande ya.” Koto ma kandixia ra naa ra jnu'un un. ²⁴Chi kivi nchaa maa Se'e Yívi Ñuyívi, ti kuni ndijin ra naa ra nanu sa'a nu janducha, ti ndinchaa ni tu'u undi nuu kaña ndikandii jiin undi nuu kee ndikandii. ²⁵Ko xnakan kuu yaku ri nuu ñuyívi ja'a, ti kondo'o koo nene ri, chi vijna tu kuanta'u yívi ñuyívi ja'a ru'u. ²⁶Chi nanu ni iyo kivi ni chaku Noé, chaa ni kii na jana'an, ti suni sia'an kuu nu na jaa kivi nchaa maa Se'e Yívi Ñuyívi. ²⁷Ni kunchuku vatu yívi naa i nani kuncha Noé, chi ka ndo'o ini i ja kukuee nuu i naa i. Ka yaji i, ti ka ji'i i, ka nanda'a i, ti ka ja'a i se'e si'i i ka nanda'a ña naa ña, undi ni jaa kivi nu ni kivi Noé ini barco ka'nu da. Ko nu ni kuun iin sau xaan un, ti ni ka naa i. ²⁸Ti suni sia'an ni kuu na ni chaku Lot. Ni kunchuku vatu yívi. Ka yee i, ka ji'i i, ka jaan i sava'ní ga ndajniñu, ti ni ka xiko i, ka sa'a i jniñu, ti ka sa'a i ve'e i naa i. ²⁹Ko nu ni kee Lot yu'u ñuu Sodoma, ti ni jinu ñu'un jiin azufre ja ni kii ichi andiví, ti ni ndi'i ni yívi un ni ka ji'i. ³⁰Ti suni sia'an kuu nu na jaa kivi ndenda maa Se'e Yívi Ñuyívi.

³¹Ti ja kuu kivi un, yívi ka ndetatu i yux'e i, koto ma ki'in i iin ndajniñu i ini ve'e i, ti na kunu xaan i naa i. Ti yívi ka'iin nuu jniñu, koto ma ndeokuñi i ve'e i ja statu i ni iin ndajniñu i. ³²Ti nuku'un ini naa ra nasa ni ndo'o ñasi'i Lot ja sa

naa ni ti ni ji'l ña. ³³Chi taka yivi ja kuni nama i maa i ñuyivi ja'a, ti tukaa nanita'u i nuu Yandios ja kuu saa ni. Ti taka yivi vasu na kuu i ja siki ru'u, ko yukan kuchaku i ja kuu saa ni. ³⁴Na kachi ri nuu ra naa ra NASA kuu ja kuu kivi un. Ti nu ka kixi uu yivi nuu iin jito jakuaa un, ti iin ni ki'in, ko inga chi kendo. ³⁵Ti koo uu ñasi'i ka ndiko nduu ña; iin ña ki'in ri jiin, ti kendo inga ña. ³⁶Nu uu chaa ka'iin yuku xi nu ka sa'a da jniñu, iin da ki'in ri jiin, ti kendo inga da —ni kachi Jesús.

³⁷Nu ni ndi'l ni ka ñuso'o ndaja'a Jesús, yukan na ti ni ka jikajnu'un da ya:

—¿Ti nanu kuu nu kuu sia'an Jito'yo? —ni ka kachi da.

Ti ni kachi Jesús:

—Ndijin ndaa nde'e yo ka kututu tiji nuu katuu kuiti ni ji'l. Ti suni sia'an ndijin ndaa nde'e yo nu ndenda maa Se'e Yivi Ñuyivi —ni kachi Jesús.

Jnu'un iin ña'an ni kendo maa iin jiin iin juez

18 Yukan ti ni jani Jesús
jnu'un nuu chaa ka skua'a
jiin ya, ja kanuu ga ja tu xndoo da
jnu'un kakanta'u da nuu Yandios, ja
na koo ndee ini da ti siuku da taka
jniñu tatu ya nuu da naa da. ²Ti ja
ni xndaku ya yukan nuu da, ti ni
jani ya iin jnu'un sia'an:

—Ni iyo iin ñuu nuu ni iyo iin juez
ja tu chiñu'un da jnu'un Yandios, ni
tu jandatu da nuu ni iin yivi. ³Ti
suni ñuu yukan ni iyo iin ña'an
maa iin. Ti ña'an un ja'an ña, ja'an
ña nuu juez un, kanda'u ña jiin
da ja na nama da ña nuu iin yivi

ka kanaa jiin ña. ⁴Ni kuu na'an ja'an ña, ko tu kuni juez un sa'a da justicia. Ko ni jaa iin kivi, ti ni nakani ini da ti ni ndo'o ini da: “Vasu tu chiñu'un yo Yandios, ni tu sa'a yo nanu nuu ni iin yivi, ⁵ko ña'an ja'a ni kuu nuu nuu xnaña'an ña nuu yo. Va'a ga ja na nama yo ña, ti nava tukaa ga kiji ña chi so skuiti ña ini yo”, ni ndo'o ini da —kachi Jesús.

⁶Ti ni kachi tuku Jito'yo Jesús:
—Yukan kuu jnu'un ni ndo'o ini juez un ja tu va'a ini da, ti ni nama da ña'an un. ⁷Ti suni sia'an sa'a Yandios ja kuu taka yivi ka kandixia ja ni nakaji ya, ja kuu nduu kuu ñuu ka kanda'u i jiin ya. Ti jandaa ni kuu ja tu kukuee ya nama ya maa i. ⁸Na kachi ri ja tu kundatu ra, chi nama ya siki ra. Ko nu na jaa kivi nchaa maa Se'e Yivi Ñuyivi, ti na nde'e yo nu kuni ya yivi ka siuku ndaa i jnu'un ya, ja ka kandixia ndaa i maa ya xi tuu —ni kachi ya.

Jnu'un siki iin chaa fariseo jiin iin chaa kinya'u puesto

⁹Ti nuu ka'iin tijni chaa vixi ini,
ja ka sa'a yiñu'un da maa da, ti ka
skee ichi da ñanijna'an da. Ti nuu
chaa un ni ka'an Jesús jnu'un ja'a:

¹⁰—Uu chaa ni ka ja'an siin da
veñu'un ka'nú Israel ja ka jikanta'u
da nuu Yandios. ñin da kuu chaa
fariseo, ti inga da kuu chaa kinya'u
puesto. ¹¹Chaa fariseo un chi
kandichi da jikanta'u da, ti kachi
da: “Ni'in Yandios, nakuanta'u na
nuu ni ja tukaa na nanu kanda sava
yivi naa i, ja ka sakui'na i, kanda
kua'an i, ti ka nchaka i uni kuun

ñasi'i, ni tukaa na nanu kaa chaa kinya'u puesto ja'a. ¹²Uu jinu kendo ndicha ini na iin semana, ti ja'a na ti'li ti'li nuu taka ja ni'in na nuu ni'in Yandios", ni kachi chaa fariseo un. ¹³Ti chaa kinya'u puesto un, chi jika ni kandichi da nuu chaa fariseo un, ti ni tu ni tava ini da ndakoto da ichi andivi, chi so ni keja'a kani da nda'a da jika da, ti kachi da: "Ay Yandios, kuanka'nu ini ni nuu na, chi kuu na iin chaa nchakuachi", ni kachi da. ¹⁴Ti na kachi ri nuu ra ja chaa kinya'u puesto un, ni janka'nu ini Yandios nuu kuachi da ja ni kendo va'a da nuu ya, sa kuan no'on da ve'e da. Ti chaa fariseo un, chi tuu. Yukan, na kachi ndaa ri ja taka yivi sa'a yiñu'un i maa i ja kuni kuña'nu i, ti su'va ka ndukui'ya ini i. Ko yivi ja kukui'ya ini un vijna su'va nduña'nu i, chi maa Yandios sa'a —ni kachi Jesús.

Jesús jiin suchi kuachi

(Mt. 19.13-15; Mr. 10.13-16)

¹⁵Yukan ti ni ka yinda'a yivi suchi kuachi nuu Jesús ja na chuxndee ya nda'a ya xini i. Ko nu ni ka jini ndaja'a ya, ti ni ka keja'a ka nduxaan da jiin yivi un. ¹⁶Ko ni kana Jesús ja na tu'va suchi kuachi un nuu ya, ti ni kachi ya jiin ndaja'a ya:

—Sia naa ra na kikoyo i nuu ri ti tu kasi ra naa ra. Chi taka yivi ja kuni kivi nda'a Yandios ja na ta'u ya jniñu nuu i, ti kuni ja na kivi i nanu suchi kuachi ja'a. ¹⁷Na kachi ri nuu ra naa ra ja tu yiñ kuanta'u iin suchi lulu jnu'un Yandios ja na ta'u ya jniñu nuu i, ti ansu iin yivi ña'nua ja, ja ni kuni'in ini, ti tu ka

kuni kivi i nda'a Yandios ja na ta'u ya jniñu nuu i —kachi ya.

Iin chaa riko

(Mt. 19.16-30; Mr. 10.17-31)

¹⁸Yukan ti iin chaa kuña'nu un ni jikajnu'un da Jesús:

—Chaa va'a kuu ni, maestro. Ti kachi ni, ɿnaa jniñu va'a sa'a na ti ni'in ta'u na ja kuchaku na sia'an ni nuu andivi ja kuu saa ni? —kachi da.

¹⁹Ti ni kachi Jesús:

—Ndoo ka'an ra ja chaa va'a kuu ri, ti tu ni iin chaa va'a iyo, chi maa iin ni Yandios iyo. ²⁰Ja jini ra jnu'un ta'u Yandios nuu yo: "Tu kunchaka ra tijni ñasi'i. Tu ka'ni ra ndiyi. Tu sakui'na ra. Tu chakuachi ra yivi. Kuandatu nuu tata ra, nuu nana ra" —ni kachi ya.

²¹Ti ni kachi chaa riko un:

—Ja ni ndi'i un ni jandatu na undi lulu na —ni kachi da.

²²Ja sia'an ni ka'an da, ti ni kachi Jesús jiin da:

—Ko iyo ɿnga jniñu kumani ja sa'a ra. Xiko ndi'i ja ñava'a ra ti kua'a nuu yivi nda'u. Yukan na ti sa ni'in ra ta'u ra undi andivi. Yukan na ti sa kii ra na cho'o —kachi ya.

²³Nu ni jiniso'o chaa un ja sia'an ni kachi Jesús, ni kukui'ya xaan ini da ti kua'an da, chi vanuxia chaa riko xaan kuu da. ²⁴Ti nde'e Jesús nuu da ni kee da kua'an da, ti ni kachi ya jiin uu ga yivi un:

—Yii xaan ja kuu iin chaa riko ja na xndoo da ichi maa da, ti kivi da nda'a Yandios ja na ta'u ya jniñu nuu da. ²⁵Jandaa ndixia ja va yachi ga ya'a iin camellu yau iin yiñ tikui, ti ansu ja kivi iin chaa riko

nda'a Yandios ja na ta'u ya jniñu
nuu da —ni kachi ya.

²⁶ Yukan na ti yiví ni ka jiniso'o
un ni ka kachi:

—Nusa, čti nau kuu ja nanita'u
nu? —kachi da naa da.

²⁷ Ti ni kachi Jesús:

—Ni iin yiví tu kuu sa'a un, ko
Yandios chi taka ni ja kuu sa'a ya —
ni kachi ya.

²⁸ Ti ni kachi Pedro:

—Saña naa na, ni ka xndoo na
taka ja ka ñava'a na ti vekoyo na
jiin ni —ni kachi da.

²⁹ Yukan ti ni kachi Jesús:

—Na kachi ndaa ri siki nasa kuu
jiin yiví ja kuni kivi i nda'a Yandios
ja ta'u ya jniñu nuu i, vasu nu na
xndoo da ve'e da, xi ñasi'i da, xi
ñani da, xi tata da jiin nana da, xi
se'e da. ³⁰ Ja sia'an ti nani'in da vi'ga
ja kuu taka ga ja ni ka xndoo da un,
nava kuchaku da nuu ñuyiví ja'a, ti
nanita'u da nuu Yandios ja kuchaku
da ja kuu saa ni—ni kachi ya.

Ka'an tuku Jesús ja kuū ya

(Mt. 20.17-19; Mr. 10.32-34)

³¹ Ni kana siin Jesús ndi uxi uu
ndaja'a ya un, ti ni kachi ya:

—Ja kuankoyo yo ichi ñuu
Jerusalén, ti yukan na kundaa nava
ni ka chiso profeta na jana'an ja
kuu siki ru'u, maa Se'e Yíví Ñuyiví.
³² Nakual'a yiví ru'u nuu yiví ñinga

nación, ti kusíkinchaa yiví un ru'u, ti
tiví si'i i nuu ri, kani i ru'u, ti ka'ni
i ru'u. ³³ Ko nu uni kivi ti nandoto
ri ma'ñu ndiyí un chi ru'u kuu maa
Se'e Yíví Ñuyiví, ja ni nakaji Yandios
vaji ri —ni kachi ya.

³⁴ Ko ndaja'a ya un, tu ni ka
chaku ini da ni ti'lí jnu'un ni ka'an

ya, chi jnu'un un tu ni kivi inijnuni
da naa da. Yukan kuu ja tu ni ka
chaku ini da nasa kuni ka'an jnu'un
un.

Sa'a Jesúس tajna iin chaa kuaa

(Mt. 20.29-34; Mr. 10.46-52)

³⁵ Nu kuan kuyajni Jesús ñuu
Jericó, ti yu'u ichi un nukoo iin
chaa kuaa jikan da xu'un. ³⁶ Nu ni
jiniso'o da ja ka ya'a yiví kua'a, ti
ni jikajnu'un da ndoo kuu. ³⁷ Ti
ni ka kachi yiví un ja Jesús, chaa
ñuu Nazaret kuu ja kua'an ichi un.

³⁸ Yukan ti ni kanajin da:

—iNi'in Jesús! Maa ni ja ta'u
jniñu nanu ni sa'a rey yo David na
jana'an, kunda'u ini ni saña —ni
kachi da.

³⁹ Ti yiví ka yosjnuu un ni ka
nduxaan jiin da ja na kasí yu'u da,
ko maa da vi'ga ni kanako'o da:

—iNi'in Jesús! iMaa ni ja ta'u
jniñu nanu ni sa'a rey yo David na
jana'an, kunda'u ini ni saña! —ni
kachi da.

⁴⁰ Yukan ti ni jakuñi Jesús, ti ni
kachi ya ja na kin ki'in da chaa un
naa da. Nu ni jaa da nuu ya, ti ni
jikajnu'un ya maa da:

⁴¹ —¿Ndoo kuni ra ja sa'a ri jiin ra,
nusa? —ni kachi ya.

Ti ni kachi chaa un:

—Jito'yo, ja na ndundijin nduchi
na —ni kachi da.

⁴² Ti ni kachi Jesús jiin da:

—Na ndundijin nduchi ra. Ni
nduva'a ra vijna na chi ni kandixia
ndaa ra ru'u —ni kachi ya.

⁴³ Ti hora ni, ni nduva'a nduchi
chaa un, ti ni chindikun da kua'an
da jiin Jesús, ti nakuanta'u da nuu
Yandios. Ti suni taka yiví ni ka

jini jniñu ña'nu un, ni ka keja'a ka nakanajaa i Yandios.

Jesús jiin Zaqueo

19 Yukan ti ni kívi Jesús ñuu Jericó, ti kuan ya'a ya ma'ñu ñuu yukan, ²ti yukan iyo iin chaa riko nani Zaqueo, chaa kuña'nu nuu chaa ka kinya'u puesto un. ³Ti chaa un ndiyo ini da ja kuni da nuu Jesús, ko tu jini da ya chi yívi kua'a ka'lín un ni jasi i nuu ya. Ti Zaqueo chi liki da ti'lí. Ja yukan kuu ja tu kuu kuni da nuu Jesús. ⁴Yukan ti ni ja'a da corri ni kandu da ti ni kaa da xini iin nutichi vixi kandichi yajni nuu ya'a Jesús, nava na kuni da nuu ya. ⁵Nu ni jaa Jesús ja'a yujnu un, ni ndakoto ya nuu kaxndee Zaqueo, ti ni kachi ya jiin da:

—Zaqueo, yachi ro ti kuan nuu, chi kuni ri kendo ri ve'e ra vijna — ni kachi ya.

⁶Yukan ti yachi ni nuu Zaqueo, ti ni kanxia'u da jiin Jesús. ⁷Nu ni ka jini taka ga yívi un, ti ni ka keja'a ka ka'an siki Jesús ja kuni kendo ya ve'e iin chaa kinya'u puesto, vanuxia tu ni siuku ndaa da ley Moisés. ⁸Yukan ti ni ndokuiñi Zaqueo, ti ni kachi da jiin Jito'yo Jesús:

—Nde'e ni Jito'yo. Ja ndi'lí ja ñava'a na, ti na kua'a na sava nuu yívi nda'u naa i, ti nu iyo iin iin yívi ni xndoña'an na ja ni jisonchaa na ja ñava'a i, ko vijna ti na nakua'a na kuun ga jinu ja kuu iin ja ni jisonchaa na un —ni kachi da.

⁹Ti ni kachi Jesús jiin da:

—Na kachi ndaa ri nuu ro'o Zaqueo chi jandaa kuu ja kuu ra iin

jna'an tata yo Abraham na jana'an, ti ni kandixia ndaa ra ru'u vijna nanu ni kandixia tata Abraham na jana'an. Ti suni yívi kanchuku ve'e ra ja'a ni ka janta'u i ru'u, ti ja ni ka kandixia i ru'u. Yukan kuu ja kendo va'a ra ti keta'u ra nuu Yandios naa ra. ¹⁰Chi na kachi ri ja ru'u, maa Se'e Yívi Ñuyívi ni chaa ri ja na chunaa ri nuu taka yívi nava tukaa kinkoyo i nuu infiernu —ni kachi Jesús.

Chaa ka sajniñu jiin xu'un

¹¹Ni ka ñuso'o yívi jnu'un ka'an Jesús yukan, ti ni xndaku ya nuu i jiin inga jnu'un siki nasa ta'u Yandios jniñu. Yukan kuni xndaku ya, chi ja yajni jaa ya ñuu Jerusalén, ti ka ndo'o ini yívi un ja ja ni jaa hora ja nduña'nu ya ti ta'u ya jniñu nuu ni tu'u nación Israel. ¹²Ni ja ni ya iin jnu'un sia'an, ti ni kachi ya:

—Ni iyo iin chaa riko, ti ni ndo'o ini da ja ki'in da inga nación jika, ja ni'in da jniñu kunchaa da ti ta'u da jniñu siki ñuu da, ja na nduu da rey siki ñuu da, ti sa ndeokuñi da. ¹³Na ti ki'in ga da, ti ni kana da uxi muzu ka junukuachi nuu da un, ti ni ja'a da iin iin xu'un nchaa ya'u xaan nuu da naa da, ti ni kachi da: “Nu na ki'in ri ti sajniñu naa ra jiin xu'un ja'a nava na nakaya se'e xu'un ja'a ja kuu kivi nchaa ri”, ni kachi da. ¹⁴Ko vanuxia yívi ñuu da un ka kuiti ini nuu da, ti ni ka taji da tijnu chaa kua'an jata da nuu inga ñuu, ja na kachi nuu chaa ña'nú inga ñuu un: “Tu ka pajna'an ini yívi ja kundiso jniñu chaa ja'a nuu na naa na”, ni ka kachi. ¹⁵Ko chaa riku un, chi ni ni'in da jniñu kuncha da ja ta'u da jniñu

síki ñuu da ja ni nduu da rey, ti ni nandeokuñi da nuu ñuu da.

Yukan ti nu ni najaa da ñuu da tuku, ti ni kana da taka chaa ni ja'a da xu'un un nuu, ndenu nasa ni ka ni'in iin chaa un, nu ni ka nata'u se'e xu'un ni ja'a da un xi tuu. ¹⁶Ni jaa iin muzu nuu chaa riko un, ti ni kachi da: "Taa, jiin iin xu'un ni un ni nani'in na uxi ga xu'un", ni kachi da. ¹⁷Ti ni kachi rey un: "Iyo va'a, ni kuu ra iin muzu va'a, ja va'a ni sa'a jniñu ra jiin iin xu'un un. Vijna na ti na tatu ri ñinga jniñu nuu ra ja na nduu ra iin chaa kuña'nu, ti ta'u ra jniñu nuu uxi ñuu", ni kachi da.

¹⁸Yukan ti ni jaa ñinga muzu, ti ni kachi da: "Taa, jiin iin xu'un un ni nani'in na u'un ga xu'un", ni kachi da. ¹⁹Ti ni kachi tuku rey un jiin muzu da: "Iyo va'a. Vijna na ti na tatu ri ñinga jniñu nuu ra ja na nduu ra iin chaa kuña'nu, ti ta'u ra jniñu síki u'un ñuu", ni kachi da.

²⁰Yukan sa ni jaa ñinga muzu, ti ni kachi da jiin rey un: "Taa, ja'a iyo xu'un ni. Ni sava'a na chii iin pañitu. ²¹Yu'u na chi ja jini na ja kuu ni chaa tu ñunda'u ini, chi kua'a ga nandakan ni, ti ansu ja ni ja'a ni, ti su'va kumi ga ni", ni kachi da.

²²Yukan ti ni kachi rey un jiin da: "Ro'o chaa ndeva'a, jiin jnu'un ka'an ni ra xndichi ra maa ra. Ti ka'an ra ja vi'i ga nandakan ri ansu ja ni ja'a ri. Ti suni ka'an ra ja su'va vi'i ga kuni ri. ²³Ti nu sia'an kuu nusa, ñdoo tu ni januu ra xu'un ri nuu chaa ka sajniñu síki tratu, nava nu ni nchaa ri, ti naki'in ri xu'un ri jiin se'e i niku"? ni kachi da.

²⁴Yukan ti ni kachi da jiin chaa ka'iin un: "Kuisonchaa xu'un

nuu muzu ja'a, ti kua'a nuu chaa yijní uxi xu'un un", ni kachi rey un. ²⁵Ti ni kachi chaa un naa da: "Taa, ti ndoo ti ja ñava'a chaa un uxi jna'an", ni ka kachi da. ²⁶Ti ni kachi rey un: "Na kachi ri jiin ra naa ra ja nu yiví ñava'a un, ti su'va kii ga nuu i, ti kuña'nu ga i jiin jniñu ndiso i. Ko yiví tundo ñava'a, ti vasu ti'lí jniñu ja ndiso i un, kuxio ki'in. ²⁷Ti yivi ka jito u'u ru'u un, ja tu ka kuni ja kuu ri rey, kuan ki'in ti ka'ní ra naa ra nuu ri ja'a", kachi da —ni kachi Jesús.

Kivi Jesús ñuu Jerusalén

(Mt. 21.1-11; Mr. 11.1-11; Jn. 12.12-19)

²⁸Nu ni ndi'i ni ka'an Jesús jnu'un un, ti ni siin ya kua'an ya ñuu Jerusalén. ²⁹Nu ja yajni jaa ya ñuu Betfagé jiin Betania, yajni yuku Olivos, ti ni taji ya uu ndaja'a ya, ti ni kachi ya jiin da naa da:

³⁰—Kuankoyo rancho kande yajni un naa ra, ti nu jakoyo ra un, nani'in ra nuu ndikun iin burru ja ti koso ga yiví ti. Ndaji ti ti kikoyo ra jiin ti naa ra. ³¹Ti nu ka jikajnu'un yiví ro'o ja ndoo ka ndaji ra ti, ti kachi jiin da naa ra ja maa Jito'o ra nandi'i da ti —ni kachi ya.

³²Kuankoyo ndaja'a ya, ti ni ka nani'in da burru un nava ni kachi Jesús nuu da naa da. ³³Ja ka ndaji da burru un ti ni kekoyo chaa xiin ti un, ti ni ka kachi da:

—¿Ndoo ka ndaji ra burru un naa ra? —ka kachi da.

³⁴Ti ni ka kachi ndaja'a un:
—Maa Jito'yó nandi'i ti —ni ka kachi da naa da.

³⁵Yukan ti kuankoyo da jiin ti nuu kande Jesús, ni ka chuku da

sa'ma da siki ti, ti ni ka skaa da Jesús siki ti. ³⁶Ti ichi kua'an Jesús ni ka chuku yivi sa'ma i ini ichi un. ³⁷Nu ni ka kuyajni ya nuu kande yuku Olivos, ti tendi'i yivi ni ka kandixia ya ni ka keja'a ka kanajiin ja ka kusii ini ti ka nakuanta'u i nuu Yandios ja ni ka jini i taka jniñu ña'nu ni sa'a ya. ³⁸Ti kachi i naa i:

—Ña'nu na koo maa rey yo, chi Tata yo Yandios ni taji ya maa chaa ndiso jniñu ña'nu nuu ya. Ja ni ndumani Yandios jiin yivi ñuu ya vijna. iNa kachi ndaja'a ya undi andivi un ja na koo ña'nu chaa ja'a! iSia'an na kachi da! —ni ka kachi i.

³⁹Yukan ti sava chaa fariseo kuan koyo jiin yivi un, ni ka kachi jiin ya:

—Maestro, nduxaan ni nuu ndaja'a ni ja'a —ni kachi da.

⁴⁰Ti ni kachi Jesús jiin da naa da:

—Na kachi ri jiin ra naa ra, ja nu na kasi yu'u yivi ja'a na i, ti suni kuu sa'a Yandios ja na kanajiin yuu un naa i —ni kachi ya.

⁴¹Nu ni kuyajni ya ñuu Jerusalén, ni jitonchaa ya ñuu un, ti ni ndukui'ya ini ya. Ti ni nde'e ya ja siki yivi un, ⁴²ti ni kachi ya:

—Ro'o, yivi ñuu Jerusalén, sa ti ni ka chaku ini ra vasu iin ti'lí ja vijna kuu kivi ja ndumani ra jiin Yandios naa ra niku, ko vijna tukaa chi ja ni ya'a un, ti ja yisa'yí, ti tukaa ga kuni ra naa ra. ⁴³Chi su'va, jaa kivi ja kondo'o ra iin nundo'o xaan, ti chakoyo yivi ka jito u'u ro'o, kuikonduu i ñuu ra, ti kasi kutu i jiin yuu, ti ya yukan ndonda i siki ra. ⁴⁴Ti ndi'i ve'e ra kanuu i, ti ka'ní i tendi'i ra. Ti tukaa xndoo

i ni iin ve'e ja kosojna'an ga iin yuu. Sia'an na koo nundo'o un nuu ra chi tu ni ka janta'u ra ru'u, ja ni taji Yandios ja chunaa ri nuu ro'o naa ra —kachi Jesús.

Ni keni'in Jesús yivi ka sa'a ya'u ini veñu'un ka'nú

(Mt. 21.12-17; Mr. 11.15-19; Jn. 2.13-22)

⁴⁵Nu ni jaa Jesús nuu yux'e' veñu'un ka'nú un, ti ni keja'a keni'in ya taka yivi ka xiko ini veñu'un un. ⁴⁶Ti ni kachi ya jiin yivi un:

—Sia'an yoso nuu tutu Yandios: “Ve'e ri konani ve'e nuu kakanta'u yivi naa i”, ko ro'o naa ra, ni ka nasa'a ra ve'e nuu ka nataka ñakui'na —kachi ya.

⁴⁷Taka kivi ni xna'an Jesús nuu yux'e' veñu'un ka'nú un, ko sutu ka kuña'nú un jiin taka chaa ka kuña'nú ñuu un, ka nduku da nasa kuu ka'ní da ya naa da. ⁴⁸Ko tu kuu nasa sa'a da naa da, chi tendi'i yivi un ka kusii xaan ini i jiin taka jnu'un ni xna'an Jesús.

Na jniñu ndiso Jesús

(Mt. 21.23-27; Mr. 11.27-33)

20 iin kivi kande Jesús nuu yux'e' veñu'un ka'nú un xna'an ya nuu yivi, ti ka'an ya jnu'un Yandios nuu i naa i, ti ni ka jakoyo sutu ka kuña'nú un jiin chaa ka xna'an ley Israel jiin chaa ka kuña'nú nación Israel, ti ni ka kachi da jiin ya:

²—Kachi nuu ri, énau ni ta'u jniñu ña'nu ja sa'a ra taka jniñu ja'a? ¿Xi nau ja ni ja'a jniñu ña'nu ja'a nuu ra? —kachi da naa da.

³Ti ni kachi Jesús jiin da naa da:

—Suni ru'u, na kajnu'un ri ro'o naa ra iin jnu'un. Na kachi ri,⁴ ñau ja ni tatu jniñu nuu Juan ja ni kii skuanducha da yivi nusa? ñinga yivi ni tatu jniñu un nuu da, xi maa Yandios nu? —ni kachi ya.

⁵ Yukan ti ni ka keja'a ka ndajnu'un maa da naa da, ti ni ka kachi da:

—Nu na kachi yo ja Yandios ni taji chaa un, ti kachi da jiin yo: “Ñdoo tu ni ka kandixia ra jnu'un ni ka'an da nusa?”⁶ Ti nu na kachi yo ja yivi ni taji da, ti va tendiñi yivi ka'iin ja'a ka'ni yo'o jiin yuu, chi tendiñi yivi ka kandixia ja Juan ni kuu iin profeta, ja ni ka'an jnu'un Yandios —sia'an ka ndajnu'un da.

⁷ Yukan sa ni ka kachi da:

—Tu ka jini ri nau ja ni taji Juan, ja ni kii skuanducha da yivi —ni ka kachi da.

⁸ Yukan na ti ni kachi ya jiin da naa da:

—Vanuxia tu ka kuni kachi ra, ti suni ru'u tu kachi ri nuu ra nau ja ni ja'a jniñu ña'nu ja'a nuu ri —kachi ya.

Siki muzu ka sajniñu ndeva'a

(Mt. 21.33-44; Mr. 12.1-11)

⁹ Yukan ti ni xndaku Jesús nuu yivi un jiin jnu'un ja'a, ti ni kachi ya:

—In chaa ni xndee kua'a da nutika'ya, ti ni jakanchaa da ñu'un un nuu chaa ka sajniñu un, ti ni kee da kua'an da, ti ni kuna'an kua'an da.¹⁰ Nu ni jaa kivi nastutu da tika'ya un, ti ni taji da iin muzu ja na kin kakan da sava tika'ya un ja kuu maa da nuu chaa ka yinda'a un. Ko ni ka ki'in da chaa un, ni ka kaja

da chaa nuu ñu'un, ti ni ka nataji da chaa kuano'on da sia'an ni.

¹¹ Ti chaa xiin jniñu un, ni taji tuku da inga muzu da kua'an, ko suni ni ka ka'an ndeva'a chaa ka ndito un nuu da, ni ka kaja da chaa, ti kuano'on da sia'an ni tuku. Tundo ni ka ja'a da nuu da.¹² Chaa xiin un, ni taji tuku da inga da, ko chaa ka ndito jniñu un ni ka stuji da chaa, ti ni ka keni'in da chaa kua'an da.

¹³ Yukan na ti chaa xiin ñu'un un, ni ndo'o ini da: “Ñasa sa'a yo vijna na? Va na taji yo se'e yo na ki'in da va'a ga, ti nu na kuni chaa un nuu da, ti va kuandatu da naa da”, ni ndo'o ini da.¹⁴ Ko nu ni ka jini chaa ka ndito jniñu un nuu se'e chaa xiin ñu'un un, ti ni ka kachi da: “Chaa ja'a kuu ja xiin ta'u. Va'a ga na ka'ni yo, ti na kendo ndiñi yo jiin yaji ja'a”, ni ka kachi da.¹⁵ Ni ka jniñi da chaa un, ni ka keni'in da chaa fuera yu'u ñu'un un, ti ni ka ja'ní da chaa. ñTi ndoo sa'a chaa xiin ñu'un un jiin chaa ka ndito jniñu ja sia'an?¹⁶ Va najaa da ti ka'ni da chaa ka kuu muzu un, ti kua'a da ñu'un un nuu ñinga yivi ka ndito un —ni kachi Jesús.

Nu ni ka jiniso'o yivi jnu'un un, ti ka ka'an:

—iNi tu kachi Yandios ja koo sia'an nuu yo, nanu ni jna'an muzu ni ka ndito i ñu'un tika'yí un! —ni ka kachi i.

¹⁷ Yukan ti ni nde'e Jesús nuu yivi un, ti ni kachi ya:

—Nusa ti ñdoo kuni ka'an jnu'un yoso nuu tutu Yandios ja kachi sia'an?

Yuū ni ka skaña chaa ni ka sa'a nama ja'a, kuu ja kanuu ga

ja ndiso jniñu jiki iin ve'e.

Kachi tutu.

18Ti nanu ni ka sa'a chaa ni skaña
yuū un, suni sia'an na kuu yivi tu
ka janta'u ru'u. Ti sia'an nanu ka
tuji yivi ka jiokava siki iin yuū, suni
sia'an jna'nu ndatu yivi tu kandixia
ru'u. Ko kivi na sa'a ndaa Yandios
kuachi i, ti yivi tu ni kandixia ru'u,
koo ndo'o i nanu jna'an iin yivi
kanakava iin yuū siki i ti kundi'i
kukuachi i sa'a —ni kachi ya.

Siki jnu'un kinya'u puesto

(Mt. 21.45-46; 22.15-22; Mr. 12.12-17)

19Ti chaa ka kuu sutu ka kuña'nu
un jiin chaa ka xna'an ley Israel
un, ni ka nduku da nasa kuu jnií
da Jesús hora un. Ko vanuxia ni ka
yu'u da nde'e da yivi un. Chi ni ka
chaku ini da ja siki maa chaa ka
kuña'nu un, ni ka'an Jesús jnu'un
un.

20Yukan ti chaa ka kuña'nu un
ni ka nduku da chaa ni ka nduku
jnu'un, ja na sa'a da ja chaa va'a ka
kuu da, ja na nduku da iin jnu'un,
na ndenu naa jnu'un kani Jesús, ti
navia sia'an ti na ni'in da ichi ja
kankuachi da ja'a ya, navia nakua'a
da ya nuu gobernador. **21**Ja yukan
kuu ja ni ka jikajnu'un da ya sia'an:

—Maestro, ka jini na ja ka'an ndaa
ni, ti xna'an ndaa ni ichi Yandios, ti
tu yu'u ni nde'e ni ni iin chaa vasu
kuña'nu ga da. **22**Nusa ti kachi ni
nuu na nasa ndo'o ini ni. ¿Iyo va'a
nu cha'u yo xu'un nuu gobierno
Romano xi tuu nu? —ni ka kachi da.

23Ko ja jini Jesús ja tu ka ndo'o
va'a ini da, ti ni kachi ya:

—¿Ndoo ka kuni xnda'u ra ru'u?
24Xna'an iin xu'un un nuu ri. ¿Naa

nūñu kuu ja nchaa nuu xu'un ja'a, ti
naa sivi kuu ja yoso un nusa? —ni
kachi ya.

25Ti ni ka kachi da:

—Nūñu maa rey nación Roma kuu
—ni ka kachi da.

Yukan ti ni kachi Jesús:

—Nusa ti kua'a nuu rey nación
Roma ja xiin maa da, ti kua'a nuu
Yandios ja xiin maa Yandios —ni
kachi ya.

26Yukan ti tu ni kuu chakuachi
da jiin jnu'un xna'an ya nuu yivi un.
Chi su'va ni ka naa ini da ja sia'an
ni nachiso ya nuu da, sa ni ti ni ka
jasí yu'u da naa da.

Jnu'un siki ja ka nandoto ndiyí

(Mt. 22.23-33; Mr. 12.18-27)

27Nu ni ya'a un, ti ni ka ja'an sava
chaa saduceo ni ka jande'e da Jesús.
Chaa saduceo un ka ka'an ja tukaa
ga ka nandoto ndiyí un, ti ni ka
kachi da:

28—Maestro, ni kachi Moisés ja
nu na kuū iin chaa ni iyo ñasi'i,
ti tu ni iyo se'e da jiin ña, ti kuu
nanda'a ñani ndiyí un jiin ña ja na
koo se'e ña, ti suchi un nduu nanu
se'e maa ndiyí un. **29**Ti yukan ni
iyo uxia da mani ñani da naa da.
Ti chaa ña'nú un ni nanda'a da, ko
tu ni iyo se'e ñasi'i da, ti ni ji'i da.

30Ni naki'in chaa kuu uu un ña'an
un, ko suni tu ni iyo se'e da jiin
ñá, ti ni ji'i da. **31**Ti chaa kuu uni
un ni naki'in tuku da ña'an un, ti
sia'an ni ka sa'a ndi uxia da, ko ndi
uxia da ni ka ji'i, ti tu ni iyo ni iin
se'e ña'an un. **32**Sandi'i ni ga ti ni
ji'i tu maa ña. **33**Ti nu na nandoto
ndiyí un naa da, ¿nau ndi'i uxia
ñani un xiin ñasi'i un, ja sia'an ni

ka nanda'a da jiin ña nu? —ni ka kachi da.

34 Yukan ti ni kachi Jesús jiin da naa da:

—Ja kuu nuu ñuyivi ja'a, chi kuu chaa, kuu ñasi'i ka nanda'a. **35** Ko nu na nandoto ndiyi un, ti kachi Yandios ja kuu kivi i ñuu nuu ta'u ya jniñu, ko tukaa kuu nanda'a i ni tu kua'a i se'e si'i i ja nanda'a ña. **36** Ti yukan tukaa ga ka ji'i ndiyi un, chi nduu i nanu ángel Yandios. Ka kuu i yivi Yandios ja kuu saa ni, chi maa Yandios ni naxndoto ya i. **37** Suni nu ka ka'u ra nuu tutu Yandios ja ni chaa Moisés, ti ni ka'an da siki chaa ka chaku vasu ja ni ka ji'i da na jana'an. Chi nuu kayu yukú un, ni kachi Yandios nuu da: “Maa ri kuu Yandios ja ka kanajaa Abraham jiin Isaac jiin Jacob.” Sia'an ni chaa Moisés jnu'un Yandios, chi ni ka chaku chaa un naa da. **38** Yukan kuni ka'an ja Yandios tu kuu ya Yandios nuu yivi ni ka ji'i un, chi kuu ya Yandios nuu yivi ka chaku, ja tu ka kendo i ma'ñu ndiyi, chi ni ka nandoto taká ndiyi un ja ka chaku i nuu ya, ja ka chiñu'un da Yandios ja kuu saa ni —ni kachi Jesús.

39 Yukan ti sava chaa ka xna'an ley Israel un, ni ka kachi jiin Jesús:

—Iyo va'a jnu'un ka'an ni, maestro —ni ka kachi da.

40 Yukan ti ni iin yivi, tukaa ni ka tava ini da kajnu'un ga da Jesús.

Nau se'e kuu Cristo

(Mt. 22.41-46; Mr. 12.35-37)

41 Yukan ti ni kachi Jesús jiin chaa ña'nu Israel un:

—Ka'an yivi ja Cristo kuu iin jna'an rey David na jana'an, vasu

maa Yandios ni taji ya ja na kundiso ya iin jniñu ña'nu ga ja kuu maa David. Ko vasu kuu ja sia'an ka ka'an yivi. **42** Ti maa David ni ka'an da nuu tutu Salmo sia'an:

Yandios ni kachi nuu Jito'o Cristo:

“Nukoo nda'a kua'a ri, chi ta'u ra jniñu jiin ri.

43 Iyo yivi jito u'u ro'o, ko kundee ra jiin, chi chindee ri ro'o.”

Ni kachi Yandios, kachi David.

44 Nu sia'an kuu ja maa David ni skonani da ya jito'o da, ti ènasa kuu ja Cristo kuu iin jna'an rey yo David na jana'an nusa? —ni kachi Jesús.

Ka'an Jesús siki chaa ka xna'an ley Israel

(Mt. 23.1-36; Mr. 12.38-40; Lc. 11.37-54)

45 Nu tendi'i yivi un ka ñuso'o i jnu'un xndaku Jesús, ti ni kachi Jesús jiin ndaja'a ya sia'an:

46 —Koto maa ra naa ra jiin chaa ka xna'an ley Israel. Koto ma sa'a ra nava ka sa'a da naa da. Chi chaa un ka jajna'an ini da ku'un da sa'ma nani, ja na kuni yivi ja chaa kuña'nu ka kuu da nuu veñu'un Israel. Ti ka kuni da ja na ka'an yiñu'un yivi jiin da nuu ya'u, ti na ka'an xia'u i jiin da, “Maestro, maestro.” Suni ka jajna'an ini da sillá yiñu'un ga nuu kunchuku da ini veñu'un Israel un. Ti ka kusii xaan ini da jiin jnu'un yiñu'un nuu kunchuku da kají da staa nuu iin viko. **47** Suni ka jisonchaa da ve'e ña'an ni kendo maa iin ña naa ña, ti ja tu kuni yivi jniñu kue'e ka sa'a da un, ti kani xaan ka jikanta'u da nuu Yandios. Ti ja kuu maa da

kii iin nundo'o ka'nu xaan ga —ni kachi ya.

Xu'un ni soko iin ña'an ni kendo nda'u

(*Mr. 12.41-44*)

21 Nuu yux'e veñu'un ka'nu un ni jini Jesús ja ka chu'un chaa riku un xu'un nuu jajnu un. ²Suni ni jini ya ja ni jaa iin ña'an nda'u xaan ni chu'un ña uu xu'un cobre kuachi, ³ti ni kachi ya jiin yivi ka'iin yajni un:

—Nde'e naa ra. Na kachi ndaa ri ja iin ña'an nda'u xaan ga ja'a, ya'u xaan nchaa xu'un ni ja'a ña un nuu Yandios ja kuu xu'un ni ka ja'a chaa riku un. ⁴Chi yivi riku xaan un, ni ka ja'a da jaku ni ja ka ñava'a da. Ko ña'an nda'u un, tu ñava'a kua'a ña xu'un, ko ni ja'a ndi'i ña ja ñava'a ña, vasu nandi'i ña ja kuu gastu ña —ni kachi ya.

Ka'an Jesús ja naa veñu'un ka'nu

Israel

(*Mt. 24.1-2; Mr. 13.1-2*)

⁵Ti sava ndaja'a Jesús ka ka'an da ja nde vii kaa veñu'un ka'nu un, ja nde vii kanda yuu un jiin taka ja ni ka soko yivi nu ni ka sa'a da veñu'un un. Ti ni kachi Jesús:

⁶—Ndi'i ja'a ka jitonchaa ra naa ra. Ko jandaa na kachi ri nuu ra naa ra ja, jaa iin kivi ja ni iin yuu tukaa kendo koso jna'an ja'a, chi ndi'i ja'a naa —ni kachi ya.

Naa seña koo nu kuan kuyajni ndi'i ñuyivi

(*Mt. 24.3-28; Mr. 13.3-23; Lc. 17.22-25, 31*)

⁷Yukan na ti ni ka jikajnu'un ndaja'a ya naa da:

—Maestro, ¿nasa da ti sa kundaa jnu'un ka'an ni un? ¿Ti naa seña koo ja kuan kuyajni kundaa taka jnu'un un? —ni ka kachi da.

⁸Ti ni kachi Jesús:

—Koto maa ra naa ra. Koto ma xnda'u yivi ro'o. Chi kua'a yivi kikoyo, ti ndaku ni'in yi sivi ri, ti kachi: “Ru'u kuu Cristo”, kachi i. Xi inga yivi ka'an: “Vijna kuu kivi ja ni taji Yandios ru'u ja sa'a ri jniñu ña'nú”, kachi. Koto kundikun ra jnu'un xndaku yivi un. ⁹Ti kuni ra jnu'un ja ya yukan koo guerra, ti kanaa yivi. Koto yu'u ra naa ra, chi sia'an ndixia kuu. Ko jiin yukan ti ni ti jaa ga kivi ja ndi'i ñuyivi —ni kachi ya.

¹⁰Yukan ti ni siin Jesús ka'an ya:

—Kanaa iin nación jiin inga nación, suni iin ñuu jiin inga ñuu.

¹¹Koo ñujnaa xaan, jiin jnama xaan, jiin kue'e xaan ya yukan. Ti koo seña nuu andivi ja undi yu'u yivi naa i nde'e i un.

¹²Ko xnakán ro'o ja ka kandixia ra ru'u, jnií yivi ro'o naa ra, ti kua'a i tau ra. Ti nakua'a i ro'o naa ra nuu chaa ka kuña'nu ini taka veñu'un Israel, ja na xndichi da ro'o naa ra, ti jnaa da ro'o vekaa naa ra. Ti suni ja siki ru'u, ti nakua'a da ro'o naa ra nuu chaa ka kuu rey ja ka ta'u jniñu nuu ni tu'u iin nación, ti suni na kua'a da ro'o nuu gobernador siki ja ka kandixia ra ru'u. ¹³Sia'an kuu ka'an va'a ra nuu chaa ka kuña'nu un, ja siki ru'u kuu ja ka jna'an ra nundo'o. ¹⁴Sia'an ti koto xndi'i ra ini ra ja nasa koo jnu'un ka'an ra nuu chaa ka kuña'nu un ja nama ra maa ra. ¹⁵Chi maa ri kuu ja kua'a inijnuni ra ja nasa koo

jnu'un ka'an ra naa ra, ti nava ni iin yivi ja koto u'u ro'o tu kundee chajna'an jnu'un ka'an jiin ra naa ra. ¹⁶Ti undi tata ra, ñani ra, jna'an ra, jiin amigo ra kinaa ña'an da ro'o naa ra, ti kachi da ja na kuū ra naa ra. Ti jandaa ni kuu ja tijni ra naa ra kuū.

¹⁷Ti tendi'i yivi ja tu ka kandixia i jnu'un ri, koto u'u i ro'o naa ra ja ni ka kandixia ra ru'u jiin jnu'un ka'an ri. ¹⁸Ko tu naa ni iin ixi xini ra naa ra, chi koto ya ro'o naa ra. ¹⁹Ti nu ka ñukuu ni ini ra jnu'un ri, ti kuchaku ra ja kuu saa ni.

²⁰—Nu ni ka jini ra ja, ja ni ka jiconduu soldado ñuu Jerusalén, yukan na ti kuni ra ja kuan kuyajni kivi ja naa ñuu un. ²¹Ti yivi kanchuku ñuu Judea, na kinkoyo i undi yuku un. Ti yivi kanchuku ñuu Jerusalén, na kekoyo i ñuu un, ti yivi ka'iin yuku xi ñuu jniñu, koto ma ndeokuñi ga i ñuu un naa i. ²²Chi kivi un kuu kivi kii nundo'o ka'nú xaan nanu yoso nuu tutu Yandios. ²³iNa nda'u ñaa ka ñuse'e xi ñaa ka nchaka suchi yikin ja kuu kivi un! Ko nundo'o xaan taka nuu ñuyivi ja kuu kivi un, ti kii iin nundo'o ka'nú xaan ja kuu yivi ñuu ja'a. ²⁴Kua'a yivi ñuu kuū nuu guerra un. Ti sava ga yivi un kinkoyo i presu nuu yivi inga nación. Ti ndunúú yivi ñuu jika un nuu yivi ñuu Jerusalén, ti sa'a ndeva'a i jiin da undi na jaa kivi na kachi maa Yandios ja sia'an koo jiin yivi un naa i.

Nasa ndii Jesús

(Mt. 24.29-35, 42-44; Mr. 13.24-37)

²⁵Nu ni ndi'i un, yukan na ti koo iin seña nuu ndikandii, yoo, jiin

choxini. Ti nuu ñuyivi ja'a sana ini yivi taka nación, chi yu'u i ja sa'a iyo nducha mar jiin ja iyo ndonda nuu nducha un. ²⁶Ti so sa'u ini yivi naa i ja sia'an na koo nuu ñuyivi. Ni'in nutu'u andiví ti nukoyo chuxini. ²⁷Yukan na ti ru'u, maa Se'e Yivi Ñuyivi, kuni yivi naa i ndenda ri, ti ndii ri nuu viko un, jiin jniñu ja ni nduña'nu xaan ri.

²⁸Nu ni keja'a kuu ndaa taka ja'a, koo ndee ini naa ra ti nava na kosii ini ra, chi ja yajni keta'u ra naa ra —ni kachi Jesús.

²⁹Suni ni kachi ya inga jnu'un ja'a, ti ni kachi ya:

—Nde'e naa ra, nutichi vixi un jiin sava'a ni ga inga nuu yujnu, ³⁰nu ja ni nduyucha numa i, ti ja ni chaku ini yo ja kuan kuyajni viko sau. ³¹Ti suni sia'an kuu nu ja ni keja'a kuu ndaa taka jnu'un ja'a, ti ni jini yo ja kuan kuyajni ndaa kivi nu keja'a ta'u ri jniñu jiin Yandios nuu nii tu'u ñuyivi ja'a. ³²Ti jandaa na kachi ri ja taka un kuu ndaa xnakan, ti sa kuū yivi ka iyo kivi vijna. ³³Va naa andiví jiin ñuyivi, ko jnu'un ka'an ri, jankivi naa kuiti, chi taka un kuu ndaa.

³⁴Koto maa ra naa ra ja tu kinikava ra nuu kuachi nava ka ndo'o ini ra, ja najini ra jiin ndixi, xi inga jniñu kue'e, xi ja kujneñu ra nduku ra ja kuchaku ra, nava tu kinaa ri ro'o naa ra kivi nchaa ri, nanu iin vekaa nu ni nandi'yu. ³⁵Chi sia'an kii kivi un sikí taka yivi kanchuku nuu nii tu'u ñuyivi.

³⁶Yukan kuu ja nini kotu'va ra naa ra, ti kondito ra ja na kakanta'u ra nava na keta'u ra nuu taka nundo'o kii un. Nu sia'an na ti tu kukanuu

ra kijiin ra nuu ru'u ja kuu ri maa Se'e Yívi Ñuyivi —ni kachi ya.

³⁷Ti na kivi un ni xna'an Jesús nuu yívi nuu yux'e veñu'un ka'nu un ja kuu nduu, ti ja kuu jakuaa ja'an kendo ya undi yuku nani Olivos. ³⁸Ti ña'an ka jakoyo yívi kua'a ja na kunso'o i jnu'un ka'an ya ini veñu'un ka'nu un.

Ka ndajnu'un da nasa jnií da Jesús

22 Yukan ti kuan kuyajni ndaa viko ja ka yee da staa stila ja tu yi'i levadura, ja suni ka ka'an da viko pascua. ²Ti sutu ka kuña'nu jiin chaa ka xna'an ley Israel un, ka ndajnu'un da ja nasa kuu ti ka'ni da Jesús. Ko ka yu'u da sa kuvaayívi siki da naa da.

³Yukan ti Judas, ja suni nani da, chaa ñuu Cariote, ni kivi ja'u'u un ini da, ti ni ndo'o ini da ja nakua'a da Jesús nuu sutu ka kuña'nu un. Ti maa da suni kuu da iin jna'an nuu ndi uxi uu apóstol un nuu ya.

⁴Ti chaa ja'a ni ja'an da nuu sutu ka kuña'nu un jiin suni nuu chaa ka yinda'a veñu'un ka'nu un, ti ni ndajnu'un Judas jiin da naa da ja nasa nakua'a da Jesús nda'a chaa un naa da. ⁵Ti ni ka kusii xaan ini da jiin jnu'un ni ka'an Judas, ti ni kachi da ja kua'a da xu'un nuu da. ⁶Ti Judas ni janta'u da nava ni ka kachi chaa un. Ti ni keja'a nduku da nasa kuu nakua'a da Jesús nuu chaa un naa da, iin hora ja tu kaa ga naa yívi iyo.

Ni ka kuxini Jesús jiin ndaja'a ya

⁷Yukan ti ni jaa kivi viko ja ka yee da staa stila ja tu yi'i levadura. Ti suni kivi yukan ka ja'ni da iin

lelu ja ka soko da nuu Yandios ja kuu viko pascua un. ⁸Yukan ti ni taji Jesús Pedro jiin Juan, ti ni kachi ya jiin da naa da:

—Kuankoyo ti satu'va ra ja kuxini yo vijna viko pascua naa yo —ni kachi ya.

⁹Ti ni ka jikajnu'un da:

—¿Nanu kuni ni ja kinkoyo na satu'va na naa na nusa? —ni ka kachi da.

¹⁰Ti ni kachi ya:

—Nuu na jaa ra ñuu un, ti yukan ndejna'an ra jiin iin chaa ndiso iin kiyi nducha. Kundikun ra da undi na najaa da ve'e da, ¹¹ti kachi ra jiin chaa xiin ve'e un naa ra: “Kachi Maestro na: ¿Nanu kande iin ve'e nuu satu'va ri ja kuxini ri jiin ndaja'a ri vijna viko pascua”? kachi ra naa ra.

¹²Yukan na ti kin xna'an da ro'o iin ve'e ka'nu ja kaxndee nuu sukun un, ti ja iyo nakoo, ti yukan satu'va ra naa ra ja kuxini yo —ni kachi Jesús jiin Pedro jiin Juan.

¹³Ti kuankoyo da naa da undi ñuu nava ni kachi Jesús, ti ni ka nani'in da ve'e ni kachi ya un. Ti yukan ni ka satu'va da ja kuxini da naa da ja kuu viko pascua.

¹⁴Nu ni kuu hora ja kuxini, ti ni jaa Jesús jiin uu ga ndaja'a ya, ti ni kanchuku da nuu mesa ka yee da staa. ¹⁵Yukan ti ni kachi Jesús jiin da naa da:

—Xaan ga ñukuu ini ri ja xnakan kuxini ri jiin ra naa ra, vijna kivi viko pascua, ti sa na kuū ri. ¹⁶Chi na kachi ndaa ri nuu ra naa ra ja tukaa ga kunchuku yo sia'an kuxini yo undi na kundaa kivi ja ni'in ri jniñu ña'nu ga ja kua'a Tata ri

Yandios nuu ri, ja na ta'u ri jniñu jiin maa ya nuu tendi'i nitu'u ja iyo. Undi yukan ti sa na kuxini tuku yo —ni kachi ya.

¹⁷ Yukan sa ni ki'in Jesús iin vasu vino, ni nakuanta'u ya nuu Yandios, ti ni kachi ya:

—Ko'o ti'lí ti'lí naa ra. ¹⁸ Chi jandaa na kachi ri ja tukaa ga ko'o ri nu ka sa'a jna'an yo viko ja'a, undi na jaa kivi ti nasa'a yo ñuu nuu ni'in ri jniñu ña'nu ga nuu Tata ri Yandios, ti ta'u ri jniñu jiin maa ya nuu ni tu'u ja iyo. Ti nu kunchuku jna'an yo ñuu un, yukan na ti sa nasa'a jaa yo viko ja'a —kachi ya.

¹⁹ Ti suni ni ki'in ya iin staa stila, ti ni nakuanta'u ya nuu Yandios. Yukan na ti ni sakuachi ya, ti ni tejna'an ya nuu da naa da ja na kee da, ti ni kachi ya:

—Ja'a kuu nanu yíki kuñu ri ja soko ri, ja na chunaa ri nuu kuachi ra naa ra. Ti nini sa'a ra sia'an naa ra ja ka nuku'un ini ra ru'u ja ni ji'i ri ja kuu nuu maa ra naa ra —ni kachi Jesús.

²⁰ Yukan ti nu ni ndi'i ni ka kuxini da ti ni ki'in ya vasu vino un, ti ni kachi ya:

—Ja ñu'un vaso ja'a kuu nanu niñi ri ja soko ri. Ti stuu ndijin niñi ri iin jnu'un jáá ni kachi Tata ri. Ti jnu'un un ka'an ndaa kuiti ja nama ya kua'a yivi, chi katí ri niñi ri ja chunaa ri nuu yivi naa i. ²¹ Ko vijnal ti chaa ja kin nukua'a ru'u nuu chaa ka jito u'u ru'u un, kaxndee nda'a da jiin nda'a ri nuu mesa ja'a. ²² Chi ru'u, maa Se'e Yívi Ñuyivi, siuku ndaa ri nava ni kachi maa Yandios, ko xaan ga nda'u chaa nakua'a ru'u

nuu chaa ka jito u'u ru'u —ni kachi Jesús.

²³ Yukan ti ni keja'a ka jikajnu'un jna'an da naa da nau iin da kuu ja nakua'a ya nuu chaa ka jito u'u ya.

Ka ndajnu'un ndaja'a Jesús na ndenu nau iin da kuña'nu ga

²⁴ Yukan na ti ndaja'a Jesús ni ka keja'a ka ndajnu'un da na ndenu nau iin da kendo kuña'nu ga. ²⁵ Ti ni kachi Jesús jiin da naa da:

—Chaa ka kuu rey nuu taka ga nación, vanua maa da ka xiin nación un, ti ja yukan kuu ja nde kua'an ga da jiin yívi nación da. Ti jaa sia'an xaan ini da, ti ka sa'a yivi ja nakua'a i ja yiñu'un nuu chaa kuña'nu un, nava na kuu va'a ini da nuu i. ²⁶ Ko ro'o naa ra, tu sa'a ra sia'an, chi nuu nau ja kuña'nu ga nuu ra naa ra, su've na kuanukuachi da nanu ja tu ndiso jniñu da, chi nau ja ta'u jniñu, suni na kuanukuachi. ²⁷ ¿Xi nau kuu ja kuña'nu ga nu? ¿Ja nukoo nuu mesa xi ja kunukuachi nuu mesa un nu? ¿Xi ansu jandaa kuu ja kuña'nu ga chaa nukoo mesa un nu? Ko ru'u chi kancha ri jiin ra naa ra nanu iin chaa junukuachi ni.

²⁸ Ti ro'o naa ra, nini ka'lín ra jiin ri taka kivi ja jito ri nundo'o. ²⁹ Ti ja yukan kuu ja na kua'a ri ja kuu ta'u ra naa ra. Nu na ni'in ri iin jniñu ña'nu ga nuu Tata ri Yandios ja na ta'u ri jniñu jiin maa ya nuu tendi'i nitu'u ja iyo, ti suni kua'a ri jniñu ña'nu nuu ra naa ra. ³⁰ Kundiso ra iin jniñu ja na nukoo ra naa ra iin iin sillu kanuu ga, ti xndichi ra ndi uxi uu familia jna'an yo ja ka kuu i yivi nación Israel. Yukan kuu jniñu

ñá'nu ni'in ra, ti suni yukan kaji ko'o ra jiin ri nuu mesa ñuu nuu ta'u ri jniñu —ni kachi Jesús.

Kachi Jesús ja chisa'yí Pedro ya

³¹ Suni ni kachi Jito'yo Jesús jiin Simón:

—Simón, Simón, na kachi ri nuu ra ja siki ja'u'u un, chi ni jikan ja kotojnuni taka ro'o ja ka kuu ndaja'a ri. Ja siki nundo'o kii un, kuni ja'u'u uu siu'u ro'o ti kisi ro'o naa ra nanu sa'a yo jiin triu. ³² Ko maa ri ja ni jikanta'u ri ja'a ra nuu Yandios nava tu nukoyo ra nuu kuachi, ti kachi ra ja tukaa ka kandixia ra ru'u. Ko nu na kachi ra ja tu kandixia ndaa ra ru'u kívi chaa nundo'o un, ko nu yukan ti nakani tuku ini ra nuu kuachi un, ti kuanka'nu ini Yandios nuu ra, Simón. Yukan na ti chindee ñanijna'an ra ti kua'a ra jnundee ini da, nava na siin ni ini da ti na kandixia ndaa da ru'u —ni kachi ya.

³³ Yukan na ti ni kachi Simón:

—Jito'yo, ja iyo tu'va na ja kondo'o na jiin ni undi vekaa vasu na kuū na jiin ni —ni kachi da.

³⁴ Ti ni kachi Jesús jiin da:

—Pedro, jandaa na kachi ri ja vijna, ti kana ga li'i, ti ja chisa'yí ra ru'u uni jinu, ja kachi ra ja tu jini ra ru'u —ni kachi ya.

Ja ni kuyajni hora koto ya nundo'o

³⁵ Yukan ti ni jikajnu'un Jesús nuu tendil'i ndaja'a ya un:

—Na ni taji ri ro'o ni ka ja'an ra naa ra ja ni ka'an ra jnu'un Yandios, ti tu ni ka yinda'a ra bolsa, ni xu'un, ni ndijña, éxi nau ja ni kumani nuu ra naa ra nusa? —ni kachi ya.

Ti ni ka kachi da:

—Tu kuiti —ni ka kachi da.

³⁶ Yukan na ti ni kachi ya jiin da naa da:

—Ko vijna ti na kachi ri, nu nau ja ka ñava'a bolsa, ti na kunda'a ki'in jiin. Xi nu ñava'a ra xu'un ti kunda'a ra. Ko nu nau chaa tu ñava'a espada ja koto da maa da, ti na xiko da tikachi da ti na kuan da. ³⁷ Chi na kachi ri ja kundaa jiin ri nava yoso nuu tutu ja sia'an kondo'o ri: “Sa'a yívi jiin ri nanu ka sa'a i jiin iin chaa ndeva'a ja tu ka jandatu da nuu ley.” Chi taka ja yoso nuu tutu siki ri, vijna ti kundaa —ni kachi ya.

³⁸ Yukan ti ni ka kachi da:

—Jito'yo, ko ja'a iyo uu espada —ni ka kachi da.

Ti ni kachi Jesús:

—Sia —ni kachi ya.

Ni jikanta'u Jesús chii yuku Olivos

³⁹ Yukan na ti kua'an Jesús undi chii yuku Olivos nava sa'a maa ya, ti ni ka ndikun ndaja'a ya kuankoyo da jiin ya. ⁴⁰ Ti nu ni ka jakoyo da chii yuku un, ti ni kachi ya jiin da:

—Kakanta'u naa ra ja'a nava tu kaña ini aňu ra ja sa'a ra iin jniñu kue'e —ni kachi ya.

⁴¹ Yukan ti ni jika ya ti'li ga kua'an ya, ku'va jika ski'in yo iin yuu, ti yukan ni jakunjiti ya, ja kakanta'u ya nuu Yandios, ⁴² ti ni kachi ya:

—Tata na Yandios, nu kuni ni ti chajijo ni nundo'o kii siki na un, ti nama ni saña, ko ansu nava kuni maa na, chi na kuu nava kuni maa ni —kachi ya.

⁴³ Ti yukan ni ndenda iin ángel Yandios ja ni kii nuu andivi, ti ni

ja'a ángel un jnundee ini ya ja na siuku ya taka nundo'o un. ⁴⁴Ti ja xaan kukui'ya ini ya, ti vi'i ga ni keja'a jikanta'u ya jiin niñ ini da, ti keja'a kaña ka'nii nuu ya, ti keja'a too nuu ñu'un un, nanu na'nu yuyu niñi too nuu ya. ⁴⁵Nu ni ndi'i ni jikanta'u ya, ni nandeokuñi ya nuu ka'iin ndaja'a ya. Ti ni jini ya ja ka kixi da, chi jiin jnukui'ya ini un tukaa ga ni ka kundee da kakanta'u da. ⁴⁶Yukan na ti ni kachi ya:

—¿Ndo xaan ka kixi ra naa ra?
Ndoko ti kakanta'u ra nava tu kotojnuni ja'u'u un ro'o, kachi ra ja tu ka jini ra ru'u, ti chisa'yí ra ru'u —ni kachi ya.

Ni ka jnii da presu Jesús

⁴⁷Ti ni ka'an ga ya sia'an, ja ni ka kenda kua'a xaan yivi kuajakoyo nuu ya. Ti chaa nani Judas, ja suni ni kuu da iin ndaja'a nuu Jesús, yoxnuu da vaji da nuu chaa un naa da. Ti ni tu'va da nuu Jesús, ti ni teyu'u da nuu ya. ⁴⁸Ti kachi ya jiin da:

—Judas, ¿xi ja so teyu'u ra nuu ri ti kinaa ra ru'u, ti sia'an nakua'a ra maa Se'e Yívi Ñuyiví nuu yivi ka sa'a ndeva'a nu? —ni kachi ya.

⁴⁹Ti nu ni ka jini chaa ka'iin jiin Jesús ja sia'an kuu, ti ni ka jikajnu'un da:

—Jito'yo, ¿ki'in na siki yivi ja'a jiin espada nu? —kachi da naa da.

⁵⁰Ti iin chaa ka'iin jiin Jesús ni stuji da so'o iin muzu sutu kuña'nun, ti ni ja'ncha da so'o da so'o kua'a.

⁵¹Ko ni kachi Jesús:

—Sia da naa ra, chi ja ni kuu sia'an ni —ni kachi ya.

Yukan ti ni kue'e Jesús so'o chaa un, ti ni nduva'a ni da.

⁵²Yukan na ti ni kachi ya jiin sutu ka kuña'nun, jiin chaa ka yinda'a veñu'un ka'nun, jiin nuu taka chaa ka kuña'nun nación Israel ja vekoyo da ja ki'in da jiin ya, ti ni kachi ya:

—¿Va nu iin chaa kui'na kuu ri, xi ni ndonda ri siki gobiernu nu? ¿Xi ndoo kuu ja vekoyo ra jiin espada jiin yujnu ja jniñ ra ru'u naa ra?

⁵³Ti taka kivi ni kuncha ri jiin ra naa ra ini veñu'un ka'nun, ko ni tu ni ka jniñ ra presu ru'u. Ti kivi vijna vekoyo ra naa ra, chi ka ndo'o ndeva'a kuiti ini ra siki ri. Ti vijna kuu ja na siuku ra naa ra, chi nuu ñuñaa ka sa'a ra nava kuu ini maa ra na ra. Chi jniñu ja'a kuu ja ndiso ja'u'u un ja yinda'a ñuñaa —ni kachi ya.

Ka'an Pedro ja tu jini da Jesús

⁵⁴Ni ka jnii da presu Jesús ti kuankoyo da jiin ya undi ve'e sutu kuña'nun, ti Pedro jika jika ni, ni ndikun da jata yivi un. ⁵⁵Ti sava yuxe'e chaa un ni ka xna'an policia un iin ñu'un, ti ni ka nakuiconduu da kanchuku da yunu'un un ka nduxin da. Ti suni ni nukoo Pedro ma'ñu da naa da. ⁵⁶Ti iin ña'an junukuachi ve'e un ni jini ña nukoo Pedro yuñu'un un. Ni nde'e va'a ña nuu da, ti ni kachi ña:

—Suni kande chaa ja'a jiin chaa ni ka jnii da un niku —kachi ña.

⁵⁷Ko ni chisa'yí Pedro ja tu jini da Jesús, ti ni kachi da:

—Tu jini kuiti ri chaa yukan —ni kachi da jiin ña.

⁵⁸Ni kunuu ga, ti ni jini ñinga chaa un nuu Pedro, ti ni kachi:

—Ro'o, suni kuu ra jna'an chaa un
—ni kachi da.

Ko ni kachi Pedro:

—Ansu kuu ri, vasu na kajnu'un
ndaa ra ru'u —kachi da jiin chaa
un.

⁵⁹Ni kuyajni iin hora, ti ni kachi
tuku inga da:

—Ndixia ra naa ra, ja suni ni kunde
chaa ja'a jiin chaa un, chi suni chaa
ñuu Galilea kuu da —ni kachi da.

⁶⁰Yukan sa ni kachi Pedro jiin
chaa un:

—Tu jini kuiti ri naa jnu'un ka'an
ra jiin ri —kachi da.

Ti hora un, ni ka'an ga da sia'an,
ti ni kana iin li'i. ⁶¹Yukan ti ni
ndeokoto Jito'yo Jesús, ti ni nde'e
ya nuu Pedro. Ti Pedro ni nuku'un
ini da nava ni kachi Jito'yo Jesús
jiin da: "Ja nu ti kana ga li'i, ti
kachi ra uni jinu ja tu jini ra ru'u."
⁶²Yukan na ti ni kenda da kua'an
da, ti ni nde'e xaan tonto da ja ni
nakani ini da. Ti ni kukui'ya xaan
ini da ja ni kachi da ja tu jini da ya.

Ka yisikinchaa da Jesús

⁶³Ti taka chaa ka ndito Jesús, ni
ka ku ichi ini da nuu ya, ti ni ka
kani da ya. ⁶⁴Ni ka jasi da nduchi
ya, ti ni ka kani da jiki nuu ya, ti
kachi da jiin ya:

—Kachi nau ja ni kani ro'o —ni ka
kachi da.

⁶⁵Ti kua'a ga jnu'un ndeva'a ni
ka ka'an da nuu ya, ja ka skuiti da
ini ya.

Kandichi Jesús nuu chaa ka kuña'nú nación Israel

⁶⁶Nu ni kundijin inga kivi, ti ni
ka ndututu taka chaa ña'nú nación

Israel, jiin taka sutu ka kuña'nu un,
jiin taka chaa ka xna'an ley Israel
un. Ti ka yinda'a policia un Jesús
nuu ni ka ndututu chaa ka kuña'nu
un, ti yukan ni ka jikajnu'un da ya:

⁶⁷—Kachi ndaa nuu maa ra kuu
Cristo ja vaji nuu Yandios —ni ka
kachi da.

Ti ni kachi ya:

—Nu na kachi ri ja maa ri kuu,
ni tu kandixia ra naa ra. ⁶⁸Ti nu
kajnu'un ri ro'o naa ra ja nasa ka
ndo'o ini ra siki ri, va ni tu kachi
kuiti ra, ti ni tu sia ra ru'u naa ra.
⁶⁹Ko vijnna na kachi ndaa ri ja ru'u,
maa se'e Yivi Ñuyivit, kino'on ri
nuu andivi ti yukan nukoo ri nda'a
kua'a Yandios, ja na ta'u ri jniñu
jiin ya nuu tendi'i nitu'u ja iyo —ni
kachi ya.

⁷⁰Yukan na ti tendi'i yivi un ni ka
jikajnu'un maa ya:

—¿Nusa, ti maa ra kuu Se'e
Yandios nu? —kachi naa.

Ti ni kachi Jesús:

—Maa ri kuu nava ni ka kachi ra
naa ra —ni kachi ya.

⁷¹Yukan na ti ni ka kachi da:

—¿Nanu nandi'i ga yo inga
testigo? Ti ja ni ka jiniso'yo yo
jnu'un ni ka'an da jiin ndusu yu'u
maa da —ni ka kachi da.

Kandichi Jesús nuu Pilato

(Mt. 27.1-2, 11-14; Mr. 15.1-5; Jn. 18.28-38)

23 Yukan na ti ni ka ndokuiñi
yivi un ti kuankoyo
jiin Jesús nuu Pilato, chaa kuu
gobernador. ²Ti yukan ni ka keja'a
yivi ka kankuachi siki ya, ti kachi
naa:

—Ni ka jniñi na chaa ja'a chi ska'an
da yivi ja na ndonda i siki taka

chaa ka kuña'nu. Ti kachi da ja tu cha'u yo puestu nuu gobiernu romano, ti suni ka'an da ja maa da kuu Cristo, ja kuu rey ja ni taji Yandios —ni ka kachi da naa da.

³ Yukan na ti ni jikajnu'un Pilato maa ya:

—¿Maa ra kuu rey nuu yivi nación Israel nu? —kachi da.

Ti ni kachi Jesús:

—Maa ri kuu, nava ni kachi ra —kachi ya.

⁴ Yukan ti ni kachi Pilato nuu suntu ka kuña'nu un jiin nuu taka yivi un:

—Tu ni iin kuachi ni'in ri siki chaa ja'a—ni kachi da.

⁵ Ko vi'i ga ni ka ka'an yivi un:

—Ja ni ska'an da taka yivi nuu Judea ja na ndonda i jiin jnu'un xna'an da un. Ni keja'a da jiin jnu'un un undi ñuu Galilea, ti vijna ni chaa da undi nuu kanchuku yo ja'a—kachi i naa i.

Kandichi Jesús nuu Herodes

⁶ Nu ni jiniso'o Pilato jnu'un un, ti ni jikajnu'un da nuu yivi un ja nu Jesús kuu ya chaa ñuu Galilea. ⁷ Nu ni ka kachi yivi un ja suu kuu ya, ti ni taji da ya kua'an ya nuu Herodes, chaa ni kuu gobernador ñuu Galilea, ja suni kande da ñuu Jerusalén kivi yukan.

⁸ Ti nu ni jini Herodes nuu Jesús, ni kusii xaan ini da, chi ja ni kuu na'an ndo'o ini da ja kuni da nuu ya. Chi ni jiniso'o da ka jani yivi jnu'un siki ya, ti kuni da ja na sa'a ya iin jniñu ña'nu nuu da. ⁹ Kua'a xaan jnu'un ni jikajnu'un da Jesús, ko tu ni nachiso kuiti ya ni iin jnu'un nuu da.

¹⁰ Ti suni ka'iin taka suntu ka kuña'nu un jiin chaa ka xna'an ley Israel un, ja ni'l'in xaan ka jikan kuachi da ja'a ya. ¹¹ Yukan ti Herodes jiin soldado da, ni ka ku ja'a ini da nuu ya, ti ni ka yisíkinchaa da ya. Ni ka naskui'na da ya jiin iin sa'ma va'a xaan, nanu ja kuu ya iin rey. Yukan ti ni nataji tuku Herodes Jesús nuu Pilato. ¹² Ti undi kivi yukan sa ni ka ndumani jna'an Pilato jiin Herodes, chi undi nuu ni ka jito u'u jna'an da naa da niku.

Ni kachi Pilato ja na kuū Jesús

(Mt. 27.15-26; Mr. 15.6-15; Jn. 18.38-19.16)

¹³ Yukan na ti ni nastutu Pilato taka suntu ka kuña'nu un, jiin chaa ka ndiso jniñu ña'nu nuu nación Israel, jiin yivi ñuu un, ¹⁴ ti ni kachi da:

—Ni ka chakoyo ra jiin chaa ja'a nuu ri. Ti ka ka'an ra ja ska'an da yivi. Ko nde'e ra naa ra ja ni jikajnu'un ri da, ti tu ni'in ri ni iin kuachi siki da nava ka chakuachi ra ja'a da. ¹⁵ Suni Herodes tu ni ni'in da ni iin kuachi siki chaa ja'a. Ja yukan kuu ja ni nakua'a tuku da chaa ja'a nuu yo. Ja ka jini ra naa ra ja tu ni sa'a da ni iin kuachi ja kuū da. ¹⁶ Na ta'u ri jniñu nuu soldado ja na kua'a da tau chaa ja'a, ti sa na sia ri da ki'in da —ni kachi Pilato.

¹⁷ Ti iyo jnu'un ja taka viko pascua sia Pilato iin presu, nau ja na kachi yivi ja sia da. ¹⁸ Ko tendi'i yivi un ni ka keja'a ka kanako'o:

—iNa kendo chaa jña na kuū da! iSia Barrabás! —kachi yivi un naa.

19 Ti kande Barrabás vekaa siki, ja ni ndonda da siki gobierno ja ni ka kanaa da ñuu un, ti ni ja'ni da ndiyi. **20** Ko Pilato, kuni sia da Jesús, ti ni kachi tuku da jiin yivi un ja na xndaku da nuu i ja na sia da Jesús, chi Barrabás iyo xaan kuachi da. **21** Ko yivi un vi'i ga ni ka kanajiin ko'o:

—iKatakaa ni chaa jña nda'a cruz! iKatakaa ni chaa jña nda'a cruz, na kuū da! —kachi naa.

22 Ko jinu ku uni ni kachi tuku Pilato jiin yivi un:

—¿Ko naa kuachi ni sa'a da nusa? Ja ru'u tu nau ni iin kuachi ni'lín ri siki da ja jiin kuachi un na kuū da. Na ta'u ri jniñu ja na ndo'o da ti sa na sia ri da na ki'in da —ni kachi Pilato.

23 Ko yivi un ni ka siin ka kanako'o, ja ka jikankuachi ja na katakaa da Jesús nuu nda'a cruz. Ti ni ka siin da ka kanako'o da jiin chaa ka kuña'nu un, undi ni ka kundee da ja ni kuu nava ka kuni da. **24** Yukan ti ni ja'a Pilato jnu'un ja na kuu nava ka kuni da. **25** Ti ni sia da chaa ni ka jikan yivi un nuu da, chaa kande vekaa ja ni ndonda da siki gobierno, jiin ja ni ja'ni da ndiyi. Ti ni nakua'a Pilato Jesús nuu yivi un, ja na sa'a i nava ka kuu ini maa i jiin ya.

Ni ka jatakaa da Jesús nuu nda'a cruz

(Mt. 27.32-44; Mr. 15.21-32; Jn. 19.17-27)

26 Ichi nuu kuankoyo da jiin Jesús ja katakaa da ya, ni ka ndejna'an da jiin iin chaa ñuu Cirene nani Simón, ja vendi da ni ja'an da ranchu da. Ti ni ka chayika da chaa un

ja na kundiso da cruz Jesús, ti na kundandikun da jata ya.

27 Yukan kuankoyo yivi kua'a. Ti suni kuankoyo kua'a ñasi'i ja ka kanajiin ko'o ña, ka nde'e ña, ja ka kunda'u xaan ini ña ja kuu ya. **28** Ko ni nandeokoto Jesús nuu ña naa ña, ti ni kachi ya:

—Ro'o, ña'an Jerusalén naa ra, tu nde'e ra ja'a ri. Nde'e naa ra ja kuu ja'a maa ra jiin se'e ra, **29** chi kiji kivi ja koo nundo'o xaan siki ra, ti kachi ra naa ra: “Xaan ga ndatu ña'an tu se'e, ja tu ni ka ñu'un se'e ña, ja tu ni ka nchaka ña suchi yikin ja kaxin i jika ña.” **30** Ti kivi un kachi yivi naa i: “Va'a ga ja na nduva yuku ja'a siki ri naa ri, ti na kuū ri.” Ti kachi i jiin yuku un: “Va'a ga ja chisa'yí ru'u naa ri”, kachi i. **31** Chi na kachi ndaa ri nuu ra ja yivi ja'a, ja ka sa'a ndeva'a i sia'an jiin ri, ka sa'a i nanu ja ka ja'ma i yujnu yi'i ja tu kuni kayu, chi tu chaku va'a ini i ndoo ka sa'a i jiin ri. Ti yivi ka sa'a ndeva'a sia'an jiin ri vijna, ti ja kuu kivi un kii iin nundo'o xaan ga siki i. Ti yachi kii nundo'o un siki i nanu ja nu ka'ma yo iin yujnu ichi —ni kachi Jesús.

32 Suni ka yinda'a da uu chaa ni ka ja'ni ndiyi, ja na kuu da naa da jiin Jesús. **33** Ti nu ni ka jakoyo da iin ñu'un ja nani “yíki xini”, ti yukan ni ka jatakaa da ya nda cruz jiin ndinduu chaa ni ka ja'ni ndiyi un, iin da ichi nda'a kua'a ya, ti inga da ichi nda'a sajni ya. **34** Ti hora ka chijnii da ya nuu nda'a cruz, ti ni kachi ya:

—Tata na Yandios, kuanka'nú ini ni nuu yivi ja'a, chi tu ka jini i ndoo ka sa'a i —ni kachi ya.

Ti soldado un ni ka chu'un da suerte siki sa'ma Jesús, ja na tejna'an nuu jna'an da.

³⁵Yivi ka'iin un ka nde'e va'a nuu ya, ti undi chaa ka ndiso jniñu ña'nu un, suni ni ka ske ichi ini da nuu ya, ti ka ka'an da:

—Ni nama da sava yivi, ko vijna na ti na nama da maa da nu jandaa ndixia kuu ja maa da kuu Cristo, ja ni nakaji Yandios ja kii —kachi da naa da.

³⁶Ti suni undi soldado un ni ka kuu ichi ini da nuu ya. Ni ka tu'va da, ti ni ka ja'a da vino iya ja na ko'o ya, ³⁷ti ni ka kachi da jiin ya:

—Nu ndixia ra ja maa ra kuu rey nuu nación Israel, ti nama maa ra vijna ñu'ni —kachi da naa da.

³⁸Ti xini cruz ya yukan ni ka teña da iin tutu ja yoso jiin letra griego, jiin latín, jiin hebreo, ja kachi sia'an: “Chaa ja'a kuu Rey nuu yivi nación Israel.”

³⁹Ti iin chaa yindaka nda'a cruz un ni ka'an ndeva'a da nuu ya, ti kachi da:

—Nu maa ra kuu Cristo, nama maa ra vijna, ti nama ru'u naa ri —ni kachi da.

⁴⁰Ko inga chaa yindaka jiin da un, ni nduxaan da nuu da, ti ni kachi da:

—Ja tu yu'u ra nde'e ra Yandios. ¿Xi tu jini ra ja kunchakuachi ga yo nuu ya nu? Ti iin ni ja ka ndo'o yo naa yo.

⁴¹Maa yo chi vatu ni ka ndo'o yo, chi ja'a ni'in yo siki ja ni ka sa'a ndeva'a yo. Ko chaa ja'a, tu na iin kuachi ni sa'a da ja kondo'o da jiin yo —ni kachi da.

⁴²Yukan ti ni kachi da jiin Jesús: —Jesús, nuku'un ini ni saña kivi na keja'a ta'u ni jniñu ña'nu nuu ni tu'u ja iyo —ni kachi da.

⁴³Ti ni kachi Jesús jiin da:
—Jandaa na kachi ri jiin ra ja undi vijna ti ndii ra jiin ri andivi, nuu vii xaan kaa —ni kachi ya.

Ni ji'i Jesús

(Mt. 27.45-56; Mr. 15.33-41; Jn. 19.28-30)

⁴⁴Nu ni kuu sava nduu, ni kuñaa ni ka'nú ñuyivi, ti ni ndundijin undi ka uni ja'ini. ⁴⁵Ti ni kuñaa nuu ndikandii. Ti undi sa'ma yindaka ini veñu'un ka'nú Israel un, ni ndata sava kuiti undi nuu sukun ti undi nuu ja'a. ⁴⁶Yukan ti ni kanajin Jesús:

—Tata na Yandios, na ki'in ni añu na vijna —ni kachi ya.

Sia'an ni ka'an ya, ti ni ji'i ya.

⁴⁷Nu ni jini chaa kuu capitán romano un ja sia'an ni kuu, ti ni ka'an da ja kuña'nu xaan Yandios, ti ni kachi da:

—Jandaa kuiti kuu ja tu ni iyo ni iin kuachi chaa ja'a —ni kachi da.

⁴⁸Tendi'i yivi ka'iin un, ni ka jini ja sia'an ni kuu. Ti ichi kuankoyo i, ka kani i jiki jika i, chi ni ka yu'u i ja sia'an ni ka janhan i un. Ni ka kuu kui'ya ini i ja ka na'nú i ya.

⁴⁹Ko taka yivi ja ni ka jini jna'an jiin ya, ka'lín yi un jiin suni taka ñasi'i ja vekoyo ña jiin ya undi ñuu Galilea. Ni ka kendo jika ña ka nde'e ña taka ja ni kuu un.

Ni ka chunduji da Jesús

⁵⁰Ni iyo iin chaa va'a, ja ni jika ndaa da, nani da José, ni kuu da chaa ñuu Arimatea, ja kuu iin ndañuu Judea. Yi'i da nuu junta kuña'nu nación Israel un. ⁵¹Ti ni kandixia chaa un jnu'un ni xna'an Jesús, ja kuu kivi yivi nda'a Yandios

ja na ta'u ya jniñu nuu i, yukan ti ni'in yiví un iin ta'u ñuu ya ja kundiso i jniñu jiin ya. Ti maa da tu ni kejna'an da jiin chaa ni ka ndututu nuu junta un ja ni ka kachi da ja na kuū Jesús. ⁵² Ja yukan kuu ja ni ja'an da nuu Pilato, ti ni jikan da yíki kuñu Jesús ja na chunduji da. ⁵³ Nu ni kuni'in da yíki kuñu Jesús nuu nda'a cruz un, ti ni nasuku da ya jiin iin sa'ma finu. Ti ni chunde da ya ini iin yau jaa, ja ni jacha maa da jika iin kava, ja ti jakunduji ga ni iin ndiyi. ⁵⁴ Chi ja'ini kivi yukan keja'a kivi ka ndetatu yiví nación Israel.

⁵⁵ Ti ña'an ni ka kikoyo jiin Jesús undi ñuu Galilea, ni ka ja'an ña jiin José, ti ni ka jini ña nuu ni chunde da ya, ti ni ka jini va'a ña nava ni ka skatuu da yíki kuñu Jesús. ⁵⁶ Ti nu ni ka nandeokuñi ña ve'e ña, ti ni ka satu'va ña perfume, jiin iin nuu pomada ja na kin chi'i ña siki yíki kuñu Jesús. Yukan ti ni ka chiñu'un ña kivi ndetatu un nava iyo ley Moisés.

Ni nandoto Jesús

(Mt. 28.1-10; Mr. 16.1-8; Jn. 20.1-10)

24 Ña'an xaan kivi domingo ni ka ja'an ña'an yukan nuu ñunduji Jesús, ti ka yínda'a ña perfume ja ni ka satu'va ña. Ti suni kuankoyo tijni ga ñasi'i jiin ña naa ña. ² Ti nu ni jakoyo ña, ti ni ka jini ña ja, ja ni kuxio yuu ndi'yu yu'u ñaña un. ³ Ni ka kivi ña, ko tukaa ga ni ka nani'in ya yíki kuñu Jito'yo Jesús. ⁴ Ni ka ndo'o kue'e ini ña ja ni ka jini ña ja tukaa ga yíki kuñu ya, ti tu ka kujnuni ini ña nasa sa'a ña naa ña. Ti ni ka

ndo'o ini ña sia'an, ti ni ka ndenda ni uu chaa ka ñu'un sa'ma xkiyí ni'ní, ja janducha ii, ti kajin da xiin ña naa ña. ⁵ Ni ka yu'u xaan ña, ti ni jakundandijin nuu ña undi nuu ñu'un, ti chaa un ni ka kachi da: —¿Ndoo ka nanduku ra iin chaa chaku nu ka'iin ndiyi ja'a? ⁶ Tu kande ya ja'a chi ja ni nandoto ya. Nuku'un ini naa ra nasa ni kachi ya nuu ra na ni kunde ga ya ñuu Galilea. ⁷ Chi ni kachi ya: "Ru'u, maa Se'e Yíví Ñuyíví, nakua'a yiví ru'u nuu yiví ndeva'a kuiti, ti kin katakaa da ru'u nuu nda'a cruz, ko nu uni kivi, ti nandoto tuku ri", ni kachi ya —ni ka kachi chaa un.

⁸ Ti ni ka nuku'un ini ña nava ni kachi Jesús. ⁹ Ti ni ka kee ña nuu ni ñunduji ya, ti kuanukoyo ña, ni ka jani ña jnu'un nuu ndi uxi iin chaa ni ka kuu ndaja'a ya, jiin nuu taka ga yiví un. ¹⁰ Ti ña'an ni ka jani jnu'un nuu ndaja'a ya un, ni ka kuu María ñaa ñuu Magdala, jiin Juana, jiin María ña'an kuu nana Jacobo, jiin tijni ga ñasi'i un naa ña. ¹¹ Ko ndaja'a ya un ni ka jani ini da ja ni ka nduloco xini ña, ti tu ni ka kandixia da jnu'un ni ka ka'an ña. ¹² Ti vasu tu ka kandixia da naa da, ko Pedro ni ja'a da corri kuan nde'e da nuu ñaña un. Ni jaa da ti ni nde'e da ini yau un, ti ni jini da ja mani ga sa'ma manta un kanchuku. Yukan ti kuano'on da ve'e da, ko so ni naa ini da ja sia'an ni kuu un.

Ndajnu'un Jesús jiin uu chaa kuankoyo ichi Emaús

(Mr. 16.12-13)

¹³ Ti uu chaa un ni ka kee da suni kivi yukan, ti kuankoyo da

iiñ ñuu nani Emaús ja kendo uxi iiñ kilometro jiin Jerusalén. ¹⁴Ti ichi kuankoyo da, ka ndajnu'un da siki taka ja ni kuu kivi un. ¹⁵Ti ni ka ndajnu'un da, ti ka ka'an ka ka'an da kuankoyo da, ti ni tu'va maa Jesús kua'an ya jiin da. ¹⁶Ti vasu kua'an ya jiin da, ko tu ni ka nakuni kuiti da ja maa ya kuu, nanu ja so ni jasi ini da. ¹⁷Ti maa Jesús ni jikajnu'un ya naa da:

—¿Naa jnu'un ka ndajnu'un ra ichi vekoyo ra ja'a? ¿Ti ndoo ka kukui'ya ini ra naa ra? —ni kachi ya.

¹⁸Ti iiñ chaa nani Cleofas ni kachi da:

—Ni ka'nu yivi ñuu Jerusalén ka jini i taka ja ni kuu ñuu un. ¿Xi maa iiñ ni ro'o kuu ja tu jini taka ja ni kuu un, vasu yukan kancha ra nu? —ni kachi da.

¹⁹Ti maa ya ni jikajnu'un:

—¿Ndoo ni kuu nusa? —ni kachi ya.

Ti ni ka kachi da:

—Nundo'o ni jna'an Jesús, chaa ñuu Nazaret, ja ni kuu da profeta ni ka'an da jnu'un Yandios. Ndichi xaan ni ka'an da, ti ni sa'a da taka jniñ ña'nú ja vaji nuu Yandios. Nuu taka yivi ni ka jini. ²⁰Ko chaa ka kuu sutu ka kuña'nú un jiin chaa ka ndiso jniñ ña'nú un, ni ka nakua'a da chaa ja na kuu da nuu nda cruz. ²¹Ti ka ñukuu ini ri ja maa da kin nama yivi nación ri Israel nuu gobierno ñuu Roma. Ko vijna ja iyo uni kivi ja ni ji'i da ja siki jniñ ni sa'a da. ²²Ti sava ñasi'i ka jini jna'an ri jiin, ni ka siu'u ña ru'u, chi jaña'an xaan vijna ni ka ja'an ña nuu ñaña un. ²³Ti ka jani

ñ jnu'un ja tukaa ga ni ka jini ña yíki kuñu da ini ñaña un. Ti ni ka nchakoyo ña ka jani ña jnu'un ja, ja ni ka jini ña uu ángel Yandios. Ti ángel un ni ka kachi da ja chaku Jesús. ²⁴Yukan ti sava ñianjna'an ri ni ka jande'e nuu ñaña un, ti ni ka jini da ja jandaa ndixia kuu jnu'un ka ka'an ña'an un, ko tukaa ga ni ka jini da nuu maa Jesús —ni ka kachi chaa un.

²⁵Yukan ti ni kachi Jesús jiin da naa da:

—iChaa tu ka chaku ini ka kuu ra! Xaan ga u'u ti kandixia ra naa ra jnu'un ni ka ka'an profeta na jana'an, ja ka'an siki Cristo, ja taji Yandios nava na sa'a ya jniñ ña'nú.

²⁶¿Va nu tu kanuu kondo'o Cristo taka nundo'o ja'a xnakan, ti sa kin no'on ya andivi ti nduña'nú ya nu? —ni kachi ya.

²⁷Yukan na ti ni keja'a xndaku ya taka jnu'un yoso nuu tutu Yandios, ja ka'an nasa kondo'o maa ya. Ni keja'a xndaku ya nava ka'an nuu tutu Yandios ni chaa tutu Moisés, ti ni siin ya jiin tutu Yandios ni ka chaa profeta na jana'an un.

²⁸Ti nu ni ka jakoyo da ñuu nuu kuankoyo da un, ti Jesús ni sa'a ya ja siin ya ichi ki'in ya. ²⁹Ti maa da naa da ni ka chayika da ya ja na kendo ya jiin da, ti ni ka kachi da:

—Kendo jiin ri ja'a na kendo yo naa yo, chi ja ni ini xaan, ti ja kuan ki'vi —ni ka kachi da.

Yukan ti ni kivi Jesús ja kendo ya ni naa da. ³⁰Ti nu ni nukoo ya mesa jiin da ja kuxini da, ti ni ki'in ya iiñ staa stila, ni nakuenta'u ya nuu Yandios, ti ni tejna'an ya nuu da naa da. ³¹Ti ja sia'an ni sa'a ya,

sa ni ka nakuni da ya, ja maa Jesús kuu ya. Ko nu ni ka nakuni da ya, ti ni ndoñu'un ni ya kua'an ya.³² Ti ni ka kachi da:

—Jandaa ni kuu ja ka na'nú ini yo ya, ko nu ni ndakuni'in ya nava ka'an tutu Yandios siki Cristo, na ichi vaji yo, ti ni ka ndusii xaan ini yo jiin jnu'un ni ndaku ni'in ya nuu yo —ni ka kachi da.

³³Yukan ti tukaa ni ka kendo da, chi ni ka naki'in da ichi kuanukoyo da undi Jerusalén nuu kanchuku ndi uxi iin apóstol jiin taka ga jna'an da, ja ni ka ndututu da kanchuku da.³⁴ Ti yachi ni ka nchakoyo da, ti ni ka kachi chaa kanchuku un:

—iJandaa kuiti kuu ja ni nandoto Jito'yo, ti ni ndenda ndijin ya nuu Simón! —ni ka kachi chaa kanchuku ve'e un.

³⁵Yukan na ti ni ka jani da jnu'un nava ni ka ndejna'an da jiin ya ichi kuankoyo da, jiin ja nasa ni ka nakuni da ya na ni tejna'an ya staa stila nuu da.

Ni ndenda Jesús nuu ndaja'a ya

³⁶Ti ni ka ndajnu'un ga da jnu'un un, ti ni ndenda ndijin Jesús kandichi ya ma'ñu da naa da, ti ni kanxia'u ya sia'an jiin da naa da:

—Na kukuee nuu ra, ti na kusii ini ra naa ra —ni kachi ya.

³⁷Ko maa da naa da ni ka yu'u xaan da, ti ka ndo'o ini da ja so ni naxna'an ya maa ya nuu da, chi tu ni ka nakuni ndaa da ja maa ya kuu ndixia.³⁸ Ti maa Jesús ni kachi ya jiin da naa da:

—¿Ndoo ka jani siki ini ra ti ka yu'u ra naa ra?³⁹ Nde'e nda'a ri

jiin si'in ri naa ra, ti kuni ndaa ra ja maa ri kuu ndixia. Ke'e ru'u jiin nda'a ra ti kuni ndaa ra, chi iin tachi ja naxna'an nuu yo tu iyo yiki kuñu nanu ka nde'e ra ru'u —ni kachi ya.

⁴⁰Nu ni ka'an ya sia'an, ni xna'an ya nda'a ya jiin ja'a ya.⁴¹ Ko vanuxia maa da naa da, changa ga kandixia va'a da, ti ka kusii ini da, ko so ka sa'u ini da naa da. Ti ja yukan ni kachi Jesús:

—¿Ka ñava'a ra ti'li ja kaji yo ja'a naa ra nu? —ni kachi ya.

⁴²Ti maa da ni ka ja'a da iin pedazu cháká ja ni ka tau da nuu ñu'un, jiin iin staa nduxí ñuñu nuu ya.⁴³ Ti ni ki'in ya un, ti ni yaji ya nuu da naa da.⁴⁴ Yukan ti ni kachi ya:

—Nundo'o ni jna'an ri, yukan kuu jnu'un ni jani ri nuu ra naa ra na ni kuncha ga ri jiin ra naa ra, ja kanuu ja na siuku ri nava yoso taka tutu Yandios, tutu ya ja nani ley Moisés, jiin nuu tutu ya ni ka chaa profeta na jana'an, jiin nuu tutu ya ja nani Salmo —ni kachi ya.

⁴⁵Yukan na ti ni kachi ndaa ya nuu da nasa kuni ka'an taka jnu'un yoso nuu tutu Yandios siki maa ya.

⁴⁶Ti ni kachi ya:

—Sia'an yoso nuu tutu ja siki ru'u ja kuu ri Cristo, ja taji Yandios ru'u sa'a ri jniñu ña'nú, koo ndo'o koo nene ri ti kuñu ri. Ti nu uni kivi ti nandoto ri ma'ñu ndiyí un.

⁴⁷Ti sivi ri kuu ja kuichanuu kí'in nuu taka nación, ja na kuni yívi jnu'un ri naa i. Ti keja'a undi ñuu Jerusalén, kachi nuu i ja na nakani ini yívi naa i nuu kuachi i, nava na kuanka'nu ini Yandios nuu i.⁴⁸ Ti

maa ra naa ra, kua'a ra jandaa nuu takaa ja ka jini ra jiin takaa ja ni ka jiniso'o ra. ⁴⁹Ko kundatu ra ñuu Jerusalén ja'a, chi taji ri maa ya ni chisojnu'un Tata ri Yandios nuu ra naa ra. Ko kundatu ra ñuu ja'a undi na ni'l'in ra maa ya kii nuu Yandios, ya kancha andivi, sa kuu sa'a ra jniñu tatu ri nuu ra naa ra —ni kachi ya.

Ni ndaa Jesús andivi

(Mr. 16.19-20; Hechos 1.9-11)

50Yukan na ti ni kee ya Jerusalén jiin da naa da, ti kua'an ya undi ñuu Betania. Ti yukan ni kani'l'in ya

ndinduu nda'a ya, ti ni jikanta'u ya nuu Yandios ja na kua'a ya jnundee ini nuu da naa da, ti na koto nda'u ya naa da. ⁵¹Ti ni ka'an ga ya sia'an, ni kuxio ya ma'ñu da ti ni ndaa ya kuano'on ya andivi.

52Ti maa da naa da ni ka chiñu'un da ya, ti sa kuan nukoyo da Jerusalén, ko ka kusii xaan ini da kuankoyo da. ⁵³Ti yukan niñi ka ja'an da ini veñu'un ka'nu Israel un, ja ka nakanajaa da Yandios ja ña'nú kuu taka jniñu ni sa'a ya.

Ja'a kuu jnu'un Yandios ni chaa Lucas.